

# NKONKO NÈ MANDAMUNA



Twänjàayi kushaala biimànyine kuulu katanci kakesè bwà disambila.

Nzambi munanga, tudi tuKusàkidila dilòlò edi bwà, dyàmbedi, bwà Yesù Kìlistò, Musùngidi wetù. Tudi tuKusàkidila bwalu Yèyè ùdi umweumwe awu makèèlèlè, leelù, too nè kashidi. Tudi tuKusàkidila bwà bantu bàdi bìitabuujà nànkù. Tudi nè disànka dyàbùngi dyà mutùdi nè Nzambi, kaciyi ànu nzambi mudifwànyikijila, lupìngù lwà ludifwànyikijila, nyumà wa mudifwànyikijila to; kakwèna cintu cyà cìdifwànyikijila nànsha cimwè pa bwalu abu to—n’Nzambi mulelèlè nè udi nè mwoyi udi neetù nè munda mwètù nè mwikàle ùkwàta mudimu munda mwètù. Katùyì twenzela Nzambi lupingu kampàndà to, kàdi twètù biikàle bimfwànyì bìdi nè mwoyi byà Nzambi. . . Nyumà Mwìmpè, kàyì wàkwila ku lupìngù to, kàdi wàkwila ku dibùngù dipikula—Nzambi mumwèneshiibwe mu mubidi. Mùshindù mwinè wutùdi tuKusàkidila bwà cyòci eci’s wè, Dikunji dyà Kapyà dinèna diikàle ditùlonda, anyì mutùdi tuDìlonda’s wè, nè bwà mamwèneshiibwa manèna ònsò à Nyumà umweumwe awu wènza mudimu wùmwèwùmwè wùtùYe mwenzè misangu yònsò pàtùYe ùlwa pa buloba. Mbusàmbi kaayi bùdici citùpèèsha’s wè!

<sup>2</sup> Tudi badisangishe dilòlò edi, Mukalenge, kì mbwà kiipàcilà kakwàbò to ànu bwà kumanya nè kuyiila, ku dikwàcisha Dyèbè, mushiindù wà kwikala beena Kìlistò batàmbe bwìmpè nè batàmbe kukùmbanangana bwà dìbà ditùdi twenda tusemena edi. Kwènàku muswè kutùkwàcisha anyì, Mukalenge; tudi Neebè dijinga. Mu Dìnà dyà Yesù. Amen. (Nudi mwà kusòmbaayi.)

<sup>3</sup> Nè nkonko mitwè ku makùmi àsàtù anyì makùmi ànaayi cyanààna, ncyèna—ncyèna mumanyè nè mmùshindù kaayi wùmvwà mufwànyine kufika ku yòyi to. Ndi muditàcishe bikolè mu mapingaja emu bwà kumòna ní ndikù mwà kuyipwekesha ku bùngi bukùmbànakù, kàdi ncyèna mwà kucyènta to. Kàdi ndi muswè kwamba nè nêngènzè nè mwànyì mwònsò mùndì mwà kwenza bwà—bwà kwandamuna ku nkonko eyi, bwalu n’nkonko mìmpè, yìdi yifùmina mu myoyi yà beena Kìlistò. Nè ncyà bushùwà nè ndi—ndi muswè kwenza cyònsò cìndi mumanyè mwà kwenza bwà kuyàndamuna ànu nè meeji matòokè nè mwànyì mwònsò mùndiku mumanyè mwà kuyàndamuna amu. Nènku ndi—ndi muswè kusàkidila Mukalenge bwà mùshindù ùdiYe mutùkwàcìshe mu dìndà emu mu ditùkwàcìsha bwà—bwà kubàkula nkonko eyi nè ku—nè ku—kufika ku mandamuna àdìYe mutùpèèshe.

<sup>4</sup> Mpindyewu, ndi ànu naayi yònsò mwab’ewu misambàkàne,

ndi nciinka nè n'lukàmà nè makùmi àtaanu mikwàbò. Nènku tudi bandàmùne bu makùmi àbìdì nànkù awu, ngèèla meeji, mu dindà emu. Nè—nè nànkù mpindyewu, kumpalà kwà twètù kubanga, Mwva ànu njinga kwamba nè kòkò muntu kampàndà uvwa ujinga kaabwalu aka pa *Èkéleeziyà Úja Maja À Bìdùndadùnda Munkaci Mwà Ngoma*, mwambi wa ba-Presbytériens mwaba ewu ùlombola disangisha dyèndè mu maja à bìdùndadùnda, ndongamu kampàndà bwà—bwà nsacramento. . . Twǎnjàayi kumòna bwà katanci kakesè.

<sup>5</sup> “Bidimba bitekète bìdì bidyela nè jazz—jazz. Dinàya dyà bikàsà dilonde Dikèngà dyà dyediibwa dyà ku nkùrusè mu c-y-a-k-w-i-d-i cyà cyena leelù cyà bìdùndadùnda.” Mpaasàtà ewu ùlombola bansongà bònsò kuntwaku nè bàpicila mu makèngà à Kilistò, dipoopediibwa dyà pa nkùrusè ditèkiibwe mu dinàya dyà bìdùndadùnda nè dyà jazz. Èè. . . Cìdì mu Maryland. Mpindyewu, aci kí ncintu kampàndà anyì?

<sup>6</sup> Nè pashìshe, photo wa bòbò abu nyèyè ewu. . . Mwva munkaci mwà kunwàmbila mu dindà emu bwà baMùyàpàndì, *Dyalukila dyà BaaMùyàpàndì*, nè ki tumaalu tufùnda nwòtò atu; bìvwa bikèngela ànu nwènù kutùbala mu cikàndakàndà aci nè bintu byònsò bishiilèshiilàngàne abi. “. . . ànu bu nè, mbajuulè ntèndeleeleu mupyamùpyà.” Mpindyewu, mulongolodi wabò wa ndongamu. . . Ndi nè kabèji kafùnda mu cibèjibeji mwab'ewu. Kanwèna nè dìbà. . . Muntu yèyè muswè kubala byòbì ebi, anyì ndi mwà kubiteèka ku mboodì wa mamanyisha, dìbà adi nudi mwà kubìbala. Nènku ndi muswè ànu bwà kunùleeja nè dìbà ditùdimu nè mwoyi ndyà bwalu kashondo. Nudi bafwànyine kwikala kanùyì bacyùmve to, kàdi, bantu wetù, teetàayi bwà kucyùmvwà, cìdì bintu ebi's! Ndi mumulòmbe Mwanèètù Capps, yèyè mmulonge kàlaasà kààbùngì nè ùdi mwà kubala bìmpè kuntàmba mèmè, Ndi mumulòmbe bwà kubala kaabwalu kàà kùdì mulombodì wa baaMùyàpàndì. Udi mwà kucyènza anyì, Mwanèètù Capps, mpindyewu?

<sup>7</sup> [Ùdi wàmba nè:]

[BaaMùyàpàndì bàdì bàdikonka bwàbò bòbò biinè kàdi kabàyi nè dyandamuna nànsha dimwè to. “Mbikolè bwà kucitabuujà, kakùyì mpatà to mbikolè bwà kucitabuujà,” ki mùdìbu bàmba kùdì Derek Taylor, cikùma-mbilà wa tudyòmba twà baaMùyàpàndì. “Ke nsongàalùme yinaayi eyi mifùmine ku Liverpool. Mbakàyàbàle, mbeena bwakùlàvì, mbàà ciipanshì, nè mbacimùne buloba bujimà. Mbyenzè ànu bu nè mbajuulè ntèndeleeleu mupyamùpyà. Mbafwilakanyi nè Kilistò bèètù bàà menemene. Ndi mumanyè nè, mèmè pàanyi ndi mufwilakanyi nè Kilistò, kàdi bòbò mbafwilakanyi nè Kilistò menemene mu mùshindù wà nè bàdì bàmbazula, cìdì kacyi ncintu cipeepèle bwà kwenza nànsha. Kàdi ndi mubàkùdìbwe kùdìbo. Bantu bònsò kí mbabàkùdìbwe anyì? Ndi

mubàkùdiibwe kùdi meeji àbò matòòke. Nè bantu bàdi batàmba kubàswa bikolè abu ng'aba bàvwà nè cyà kwikala batàmba kufìkishiibwa munda kudìbu. Mu Australie, cileejilu, musangu wònsò wutùvwà tufika ku cipalu cyà ndèkè, bivwa byenzè ànu bu nè de Gaille ng'uvwa mwikile, anyi kupita nè aci, bu nè m'Maasiyà. Njila yivwa mipàte patapata nè milongo yà bantu, balèma bàvwa biimansa makombo àbò, babèedi bàvwa bàlwa lùbilu ku kàshinyi byenzè bu nè bôbò mwà kulengibwa kùdi umwe wa ku bansongàalùmè abu bàvwa mwà kusàngajiibwa kàbìdi, bakàji banunu bàvwa biimana bàbandila nè biikùlù bààbò, nè patùvwà tucipila mwaba awu, mvwa mwà kumòna ciluuji pa mpàlà yàbò.]

[“Bivwa byenzè ànu bu nè musùngidi kampànda ùvwa mufikè nè bantu bònsò abu bàvwa nè disànka nè bàdyùmvwà basùlùdiibwa, byenzè bu nè bintu mu mùshindù kampànda bivwa mwà kulengela mpindyewu.”]

[Taylor kwimanayè kakesè nè kwasàye mucì wà mfwankà ku mishiku. “Cintu cimwèpelè civwà cishàale bwà baaMùyàpàndì,” mwàkambàye, “ncyà kuya mu mudimu wà dyondopa.”]

8 Aci kì ncyàkambàYe anyi? “Bààbùngì nebàlwe kùNdi mu ditùkù adi bàmba nè: ‘Mukalenge, mèmè ncyèna...?’” Nwamònu anyi? Mpindyewu, kanwènaayikù mwà kumòna nè kanwèna mwà kutèèka dyeyemena dyènu mu tùmpanyè twà dyondopa anyi? Kwèna mwà kutèèka dyeyemena dyèbè mu cimanyinu cyà mùshindù wònsò nàka mùshindù awu to. Cintu cimwèpelè cyùdi mwà kutèèkamù dyeyemena dyèbè cidi EMU MMUDÌ MUKALENGE WÀMBA wa mu Bible. Mpindyewu, Èkéleziyà, ke mwaba wùndi muteetè bwà kunlùlùmina ngwòwò awu, nwènu bàna bàanyi. Nènkù cintu kampànda cyòci cingenzèkèlè nè Nzambì mungumushe pa buloba ebu, kanùpangidikù to. Vùlukàayi eci nè mwoyi wènu wònsò nè: Shààlaayi nè Dìyi adi! Kanùlekedikù Dìyi adi to! Cyònsò cidi cibènganganà naaDì aci, cilekèlaayi, nànsha ciikàle cinyi. Dìbà adi nudi numanya nè nDilelèlè. Nwamònu anyi?

9 Kàmpanyè kàa dyondopa mpindyewu! Bangènzàmpèkààtù bàvwà bakèmèshe mene nè balombodi bààbò biinè nè maalu àbò à busenjì, à manyaanù, à bukooyà; kàdi bantu biimansa mabaya àbò à balèma nè bòndopiibwa ku ditàngila kùdi bansongàalùmè aba. Mbikooyike ànu menemene, nè byà manyaanù, nè bifwilàkanyi nè Kilistò! Nudi numòna's, n'Sàtaanà mu kàmpanyè kàa tuseku. Nwamònu anyi? Yèyè ùdi wènzà cintu kanà cyònsò cidi Kilistò mwà kwenza aci, kàdi kèna mwà kushindika Dìyi to. Nwamònu anyi? Yèyè neàngatè citùpà cyàCì apa nè citùpà cyàCì apa, kàdi yèyè kèna mwà kuCyàngata cyònsò to. Nwamònu anyi? Kèna mwà kuCisanga pàmwè to. Pa nànkù nudi numòna's, kabyèna bikèmesha to

mùdi Bible mwambè nè aci ncifwànyine kuseeswisha Basungula mene bu nè bìvwa mwà kwenzeka: nyumà mufwilakanyi nè Kilistò.

<sup>10</sup> Mpindyewu, nànsha mene mulombodi wabò wà ku tudyòmbà, mwena ku tudyòmbà twàbò, mmutwè ku cyàbò, ùdi ùbiitabuuja, ùvwa mwambè nè yèyè mwinè mmukwàciibwe kùdi cintu cimwècimwè aci, bwalu mbamukikè.

<sup>11</sup> Bintu bibi abi, byòbì... Mpindyewu, kanwènakù bamòne anyi, nwènù bakàji, bwà cinyi ndi nteeta bwà kunwàmbila bwà divwàla dyà tùpùtulù, dikòsà dyà nsuki, dibebula dyà nsuki, nè bikwàbò ebi. N'nyumà kampàndà. N'nyumà kampàndà! S'ki cyòci eci ànu mu bikàndakàndà byètù byà mushinga nè byònsò byà bidì bileejìibwe, bidùndadùnda nè bikwàbò mu èkèleeziyà. Mòna's, cidi ànu bulogolodi bwà Sàtaanà, kàdi bàcidi ànu maèkèleeziyà nè màngumba.

<sup>12</sup> Alùkilaayi ku Díyi, nwènù bânà, lùkàsà nè mwènù mwònsò; nè kanùdidingikù nwaDilekela to! Shààlaayi nwènù ànu nè Díyi adi.

Nwamònu's, mùshindù wùdi nyumà mufwilakanyi nè Kilistò awu, ùdi mwà kwakula mu myakulu, ùdi mwà kuleeja bimanyinu nè maalù à kukèma; ùdi mwà kwondopa babèedi; ùdi mwà kwenza bintu byònsò ebi. Nwamònu anyi? Bantu abu bàvwa bèèla meeji nè bàdi bàseemena kùdi Nzambi, nè bóbò bansongàalùmè abu mbatùmìbwe bàà Nzambi, bwalu èkèleeziyà mmùlengùlùle Díyi panshi.

<sup>13</sup> Nsongàalùmè ayi nyà mu èkèleeziyà. Elvis Presley mmwena Mpenta. Pat Boone ùtu wa mu Église de Christ. Tàngilàayi balùmýànà abu, beena Mpenta, Église de Christ, nè bònsò bàà mùshindù awu biikàle nè nyumà mibi ayi pambidi pààbò. Red Foley, díyi dyà ngòlò, Èkèleeziyà wa Kilistò, wimba misambu yà butèndeledi mùdi muntu nànsha umwe kàyi mwà kuyimba to kàdi kwimba bìdùndadùnda mu díyi didi dilondà. Ku mamuma àbò nkunwàbàmanyinà. Tàngilàayi nùmonè nè mbàà mu maèkèleeziyà kaayi's. Elvis Presley ùdi cidimba cyà Assemblées de Dieu. Ki bwalu mbwòbù abu's, muntu nè muntu wa kùdibo ùvwa muswè cyòci aci, ke Sàtaanà kubàpèeshaci.

<sup>14</sup> Kanwènaayikù numòna anyi, balundà bàanyi, mùshindù ùdi... Kanùlekeledikù Díyi adi to. Nwamònu's, n'nyumà kampàndà udi unùkwàta's.

<sup>15</sup> Nènku ndi ngàmbila bakàji aba, pàdibo bàdivwija nè mmwènekèlu wa ùsalula masandi mu nkanzu eyi, nè Nzambi neànùlumbùlwishè bwà dyenda dyà masandi. Nwènù biitàbùuje nè mèmè ndi cinùdi nwamba aci, musadidi wa Nzambi, mupròfetà, tèelejàayi cìndi mèmè nkwàmbila aci. Nwamònu anyi? Nudi bafwànyine kwikala kanùyì mwà kucyùmva to, nè nwènù kanùyì mwà kucyùmva to, díbà adi nudi nwenza ànu cìndi nkwàmbila bwà kwenza aci. Nzambi neàngoomèkèlè bujitu

bwà bîndi ngâmba. Nwamònu anyi? Nwênù tèèlejàayi nè ntèmà yònsò, nè vùlukàayi nè bintu abi bidi nyumà.

<sup>16</sup> Pa ciibidilu, pàmwàpa muntu awu kèna. . . Nudi bavùlùkè's, *Nzambi mbuwikùla kùdì dikòbà*, mwà mùyiihèpu àbìdì àdì panshì aa (nwamònu's, nwamònu anyi?), Nzambi mwikàle nè dikòbà pambidi? Mpindyewu, vùlukàayi ànu nè, bàmwè bàà kutùdì mbatùmiibwe pa buloba ebu bwà kubwela mu bipaapu ebi bwà kutwàmbila maalu aa. Nwamònu anyi? Ndidyanjila-kumanya's; n'Nzambi wàkula, ùleeja. Paùdì ulumbulwishila cintu kanà cyònsò ku mubidi, mòna's, bòbò kabèèna nè bwalu to (tàngilàayi kùnweku), bantu bàà maalu malenga, bàà meeji matòòke, kî mbafwànyine kunwambila dishima anyi ní ncinyi to. Kàdì cintu cyònsò aci mu kaabujimà ndyabùlù. Batèndeledi, babange mene nè kàmpanyè kàà dyondopa. Nwamònu anyi? Ànu kàà mufwilakanyi nè Kilistò kàà menemene. Nwamònu anyi? Nè kùdì ba-Presbytériens nè bònsò abu. Nudi numòna màngumba awu, mùdìbo bènza, ànu mu cintu cìmwècìmwè aci amu anyi?

<sup>17</sup> Mòna's, mu Londres emu, mu Angleterre, ànu àbìdì àdì panshì aa bàvwa nè cisumbù cyà bidùndadùndà cìvwà cìtentula Kilistò, nè Yudaàsà, nè byònsò abi, nè. . . Kwinyikabò Kilistò nè "Papa-o" nè kwakulabò nè myàkù yònsò yitù bânà bapàle abu bààkula ayi. Nwamònu anyi? Bânà bàà bitende bákòòkeshi buloba bujimà. Mpindyewu, nudi bamanyè nè Bible mmudyànjlè kwamba nànkù: Babùle kusàkidila, kabàyi cijila, kabàyi dinanga dyà cifùkilu, bashipi bàà bipungidi, bashiminyinyanganyi bàà maalu, bàshìkukila baledi (nwamònu anyi?), bânà bàà bitende munkaci mwà kukòòkeshi buloba bujimà, nè s'mbenzè nànkù.

<sup>18</sup> Mwva muyè mu mwaba kampàndà dīngà ditùkù; bàvwa bànya cyòci aci, manàyi à kale, à bèla mfrangà mu cyamù cyà juke-box cyà manyaanù, bintu byònsò abi. Ncìvwa nànsha muswè kwangata dīkù dyànyì to. Mèmè è kwambila inàbànza awu nè: "Dinàya dyà màtadi minè awu didi diyila mfrangà yingà?"

"Bìcyelè dikùmi ku òmwè."

"Cìdì cìpìcisha màtadi bùngi munyì ku dībà òmwè?" Mukàjì awu kungambilayè. Mèmè nè: "Mfrangà nyèyi; cìtùùlaaku's!"

"Èè," yèyè nè: "ncìvwa mwà kwenza aci to. Bânà abu bàtu bàlwa mwab'ewu bwà kunàylakù."

<sup>19</sup> Dībà adi ncìvwa mwà kutùùla mfrangà muntwamu to; mèmè kuya mūngà mwaba. Nwamònu anyi? Èè, bintàkanyi abi's mbifwànyine kukubindulula; udi mufwànyine kupweka nè kukangata dyanza dyà tumuma twà tulù twà kunwà bwà kutalaja mutù paanyimà pàà bamanè kutèèleja bintàkanyi byà dipaala abi. Aci's cidi ànu cìtácisha mwena Kilistò. Wèwè munangè bintàkanyi byà mùshindù awu abi, udi mumanyè cidi lutàtu lwèbè anyi? Bìdì bikukèngela kusungidiibwa, bwalu cidi

munda mwèbè aci cidi cidishiibwa pa cintu kampàndà cidi kaciyi Dìyi. Cidi cidishiibwa kudi . . .

<sup>20</sup> Kanùvwakù mwà kudifwànyikijila Yesù munkaci mwà kwenza cintu cyà mùshindù awu to, kî mmwömu anyi? Nudiku bafwànyine kudifwànyikijila umwe wa ku baprófeta wènza cintu bu nàнку anyi? Kanwènaayikù numòna, balundà bàànyì nè, cintu cyònsò mu kaabujimà's ndyabùlù anyi. Nè Bible mmwambè mùvwàye mwà kulwa mu mmwènekelu wa ntèndeleeleu nè kwenza ànu menemene bu Kilstò. Nwamònu anyi? Kàdi mùshindù wùmwèpelè unwikalàku bakùmbàne bwà kucijingulula, kî ngwà kushààla wa mu èkèleeziyà *kampàndà*, anyi kushààla wa mu èkèleeziyà *kansanga* to, ngwà kushààla nè Dìyi; Yèyè ùdi Dìyi.

<sup>21</sup> Mpindyewu, Mukalenge ànùbènèshè muntu nè muntu. Tudi tuya buludi ku nkonko. Nènu mpindyewu, bwà . . . too nè ku dibà dimwè nè tusunsa dikùmi nè tútaanu . . . Ncyàkupeta mùshindù wà kujikija nkonko yònsò eyi to. Yidikù mishiki nè mishiki. Ndi ngèèla meeji nè n'konko mimpè. Mmimpè be. Nèmpwekeshè ànu cianza ngàngatè lùmwe apa lùmwe kwàka pangìikalà ngènda nyà apu. Nènu mpindyewu . . . kulwàdamuna . . .

Mvwa mufwànyine . . . Mvwa ngèèla meeji dilòlò edi nè mvwa mufwànyine ànu kulwa, kulekela muntu kampàndà ùyibala, kwamba nè: “èyowà” anyi “to,” “èyowà” anyi “to,” pa . . . Aci kî nkwezela bantu bimpè nànsha. Bòbò mbeelè nkonko ayi bwà kupeta mandamuna. Kàdi ncyèna—ncyèna mufwànyine kwenza nàнку to, bwalu mèmè nengàngate yingìikalà mufùdishe ayi; nè yíndi nciyi mufùdishe, nényangàte musangu wàlondà.

<sup>22</sup> Nènu mpindyewu, ndi—ndi . . . Bwà dyàlumingu dilwalwà, ncyèna mumanyè to. Ndi nkwàmbila nè; nwènù mwà kutwilangana nè Billy kuumukila ku mpindyewu too nè ku diisàtù . . . Tudi mwà kwikala nè cyà kuumuka.

<sup>23</sup> Mpindyewu, cintu cimwèpelè ncyòci eci. Ndi mushàadile paanyimà bikolè bwà miyiiki yà bàbidi ayi. Billy mmundeejè mushiki wà miyiiki yà bàbidi *mòna* bule, yidi mindile, yimwè yà ku yòyi, nyà kukaadi ngondo nè ngondo. Èè, pàncidi mùnwemu apa, bidi bikèngela bwà mèmè kwenzakù yimwe yà ku yòyi ayi, kubàkulakù àmwè à ku masangisha, kwenza bintu byònsò bìndi mwà kwenza bwà kucincikakù maalu. Nènsambilè lumingu elu pangìikalà mùye apu nè kukonka Mukalenge nè: “CidiYe muswè bwà mèmè kwenza ncinyi, kujikija yòyi eyi anyi—anyi kwangata miyiiki yà bàbidi?” Mèmè mwangàte miyiiki yà bàbidi, díbà adi nengìikalè ànu nè cyà kulwijakaja . . . kwalukila kumbèlu mu dyàlumingu nè kwenzela miyiiki yà bàbidi eyi mu mwaba kampàndà, nè kutungunuka munda mwà ditùkù nè miyiiki yà bàbidi eyi. Kàdi mèmè nciyi mwenzè nàнку to, mòna's,

nebikèngelè bwà ngiimanyikè miyiiki yà bàbìdì ayi too nè pangàalukilà cyàkàbìdì. Mémè nciyi mwenzè nànkú to, díbà adi nêngàdamunè . . . Nêngiikalè . . . Billy neànùtùminè kartà.

<sup>24</sup> Nènku ndi nnwàmbila's; mbìmpè, bàna bàà musinga mukolè aba, bwà kunwàmbila mùshindù wùdìbo banangàngàne muntu nè mukwèndè, dinanga didìbo naadì bwà muntu nè mukwèndè. Ewu neàmbilè mukwèndè nè awu pèndè neàmbilè . . . Billy ùtu ùbìikila ànu umwe mu citùpà kampànda, mu kilòmèètà bu nkàmà yìbìdì nè makùmi ànaayi, nè bakwàbò bònsò abu bàshààla bàmanyisha bakwàbò. Mbanangàngàne muntu nè mukwèndè. Kì mbaswè kupangila cintu nànsa cimwè to. Bàdì nè . . . mbaswè kwikala kaaba aka ku kasunsa nè ku kasunsa kònsò bwà kumòna cìdì cyènzekà; bwalu bu Mukalenge nè cyà kufila cintu kampànda, mbaswè kwikala kaaba aka bwà kucyàkidila. Nènku ndi mbàànyisha.

<sup>25</sup> Mpindyewu vùlukàayi, nwènu balundà bàanyi bananga nè, mu dindà emu mvwa mwambè díyi kampànda pa yimwè yà ku nkonko. Nè ndi mumònè yimwè yà ku yòyi eyi (éyowà!) nànsa nànkú, yìndì mupetè mu dindà emu, yidi yàbùngì bwà aba bàdì bàkasombèla ku Arizona. Nwamònu anyi? Mémè kudyàmbidila nè ndi mufwànyine . . . mbìmpè kubitòòkesha, bwà nwènu kuumvwa.

<sup>26</sup> Mpindyewu, kanwìkadi—kanwìkadi nwèlà meeji nè ndi nteeta kwambila bantu mwaba wùdìbo mwà kusòmbela, nè cidìbo mwà kwenza, nè . . . Mpindyewu, ncyèna ngàmba aci to, mwanèètù wa balùme munanga. Kùdì bantu bàà meeji matòoke bàdì baswè kutentemuka kuya kasòmbela kuntwaku. Èè, muntu kanà yònsò udi muswè kutentemuka awu, ncyà bushùwà nè ndi mufwànyine kwikala—kwikala nè disànkà, bu mémè mwà kwikala kuntwaku, díbà dyònsò dindì kuntwaku . . . Ndi mwaba ewu misangu mitwè ku dikùmi kupita yìndì nsangayibwa kuntwaku. Ndi nè . . . Kuumukila ku mpindyewu too nè ku Noël, ndi nè matùkù matwè ku ànaayi bwà kwikala kuntwaku. Pashìshe dyàkàmwè paanyimà pàà cyòcì aci, ndi ngùumuka nya dyàmwàmwà dyà mbù. Nêngiikalè kaaba aka ku tabernacle pàmwàpa mu mbingu yìbìdì anyi yisàtù kumpàlà kwà mémè kuya dyàmwàmwà dyà mbù mu—mu ditàbuluja, bu mùntù ngènta pa ciibidilu movù wa bintu bitòloka ewu. Nè pashìshe kuumukila apu, ndi nè disangisha ànu òmwèpelè mu Arizona mujimà, nè aci cidi cijika ku ngondo wa kumpàlà ku Phoenix, malòòlò àbìdì pàmwè nè Beena Kilistò bàà Kantu-ku-byanza.

Nwamònu anyi? Ncyèna . . . pìikalà bantu bàdì kwoku *aku* abu, um, nudikù mwà kwimakaja mukàbà wà mèyi awu anyi? [Mwanèètù Branham ùdì ùlòmba bwà mukàbà wà mèyi ewu kwimakajiiibwawò pàdiye wàkula nè disangisha apu. Katùpà kàà mukàbà wà mèyi munda mutupù—Muf.]

<sup>27</sup> Mpindyewu, patùdì tubanga nkonko eyi dilòòlò edi

apa, nêngàngatè lùm wè kaaba aka nè... Nudi nuyisànkila anyi? Ambàayi nè: “Amen.” [Disangisha didi dyamba nè: “Amen.”—Muf.] Ngèèla meeji nè bìdi nè dikwàcisha kutùdi pa dībà edi. Nènku kaa, ndi ngèèla meeji nè mu katanci emu... Pàmvwà ntàngila mu dindà emu kumpàlà kwà kulwa mwab’ewu ku yimwè—yimwè mifundu nè myaba kampàndà mu Bible, mèmè kudya mbidila nè: “Kaa, s’ncifwànyine kwikala cintu cilenga cyà dikèma... Patùcidì bindile Dilwa dyà Mukalenge apa, ncintu bulenga kaayipu cidici cifwànyine kwikala bwà kwalukila mu Dipungila Dikùlukulu kwangata bantu bònsò abu, kuumukila ku Yobò nè bònsò abu, nè kwenza mulongolongo wà masangisha pa bóbò abu (aci kí ncifwànyinekù kwikala cilenga anyi?), ànu bwà kunùleeja mùshindù wùdibo bàleeja mu cimfwànyi ànu mu ditùkù (Dìyi dyònsò mu kaabujimà ndiswikàkàne pàm wè), nè byònsò bìdi bitàngila dibùtudiibwa dyà mu—nè bikondo byà kale nè mùshindù wùdibi bidyàn jila kuleeja mu cimfwànyi leelù ewu. mùshindù wùdi bintu byònsò mu Dipungila Dikùlukulu byàkula bwà dilwa dyà Mukalenge Yesù.”

**279.** Mpindyewu, lukonko lwà kumpàlà lùndi mufyonònè mwab’ewu: **Mwanèètù Branham, mbibi bwà mukàji mwena Kilistò kuvùnga nsukì yèndè kuyènza mvwàngala anyi? Kàbìdi, mabòkò à málúzá èndè àdi nè cyà kwikala bule kaayi? Twasàkidila. Mwanèètù wa bakàji kampàndà.**

<sup>28</sup> Mpindyewu, aci cidì . . . cidì nè musinga wàbùngì be kùdi mukàji awu. Mpindyewu, bwà bàmwè bàà kutùdi bàna bèètù bàà balùme tudì bafwànyine kwela meeji nè: “Kaa, mukàji mukùtàkàne awu.” Kàdi—kàdi kí ncikùtàkana kùdiye to; mmuswè kumanya.

Mpindyewu, bwà cidì citàngila dyela dyà nsukì yèndè mu cinyi apa’s wè, bipya anyi cintu kampàndà cikwàbò anyi? Mfwilaayikù luse. Ncìvwa—ncìvwa . . . Cidì . . . Mfwilaayikù luse. Bìkànù byà mu nsukì. Mfwilaayikù luse. Bìkànù byà mu nsukì, bipya byà nsukì! Abi ke bivwà bàna bàà bakàji beèla mu nsukì bidimu bishààle ebi. Nudi bavùlùke, byenzè bu . . . Kabìvwa nànkù anyi? Bàvwa bàbìikila nè bipya, byenzè ànu bu mùdi nsukì yà mvwàngala milembèlèlè anyi? To, nsukì yà mvwàngala, mfwilaayikù luse, balundà bàanyi.

<sup>29</sup> “Mabòkò à málúzá àvwa nè cyà kwikala bule kaayi?” Ncyèna—ncyèna ngèèla meeji nè aci cidì nè bwalu nànsha. Ncyèna mumanyè to. Nwamònu anyi? Cìndi nciyi mwà kutwà nyama ku mikòlò nè Bible to, ncyèna—ncyèna muswè kwakula byàbùngì pa bwalu abu to.

<sup>30</sup> Mpindyewu, ndi ànu munkaci mwà kunwàmbila eci bwànyi mèmè, bwalu ncyèna nè Mufundu wà kutwà naawù cyòci aci nyama ku mikòlò to. Cintu cimwèpelè cìndi naaci bwà bainàbànzá bwà nsukì yàbò nkubènga kuyikòsa. Mùshindù wùdibo baswè kuyilongolola, aci’s ncibàtàngile bóbò. Kàdi bwà

bikànù byà kwenza naabi nsuki yà mvwàngala, mu bushùwà bwalu, ncyèna mumanyè nè ncinyi to, ambà ànu byôbi biikàla bintu bìdì bimwèka bu mpengèlà yà bilàmbà yidibo bàasa mu nsuki yàbò ebi, ke bìdì bu ci—cintu cìmwèpelè cìndi mumanyè. . .

<sup>31</sup> Kàdi bwà cìdì citàngila mabòkò à màluuzà, ndi ncinka nè, wèwè bu mwena Kilistò, Nzambi mmufwànyine kukwambila cyà wèwè kwenza bwà byôbi bintu abi. Nudi numòna anyi? Mémè ndi ngùtabuuja nè wèwè bu mwena Kilistò udi mufwànyine—udi mufwànyine kumanya mwà kwenza cyòci aci. Ncyèna ngèla meeji nè Nzambi mmwimàkàje bule kampàndà anyi ní ncinyi cyòsò to. Paùcidì ànu nè kaneemu nè umwèka wa kuneemeikiibwa nè mukezùke, ndi—ndi ngèla meeji nè aci cìdì ànu cìmpè. Kí mmwòmò anyi? Nwamònu anyi? Mpindyewu, aci cìdì ànu mmwènenu wanyì mémè. Mpindyewu, eci mmémè, nwamònu's, bwalu ncyèna mwà kutwà cintu cikwàbò nànsha cìmwè nyama ku mikòlò nè Mifùndu to.

<sup>32</sup> Ndi ngèla meeji nè mu dindà emu lukonko lùvwa lùjuuke bwà bwalu bwà kwela meekala mu nsuki, nudi bamanyè's, nnè—nè diikala kampàndà. Mpindyewu, ndi—ndi. . . cìdì. . . Ncyèna—ncyèna mwà kwamba kantu nànsha kàmwè pa bwalu abu to. Ncyèna mumanyè to, kàdi ncyèna—ncyèna—ncyèna—ncyèna nè Mufùndu wa kwamba bwà kubenga—bwà kwela meekala mu nsuki yènù to. Mpindyewu, aci's cìdì—ac's cìdì. . .

Nwènù bakàji, nusòmbèle banangè kwikala balenga kumòna, nè bivwa bikèngela bwà nwènù kumwèka balenga kumòna. Nè Mwanèètù Branham kènà ùbèngangana neenù bânà pa aci to. Nwènù nudi bânà bàanyi; ndi—ndi—ndi munùngè, nè ncyèna—ncyèna muswè kwikala kunùtandisha to. Ncyèna—ncyèna mufwànyine kucyènza bwà cintu nànsha cìmwè to; ndi nteeta ànu bwà kunùkwàcisha.

<sup>33</sup> Kàdi mpindyewu, tàngilàayi, ngànji ànu kukonka. . . Ngànji ngàmbe eci bwà kwandamuna ku lukonko alu. Mpindyewu, nudikù anyi? Nè nwènù bàdì batèèleja mukàbà wà mèyi, bwalu mbòbù ebu, bânà bèètù bàà bakàji: Kwòkò dyelakana pa bwalu abu, kanùcyènji to. Kàdi pawikalà—pawikalà mùjiibwe tèntè nè Nyumà wa Nzambi nè mulombòdiibwe bwà kuya kacyènza, piikalàci kaciyi cifwilakana nè Mufùndu nè kaciyi cijuula makonka, wèwè musànkishiibwe ànu menemene nè adi ndiswa dyà Mukalenge, díbà adi cyenzàaku (nwamònu anyi?), bwalu kakwèna Mufùndù bwà kwamba nè “to” (nwamònu anyi?) pa bwalu abu to. Ncyèna. . . Kí nkwambiibwekù cintu nànsha cìmwè cyà mùshindù awu mu Bible to.

<sup>34</sup> Ndi mumanyè nè Yeshàayi 5, ngèla meeji nè mmwòmò, mmwakùle bwà bakàji, mwikalàbo bàvwàla bilàmbà byà mushinga mukolè nè bintu byà mùshindù awu; kàdi aci cívwa dyambu nè bikwàbò, byà madileja. Wèwè mwenze nànkù bwà

maditambisha, díbà adi mbibi. Nwamònu anyi? Kenkètà mwoyi wèbè kumpàlà kwà Nzambi. Kwòkò kakúyi Mufundù bwà cyòci aci to, nè mùshindù wùdi Nyumà ùkulombola awu, ndà wèwè kumpàlà ùkacyènzè. Kàdi mpindyewu, pàkaadibi bìkafika ku nè bìvwa bìkèngela bwà wèwè kwikala nè nsukì mile anyi nsukì mîpi, ikàlè nè nsukì mile; aci's m'Bible.

<sup>35</sup> Kùdi lukonko kaaba aka; ndi—ndi mufwànyine kulwàndamuna mpindyewu mene. Lùdi munda emu; mvwa mulùmòne mu dindà emu anyi múngà musangu. Lwàmba nè: “Wèwè udi utùpanda maci misangu yònsò bwà bakàji, bwà cidìbo kabàyi mwà kwenza nè nsukì yàbò, kàdi kacya kùtu mwànji kwamba cintu kampàndà bwà bantu balùme to.”

<sup>36</sup> Bu mvwa mumòne muntu mulùme kampàndà ùbwela mwab'ewu nè nsukì mile mimulembèlèlè paanyimà pèndè apu bu muntu mukàji, mvwa mufwànyine kwamba nè: “Mukalenge, bwà cinyi kùyiku uya ku kazùbù kàà mukòshanganyi wa nsukì? Wèwè's udi umwèkà bu muntu mukàji.” Nwamònu anyi? Kàdi bantu balùme pa ciibidilu kabàtu bènza nàнку to. Nwamònu anyi? Kabiyi bu bantu. . . Mpindyewu, kabiyi bu dibènga kupangila dyà bantu balùme to, bàdi bapìile ànu bu muntu mukàji.

Bwà bwinè bwalu abu, mulùme wàlekela mukàjèndè wènza cintu aci, yèyè mmupìile misangu yìbìdì bwà cintu aci, bwalu yèyè ngudi nè cyà kwikala ewu udi nè cyà kwamba munda mwà nzùbu amu. Kàdi mulùme awu kèna nànsha mwà kukòkèsha nzùbu wèndè yèyè mwinè to; mmunyi mùdiye mwà kucyènza mu nzùbu wa Nzambi? Nwamònu anyi?

<sup>37</sup> Ndi nè kusàkidila kwàbúngi bwà kasùmbù kèètù kàà bakàji bàdi bàlwa mwab'ewu aba. Ndi ngàmba nùnkù nè kaneemu nè dinanga, nè mpindyewu, Nzambi mmumanyè nè eci mbulelèlè. Mvwa—mvwa nè ciibidilu cyà kwikala nè mulundà wanyi muyiishi ku Sud uvwa nè umwe wa ku èkèleeziyà yìvwa yimwèka mikezùke yínkadiku mumònè. Pa bìvwa bitàngila bakàji, bakàji balengalèngàayi bankaadiku mumòne basòmbe mwaba awu nè cijila cyònsò, nè difwànà dyà Nzambi, nè nsukì mile. Nènku mvwa ànu misangu yònsò nkàcila pàmvwà nya mu mwinè èkèleeziyà awu. Kàdi Mukalenge Yesù mmupèeshe èkèleeziyà leelù ewu udi mutàmbe yèyè awu mu bule bwà kilòmèètà cinunu nè nkàmà yisambòmbò: bàkàji bà mu wànyì musùmbà.

<sup>38</sup> Ncyèna nnutàndisha bwalu ndi nè lwonji to; ndi ànu nè disànkà dyàbúngi bwènù nwènù. Ncyèna muswè bwà Sàtaanà kubwejayè dikàsà dyèndè mu mwaba nànsha wùmwe to. Nwamònu anyi? Ndi muswè bwà nwènù kuya muulu, kí nnwalukila cyànyimà nànsha. Kanùlekedikù muntu nànsha umwe ùnùseeswisha ku dikika kampàndà, anyi cintu kampàndà cikwàbò cyà mùshindù awu to, anyi cintu kampàndà wàmba nè: “Kaa èè, kacyéna. . .” Nwamònu anyi? Mùshindù awu ke

wùvwà Sàtaanà muumvwije Evà Dìyi. Nwamònu anyi? Nwènu itàbùùjaayi ànu cidi Dìyi dyàmba aci. Èyo.

**280. Byà lukàsàlùkàsà. Mwanèètù Branham, bamanyè bîmpè nè cìkòndò nčilumbìle ku ndekeelu nè twenda tuseemena ku cyendèlèlè, cyùdi mwà kufila bu mubelu kùdi mulùme nè mukàji bàdi bàdìlongolola bwà kubwela mu dibàkà ncinyi?**

<sup>39</sup> Tùngunukàayi nùbwelè mu dibàkà. Nwamònu anyi? Tùngunukàayi byenzè ànu bu nè nuvwà nè cyà kushààla kàbidì nè mwoyi pa buloba apa munda mwà bidimu bikwàbò lukàmà. Tùngunukàayi ànu cyanàànà; ikàlàyì batèèke mwoyi wènu pa Kilistò, kí mmyoyi yènu pa bintu byà pa buloba ebi to, kàdi pa Kilistò. Nwamònu anyi? Ndàayi ànu kumpàlà; nùsèlanganè, nwènu bânà. Nzambi ànùbènèshè mu mabàkà ènu awu.

**281. Mwanèètù Branham munanga, mèmè's ndi mubàtìjùbwe mu Dìnà dyà Yesù. Dìyi didi dyàmba nè nenùpetè kupà kwà Nyumà Mwîmpè. Eci cidi—eci cidi cyùmvwija dibàtiiza, Nyumà Mwîmpè, anyi cidi cyùmvwija nè ndi nè cyà kupeta dipà...disungùlùke...ndi nè cyà kupeta dilabula disungùlùke nè dibàtiiza anyi? Mèmè ndi nè mwoyi wùzùka bwà kwikala—bwà kuujiiibwa tètè nè—nè Nyumà. Bu wèwè mwà kuswà mfwilàku luse bwà bintu bile bìndì mufùnde bu mùmvwà njinga kukwela lukonko elu kùkaadi mukùngùlù mule. Twasàkidila. Nè muntu mwìnè ewu mmufùnde dìnà dyèndè. Mbantù bàà pambèlu pàà cimenga.**

<sup>40</sup> Mpindyewu, alu's ndukonko lwîmpè. Mpindyewu, dibàtiiza dyà Nyumà Mwîmpè ndilabula disungùlùke didi muntu nè cyà kwakidila. Mpindyewu ngànji ntòokeshè cyòci aci bwà katanci kakesè cyanàànà. Nwamònu anyi? Mpindyewu, bantu bààbùngì bàdi nè—nè cingenyinyeni...Ngèèla meeji nè ncikònyàngàle. Nènkù pàmwàpa ànu mwab'ewu mu èkèleeziyà emu nè kùdi èkèleeziyà udi munkaci mwà kutèlèje, nkufwànyine kwikala lukonko kampàndà. Mpindyewu, pàndi ngààkula bwà kubènga kwitabuuja nè cileeji cyà mbangilu cyà Nyumà Mwîmpè ndyakula dyà mu myakulu (Ncyèna—ncyèna ngiitaba aci to) ndi ngiitabuuja nè ku dikwàcisha dyà Nzambi ndi mwà kucijaadika mu Bible nè aci ncyà mafi (nwamònu anyi?), bwalu dyakula dyà mu myakulu ndipà dyà Nyumà Mwîmpè. Mbanganyi bàdi bamanyè nànkù? Dyondopa dyà kùdi Nzambi ndipà dyà Nyumà Mwîmpè, kàdi's baaMùyàpàndi's mbòbò aba bàdyènza. Nwamònu anyi?

<sup>41</sup> Sàtaanà ùdi mwà kutentula dyònsò dyà ku mapà awu. Baamwamùlopò, baloji bàdi mwà kwakula mu myakulu nè kuyàndamuna. Mu malaba à mu meetu mwàmwa, misangu yàbùngì muloji neàkule mu myakulu, kunwina mashi mu kabalùbalù kàà mutù wà muntu, nè kuumvwija myakulu myenyi.

42 Lwà mu Arizona mwàmwa díbà dídíbo bàja maja à kale à cibìlù cyà maja à matalà, ba-Indiens bàvwa badijingila nyòka milùme pàdíbo bàteeta bwà kulòmba Nzambi bwà kubàtùmina mvùla bwà kupetabò matalà. Bàdi bàcibìikila nè mmaja à matalà. Bàdi bàngata mwepu wà ditalà, bàdisomekawù mu cimònu cyàbò, nè bènza kaadivuba kakesè, nè bàja maja. Nè mwamulopò ùdi ùpàtuka nè nsèngu pa mutù pèndè, nsèngù yà mbowà; Nè bàdi bàja maja nè nyòka milùme eyi mibàjìngila mu cimònu, nè baloji nè banù bààbùngì bàà bishìbà byà mfwankà nè bikwàbò mu nyùngulukilu wa mwaba awu... Kabààdyàkulekela muntu mutòòke mu nyùngulukilu amu pa díbà adi to, kàdi nkàadi mubàtàngidile ku tulòndò twà mèsù àbidì, nè ndi nè balundà bàanyi bàà ba-indiens bàkaadi bayè ku maja àbò awu; bóbò abu ke bàdi kabàyi beena Kilistò to, mu bushùwà bwà bwalu. Nè bàdi bàja maja à matalà aa bakwàte nyòka eyi. Nè muloji ùdi ùpàtuka, nè ùditàpa nkààyèndè mpùtá nè twelè, nè bikwàbò byònsò, nè ndekeelu wa byònsò bàdi bàtuka mikishi, nè bàakula mu myakulu nè bàyàndamuna.

43 Ndi nè...ndi mufwànyine kunwàngata ànu munda mwà mèbà àsàtù anyi ànaayi kubangila ku mpindyewu, mwaba wikalà cilùmbù mwà kutèeka crayon pa mèèsà, nè kutùuka mukishi nè bintu byà mìshindù yònsò, nè kupeepa byanza byèndè; nènkù crayon awu neàjuukè kuulu kàdi neàfundè mu myakulu myenyi, nè muloji neyìmanè nè neànwàmbilè cìdici cyàmba aci.

44 Mpindyewu, aci kí ncileeki cyà Nyumà Mwímpè to. Nwamònu anyi? Kwèna mwà kweyemena aci to. Kwèna mwà kweyemena mamuma à Nyumà to, bwalu dimuma dyà kumpalà dyà Nyumà n'dinanga. Nè Beena Science Chrétienne bàdi bàtèeka dinanga mu cyenzedi kutàmba ní nganyì yònsò ùndiku mumanyè ewu, kàdi bàdi mene bàvila Bunzambi bwà Yesù Kilistò. Nwamònu anyi? Kùdi cileeki ànu cimwèpelè cyà Nyumà Mwímpè cìndi mumanyè, nè cyòci aci n'diitabuuja dishùwashùwàlè mu Díyì dilaya dyà díbà edì!

45 Mpindyewu, beena Yudà abu bàakalwa; bàvwa nè ntèndeelè mutàmbe uvwa nendè bayiidi awu. Bàvwa bantu bàà batàmbe kulongeshiibwa bímpè mu Mifùndù kutàmba mùvwà bayiidi, bwalu bàvwa balòbi, balàmbwishi bàà bitàdi, nè bikwàbò. Nè bàvwa nè diitabuuja dilelèlè nè diitabuuja dishùwashùwàlè mu civwàbo bènza aci. Mpindyewu, tèèlejàayi nè ntèmà yònsò mpindyewu; eci kacìnùpicikù to! Nwamònu anyi? Pàkaadibi bìkafika ku diikala mamuma à Nyumà, musàngèelu nè kalolo, ngèela meeji nè kakùvwa nànsha umwe wa ku baakwidi abo uvwa kàyi mwà kutàmba Yesù Kilistò ku ôwò awu to. Yèyè wàkaya ku ntempèlù, nè kulukayè myonji, kubàtàngilaYè nè ciiji, nè kutònkolaYè mèèsà àbò, è kubipata mwaba awu. Ncyà bushùwà anyi? Bible mmwambè nè Yèyè wàkabàtàngila nè ciiji. Bible ngudi mwambè nànkù. Ncyà

bushùwà menemene.

<sup>46</sup> Pa nàнку nwamònu's, baakwidi abu bàvwa nè kalolo, nè bupòle, bantu bàà luumvu. Pààkafikàbi ku mamuma à Nyumà, bàvwa mwà kuleeja mamuma à Nyumà àbũngi kutàmba mùvwà Yesù mufwànyine kuàleeja. Pààkafikàbi ku teolòjì, bóbò kabàvwa bamanyè. . . kabàvwa nè cilongelu cìvwàYe mupàtùkile to. “Muntu ewu udi ufùmina penyi? Mmulwile penyi's? Nkartà kaayi kàà buumambàlà kàdiyè naakù? Ngwa mu bulongolodi kaayi's? Katwèna bamanyè kùdiyè mufùmìne to. Kakùyì mpatà to yèyè ùvwa ànu muntu mwipata uvwa mulediibwe dileidiibwa dyà mu masandi. Mòna's, tudi bafwànyine kumushipa mwab'ewu mu tusuna tukesè emu nè kunùleeja ku mikenji. . . ” Nè bàvwa nè bukenji bwà kwenza cyenjìbo aci pàdìbi bikafika ku cyòci aci. Bwà cinyi? Bwalu bààkapanga kumòna nè Yèyè nguvwa Dìyi dilaya dyà dìbà adi. Mùshindù wùmwèpelè wàkadìjingululàbo, pààkakùmbajà Yesù Dìyi mu kwikala mukùmbàne bwà kubàmbila cìvwàbo naaci mu myoyi yàbò, cìvwàbo munkaci mwà kwenza aci. . . Yèyè ùvwa Mupròfetà bilondèshile Dìyi dyà Nzambi. CyàkambàYe cyàkenzeka, dìyi dyònsò, ku dìyi nè ku dìyi dyònsò.

<sup>47</sup> Yèyè ùvwa Mupròfetà, Musadidi wa Nzambi, Nzambi Mupròfetà. Kabiyi. . . Cìvwa—cìvwa—cìvwa kumpàlà kwàka, mupròfetà wa Nzambi, nè ewu n'Nzambi Mupròfetà, kí mmupròfetà wa Nzambi to. Awu ùvwa m'Maalàki, Yelèmiyà, nè Yeshàayi, nè Eliyà, nè bakwàbò, kàdi ewu ùvwa n'Nzambi Mupròfetà, kí mmupròfetà wa Nzambi to. Nwacyùmùvù mpindyewu anyi?

Bapròfetà bònsò bààkaleejà nsòmbelu Wendè mu bitùpà, bààkenza cyàbò citùpà, kàdi munda Mwèndè mùvwà kaabujimà kàà bapròfetà bònsò. Bapròfetà, Dìyi dyà Mukalenge dìvwa dilwa kùdi bóbò, bapròfetà abo, kàdi Ewu ùvwa Dìyi nè Mupròfetà, Muntu umweumwe awu. Nwamònu anyi?

<sup>48</sup> Mpindyewu, mpindyewu, pàdi muntu wàkidila Kilistò mu mùshindù wùdiYe ùsanganyibwa awu, kanwèna mwà kuciitaba bu nè ùvwa. . . Nwamònu anyi? Mpindyewu, bàmwè bàà kùdìbo bàdi bàmba nè: “Èè, mèmè ndi Luthérien.” Èè, kakwèna cintu cibi nànsha cimwè pa bwalu abu to, kàdi Mikankù yòyi kayìtu yìcidya to. Nwamònu anyi? Aci's cìvwa ànu mùvwàci amu; aci cìvwa cyàkudyà cibishi cyà ditùkù adi.

“Mèmè ndi mwena Wesley.” Aci's cidi ànu cìmpè, kàdi udi nè mwoyi mu matùkù àkaadi mapite. Nwamònu anyi?

Mpindyewu, bantu abu kwambabò nè: “Mòna's, twètù tudi nè Abraham bu tatwètù.”

Mupròfetà awu kwambayè nè: “Ku mabwe aa Nzambi ùdi nè bukolè bwà kujuudila Abraham bàna.” Nwamònu anyi?

“Twètù tudi bàà mu *cikampàndà*. Tudi bàà mu *cikansanga*.”

Acî kacivwakù nê cintu nànsha cimwê... Yêyê wàkamba nè: “Nwènù lukongò lwà nyòka, nganyî udi munùdimwije bwà kunyeema cijî cikolè aci? Kanùbangi kwamba nè: ‘Tudi nè Abraham bu tatwètù to’, bwalu ku mabwe aa Nzambi ùdi nè bukolè bwà kujjuudila Abraham bàna.” Nwamònu anyî?

<sup>49</sup> Pa nànkù kwikala mwena tèòlòjî mulongesha bilenga kakuvwa nè cyà dyenza mu bwalu abu to. Kwikala mupòle nè wa kalolo kakuvwa nè cyà dyenza mu bwalu abu to. CyàkaMuvwijà mushiilàngàne ncinyî? Yêyê ùvwa Dîyî divwijùbwe mubidi, kî n’Dîyî bwà ditùkù dyà Mòsà to, Mòsà ùvwa Dîyî, dyà ditùkù adi; kî n’Dîyî bwà matùkù à Noà to, Noà ùvwa Dîyî bwà ditùkù adi; kî nditùkù... Dîyî bwà ditùkù dyà Eliyà, Eliyà ùvwa Dîyî adi bwà ditùkù adi; kàdi Yêyê ùvwa Dîyî dyà dîbà dyà mpindyewu, kàdi bòbò’s bàvwa nè mwoyi mu matùkù à kale.

<sup>50</sup> Cintu cimwècimwê aci cidi cyènzuluka’s! Ke cileeji cyà Nyumà Mwîmpè ncyòci aci, pàdi Nzambi ùkubuulwila nè wêwè ucimòna, EMU MMÛDÌ MUKALENGE WÀMBA nè ùciitaba. Kî ncyùdi wêwè, cyùvwa aci, anyî cintu nànsha cimwê pa bwalu abu to, ncidi Nzambi mukwenzèle mpindyewu. Ke cileeji ncyòci aci.

<sup>51</sup> Yesù wàkamba... Yêyê mmutùpèeshe cileeji cyà Nyumà Mwîmpè, Yone 14. Yêyê nè: “Ndi nè bintu byàbùngî byà kunwàmbila. Ncyèna nè dîbà dyà kunwàmbilabi to, kàdi pààlwà Nyumà Mwîmpè, Yêyê neànwambilè, neànùvùlwijè bintu bîmwà Mêmè munwambile abi, nè neànùleejè kàbidi bintu bicìlwalwà.” Kanwènaayikù numòna anyî? Ke cileeji ncyòci aci. Acî’s ndidyànjila kwamba nè kwikala... kwikala nè Dyumvwija dyà kùdi Nzambi dyà Dîyî difùnda. Mpindyewu, aci kî ncileeji cyà mupròfetà anyî?

<sup>52</sup> Mwena lùmònu mu Bible ùvwa muntu uvwa mwà kudyànjila kwamba nè bivwa mwà kwikala bipwàngàne, pyòpyopyò, kî mmuntu kampàndà wàkamutentekela byanza to, aci ndipà. Mupròfetà mmudyànjila kulongolola nè mulediibwe bwà kwikala mupròfetà. Nwamònu anyî? Matuku èndè ònsò à mwoyi ùvwa mupròfetà, aci’s mmudimu. Ke mwaba wùdi bantu... .

<sup>53</sup> Nkonko yàbùngî mwaba ewu pa: “Èè, Mukàjî-musèla nèikalè...?” “*Cikampàndà* necikalè...?” “Èkèleeziyà nè...” Nwamònu anyî? Kanwena—kanwena nukùmbana kutàpulula cidìbo to. Mukàjî-musèla m’Musungula wa Nzambi. Èkèleeziyà ùdi ùpicila mu... Ke bòbò abu bàdiYe wàmbila nè: “Ewu yònsò udi muswè, àlwe.” Kàdi Mukàjî-musèla m’Musungula wa Nzambi.

<sup>54</sup> Kùdi midimu yìtaanu misungula kùdi Nzambi. “Bwalu Nzambi mmutèeke mu Èkèleeziyà bàpostòlò, bapròfetà, balongeshi, bampaasàtà, batangadiki.” Nzambi ngudi mwenzè aci. Muntu ùdi nè balami nè bikwàbò, nè bikwàbò byònsò, kàdi nudi numòna’s, kàdi Nzambi mmutèeke mu Èkèleeziyà bwà dipwàngaja dyà Èkèleeziyà; kèna mwà kucisùulakaja to.

<sup>55</sup> Mpindyewu, Nyumà Mwîmpè, pàdiYe ùlwa, Yèyè ùdi ntèmù kunùdi (nwamònu anyi?) nè Dîyi edî ndyà cyà bushùwà, Dîyi bwà leelù ewu, kí n'Dîyi bwà Luther to, Dîyi, kí mbwà Mòsà to. Tudi tujaadika nè Didi Bulelèlà, kàdi nditùkù dikwàbò.

<sup>56</sup> Mpindyewu, ambàyi bi tǔng bu Yesù mwà kulwa kàdi kwamba nè: “Mpindyewu, bu mǔvwà Mòsà mulwè kunùpàtula bònsò mu Èjiipitù amu, Ndi mulwè bwà kanùfikisha mwaba mukwàbò kampàndà”? Ambàyi bi tǔng bu Yèyè mwambè nè: “Lwâyì tǔyè tǔkiibàkè bwàtù kampàndà. Ndi—Ndi Mukalenge Nzambì, Ndi—Ndi ndèlemija buloba pa màyi mpindyewu. Ndi nshebeya buloba mu màyi, bònsò bwàbò”? Mòna's, Yèyè's ùvwa mufwànyine kwikala pambèlù pàà. . . Nwamònu's, kacya Mufùndu kawùtukù mwambè nè Yèyè neàlwe mùshindù awu to. Nwamònu anyi? Yèyè kàvwa mufwànyine kwikala Maasiyà awu to. Nànsha byòbi nè Yèyè ùvwa mwà kwikala mwibàke bwàtù bwà bishi, anyi cyònsò civwàYe mwenzè aci. Yèyè kèna ànu. . . Kàvwakù mufwànyine kwikala mukùmbànyine kwikala Maasiyà to. Àlèluuyàh! S'ki bwalu mbwòbù abu! Ndikùmbànyina! Èyowà's, mukalenge!

<sup>57</sup> Kolintò wa Kumpàlà 13 ùdi wàmba nùnkù ewu: “Pìikalà cidi cipwàngàne cilwè, cidi cyà citùpà necyùmushiibwè.” Pa nànkù bintu bikesè byònsò ebi byà kutùpika kuya muulu kupweka panshì bu mwànà mutekète ebi, kuteeta kwakula mu myakulu, nè bintu bikwàbò byònsò ebi, pìikalà cidi cipwàngàne aci. . . Nè ncyà bushùwà nè leelu ewu, ku dikwacisha dyà Nzambì, tudi nè dyumvwija dipwàngàne dyà Dîyi nè dishindika dyà kùdi Nzambì! Dìbà adi cidi cyà citùpà ncimanè kuya. “Pàncivwà mwànà, mvwa ngàakula bu mwànà, mvwa ngùmva bu mwànà; kàdi pàngaalu muntu mukolè, ngàkatèeka bintu byà bwànà abi ku luseke.” Amen! Ndi nditwa mu diyisha nènku dìbà adi ncyèna mfika ku bintu ebi to.

**282. Mwanèètù Branham. . .**(Ndi mujikije aci anyi? Ngàjikiji bwà dibàtiiza dyà Nyumà. . . Èyowà, abu bùvwa bu bujikè, kí mmwòmò anyi? Èyo. Mfwilaayikù luse, mèmè nciyi muyijikije to, nùmfwilèku ànu luse. Ndi. . . Eyi's nkonko milenga yà dikèma. Udi mufwànyine kushààla ànu bufùkù bujimà ebu ànu pa lukonko lùmwè cyanààna, mwanèètù, kàdi pashìshe kubènga nànsha kucilenga.) **Ndi nkwanýisha bu musadidi wa Nzambì, ditabuujà. . . nè ndi ngùtabuuja Mukenji wa Bulelèlà. Mukàjànyì kàtu muswè kungumvwakù. . . wàmba cintu kampàndà. . . ngàmba cintu kampàndà pa bìdì biitàngila Mukenji ewu to, nè kí mmuswè kutèèlejakù mukàbà wa mèyi nànsha wùmwè to. Ndi nè mijilu mintàndàbàle ku mudimu kwànyì kàbidì. Ndi muswè bwà mukàjànyì kwitabuujayè pèndè nè sambidilàku bânà bàanyì. Mwanèètù Branham, ndi muswè kwikala mulundà wa Nzambì. . . Ndi muswè kusanganyiibwa mu diswa dyà Nzambì bwà nsòmbelu**

**wanyì. Ndi muswè kwikala musadidi Wendè.** (Nè muntu awu mmufunde nè: “munyimà mwà dibèji.” Anji indilaayi kakesè.) **Pàncìvwà mwànà mukesè, mvwa ngàmabila muntu yònsò nè mvwa muswè kwikala muyiishi. Ncyèna mumanyè cidì Nzambì muswè bwà mèmè kwenza to. Ndi muswè kwenza cintu kanà cyònsò bwà Mukalenge. Ndi webè mu Mukalenge.**

<sup>58</sup> Mpindyewu, lukonko lwimpè. Nè muntu ewu ùdi nè meeji matòòke. Mukàjèndè, mwena dyèndè udi citùpà cyèndè awu. . . Ndikù mwà kusàkidila cintu kampàndà mwaba ewu ku cyòci aci anyi? Bânà bèètù, ndi ngàmba nùnkù mu Dîna dyà Mukalenge. Dimwè dyà ku matùkù àdi panshì aa, bu Mukalenge mwà kwanyisha, ndi ngèèla meeji nè nêngänji ànu kuya kumpàla nè kwenza mukàbà wà mèyi awu pa *Dibàkà Nè Difwà Dyà Dibàkà* (nwamònu anyi?), kuwùtwàla ànu mwab’ewu mu tabernacle emu. Cyòci mwà kulela ditàpuluka, neciikalè ànu nè cyà kutàpulula. Kàdi netùjaadikè nè n’Dìyi dyà Mukalenge.

<sup>59</sup> Tàngilàayi, bânà bèètù. Tèèlejàayi eci. Nudi bamanyè nè misangu yàbùngi nudi nupeta nyàneenù mubi pa buloba apa anyi? Mèsù kampàndà malenga à mafikùlùke, anyi à bleu, anyi makùnzùbile makukike mu mùshindù wà nè wèwè—Ùvwà kùyì nè cyà kwikala mutèèleje to. Bantu bààbùngi bàtù bàfika ku dyumvwa cintu aci.

<sup>60</sup> Muntu mulùme udi usèlangana ùvwà nè cyà kubwela mu bwalu abu dyàmbedi mu disambila dyà menemene. Kùvwà mwà kusungula mukàji bwà bulenga bwèndè bwà kwisù to, kàdi bwà bulenga bwèndè bwà munda, ewu wìkala mamwèndè wa bânà bèèbè.

<sup>61</sup> Ndi mumanyè nè eci necyùmvwikè cyà cyènza bwòwà bwà mwambi kwamba cintu cyà nùnkù mu cyambilu. Kàdi mvwa nè ciibidilu cyà kuya nè—nè basùmbi bàà ngombe pàmvwà ku Wesètè. Tuvwa tusùmba ngombe yà dimiinù, nè bàvwa bàjinga kubanga kumuna ngombe. Ke mèmè kuyiila byàbùngi kuntwaku nè. . . pàmvwà ntàngila bangèndàmùshìngà abu nè bintu bìvwàbo munkaci mwà kwenza, bóbò basùmbi abo. Mvwa nè ciibidilu cyà kuya nè mukùlumpè kampàndà, mmulwè naanyi mu èkèleeziyà emu, nè mèmè kumulombola kùdi Kilistò, ùvwà mwena dyabùlù wa munda nè paanyimà twamb’eku twamb’eku, Mukalenge Jeverez. Bàbùngi bàà kunùdi mbamuvùlùke, mwena bikùmbi byà ngombe byà mu Colorado. Tuvwa mwà kuyakù, nè bàvwa mwà kubwelamù nè. . . ngombe kampàndà.

Mèmè è kumòna kânà kàà ngombe kàà lukùngùlù kàà dimiinù ditùkù kampàndà kàpànyishiibwa ku ndola binunu dikùmi nè cìmwè; ànu kânà kàà ngombe nàka’s; kakàyi kanji kwela pa mpàngà to. Ke mèmè kwamba. . . nè Jeff kwambayè nè: “Bu mèmè nè mfrangà, mvwa mwà kuyitèeka mu kânà kàà ngombe aku.”

Ke mèmè kudyàmbedila nè: “Mpindyewu, yêyè ùtu mwena bikùmbì byà ngombe; yêyè ùdi ùmvwa mudimu wèndè ewu.” Mèmè nè: “Jeff, bwà cinyì bùdì mufwànyine . . . Ngiikàdilù kaayi ùdi ukèngediibwa? Yêyè’s ngwa Hereford. Kàdi udibò bàfùma ku disùmbisha ku ndola nkàmà yisàtù awu, bwànyì mèmè, ùdi ùmwèka bu lukùngùlù lutàmbe bunène nè bikwàbò byònsò.”

<sup>62</sup> Yêyè nè: “Tàngilà, Billy, kùdi cintu cìmwèpelè cyùdì kùyikù ùmvwa mu disùmbà dyà ngombe to.” Yêyè nè: “Ngèèla meeji nè bìvwa bikèngela bwà wèwè kwikala mulamàte njila webè wa diyiisha awu.” Kàdi yêyè nè: “Kwèna ùmvwa ngombe to.” Yêyè nè: “Mpindyewu, tàngilàakù kànà kàà ngombe aku kuntwaku.” Twètù kupweka kuntwaku. Yêyè nè: “Wamònu cilwinji cyà lonji cidi mu mèsù èndè amu anyi?”

Mèmè nè: “Èyo.”

Yêyè nè: “Bànà bèndè, nè biikùlù bèndè, ne biikùlù bèndè, biikùlù bàà biikùlù abu nebiikalè ànu nè lutàngilu lwà cisuku alu.” Ke yêyè nè: “Neyinyanè bibì be bwà ditàmbe kunyeemakana. Kayàakushàalakù maamù kùdi twànà twèndè twà ngombe to.” Ke yêyè nè: “Kwèna mufwànyinekù kuyidyundisha to; kayàadyàkupàtulaku munyinyi wà nsongu to.” Yêyè nè: “Tàngilà ùmonè kànà kakesè kàà ngombe kàdi kasùmbìshiiibwe aka. Tàngilà mùdiku kàmwèka kàà kalolo. Tàngilà ntàngidilu wa ditalala udi mwisù mwàkù amu, kakwèna cyà lonji mwisù mwàkù amu to.” Yêyè nè: “Neikalè maamù mulelèlè kùdi kànà kèndè; nè kùdi kànà kàà kànà kèndè, nè kànà kàà kànà kèndè nekàtùngunukè nè kwikala mùshindù awu.” Ke yêyè nè: “Bònsò bwàyì neyikalè bamààmù, bu bòbò mwà kupeta ngombe wa mpàngà wa mùshindù mujaalàme wà dimiinu bwà kànà kàà ngombe aku (nwamònu anyi?), bwà yòyì kulelayi twànà twàyì. Kàdi lutàngilu lwà lwonji alu mwisù nelwènzè misangu yònsò ànu cikùmbì cyà ngombe mikwàte nè byà luse, bu muntu yêyè ùteeta bwà kusùmba ngombe.”

Mèmè nè: “Èyowà’s, mukalenge! Twasàkidila.”

<sup>63</sup> Nè cintu cìmwècìmwè aci cidi kàbidì cyàngaciibwa bwà bakàji; Wèwè mukangàte umwe wa ku bàdì nè kwisù kulaaba bilaabu nè mèsù à cilunji cyà lwonji abu, ùmwèka ànu bu nyama wa mùshindù kampàndà, uteeta bwà kudyùmusha yêyè mwinè ku diikala muntu, kàakwenzaku cintu nànsha cìmwè to. Yêyè’s neàlalamanà dībā dyònsò. Nè bwena Kilistò kī mbulenga bwà pambèlu to, bùdi munda amu: wa ditalala, mupòlòbèle, kudilengeja mu nyumà wa ditalala, mupòlòbèle, cidi ciikàle cyà musinga munène kumpàlà kwà Mukalenge. Ke citùdi baswè kukèba kùdi bakàji, nè kùdi balùme, nè nànsha yêyè mwikàle nganyì. Mpindyewu . . .

**283. Mwanèètù Branham: Nkonko: Mukàji mwena Kilistò ùvwakù mwà kuvwàla bilengà bipepèle, bu mùdi masàngà**

**à mu nshìngù anyì mabwè à mushinga mukolè à mu nshìngù anyì?**

<sup>64</sup> Èè, Mwanèètù wa bakàji, ndi mumanyè nè eci cidi nè mushinga wàbúngì kúdi, nè cidi nè mushinga wàbúngì kúndi mémè bwà dyeyemena dyúdi wèwè ungeeyemena nè nenkwambilè bulelèlà. Mpindyewu vùlukàayi, Bible mmwambè nè: “Dìbà dyúdi udilengeja, kùdilengèji nè—nè bilengà byà mushinga mukolè nànsha, nè mabwè à mu nshìngù à mushinga mukolè to, nè mu divwàlà dyà mabwe ònsò à mu nshìngù à mushinga mukolè adi, kàdi ciikalè nyumà wa ditalala, mupòlòbèle, nè mupòle (úndi mfúma ku dyamba ewu), udi wa mushinga munène kumpàlà kwà Mukalenge.”

<sup>65</sup> Mpindyewu, ncyèna nswa kwamba ku cyòci aci, Mwanèètù wa bakàji, bwà nè bu wèwè mwikàle nè cikànù. . . Mpindyewu, ewu mmémè kí m’Mukalenge to. Bu wèwè nè cikànù cyúvwà muswè kuvwàla, ànyi busàngà bwà mu nshìngù bukupèèsha kúdi bàyeebè, anyì pàmwápa webè. . . cintu kampàndà cyà mùshindù awu cyúvwà muvwàle, mpindyewu, bwànyi mémè, ncyèna ngèèla meeji nè aci ncibi to. Mpindyewu, awu ùdi ànu mémè. Mpindyewu vùlukàayi nè, ndi ncitòkesha mémè mwinè; aci’s ngwanyì mmwènenù mémè. Kàdi ndi ngèèla meeji nè mbilàale ku webè mùshindù wà kumòna maalu; mbilàale ku mùshindù wúdi ucyenza. Nwamònu anyì? Nkiipàcilà kaùdi naakù pa cintu aci. Kàdi paùdi umòna nè cidi cikubàmbidikila panshì, dìbà adi tàpulukà nè cintu aci. Kàdi ndi ngèèla meeji nè wèwè mwà kuvwàla mpèta webè wa dibàkà. . .

<sup>66</sup> Mpindyewu, ndi mumanyè nè nwènú ba-Nazaréens, pa ciibidilu kanùvwa bafwànyine kubàtiiza mukàji mwikàle nè mpèta wa dibàkà ku munu to. Nwamònu anyì? Ncyèna—ncyèna ngìtabuuja, nè aci cidi nè mushinga to. Mu Bible bàvwa bàvwàla mpèta yà dibàkà, cikòlà cìvwa ncibwikilu mùvwàbo bàciibikila, cijingila ku mutù, ciikàle nè mabwe citèemà munda mwàci. Kàdi ndi. . . bwà kuleeja nè bàvwa basèlàngàne. Mpindyewu, ndi ngèèla meeji nè bìdi ànu bìmpè.

<sup>67</sup> Bakàji bòbò baswè kuvwàla nè—nè kwenza nè bàmwèkè byakànè, nè mankendà, bu bainàbànzà, mòna’s, ngèèla meeji nè kakwèna bwalu nànsha bùmwè pa cyòci aci to, bwànyi mémè. Kàdi paùdi uya bwà kuvwàla cintu aci mu kucìvwija ndambù wa maditàmishi, dìbà adi udi mupìile. Ndwidi lwèbè.

<sup>68</sup> Nwènú bakàji nudi bavùlùke mwaba ewu kí nkwanji kwenza ntántà mule to nè bàvwa nè cìvwàbo bàbiikila nè “jipè yà cilèndwishi” anyì? Ndi ngèèla meeji nè yidi yipàtuka kàbìdi, anyì bàdi nè yà mitàmbe kubiipa. Miikàle. . . Eyo, yidi yà, “cilèndwishi” mpindyewu, pamutù pàà, “cilèndwishi.” Kàdi bàvwa nè dinàya kampàndà àbìdi àdi panshì aa. . . Bàvwa nè bansongàakàji, bakàji batekète. . . Nènku mu bushùwà bwà bwalu, bakùlumpe abu bàvwa mwà kucyèna pààbò, bwalu

mbaswè bõnsò kwikala bansongà. Ncyéna nzwàmba nwènu bânà bèètù bàà bakàji to, ndi ngàmba bakàji bàà pa buloba. Nènkù bàdi bàkòsa jipè yàbò—yàbò lwà kuulu eku, yipacila ku centimètres makùmi àsàtù nè citùpà lwà kuulu eku musangu wõnsò, pashiishe kulwàta cilàmbà kampàndà cyà mwĩnshì cimwèka cilenga. Kàdi díbà dídibo bàswa bwà kwela cidya, cívwa cifwànyine kuleeja cilàmbà cyà mwĩnshì eci nè màlendà, nè bilengejilu, anyì ní ncinyì cívwbò batentèkepù. Ciinè aci, nudi bamanyè. . .

<sup>69</sup> Kùvwa mwànà wa—wa bakàji kampàndà wakalwa kùndi, uvwa mwànà wa bakàji wa ba-Dunkard awu, ùvwa ùfùma ku dipeta Nyumà Mwĩmpè. Ùvwa wa mu Assemblées de Dieu, nè aci cívwa mmu Fort Wayne, mu Indiana, múmvwà musèlèle amu. Ke kulwayè kùndi, inábànza mutekète mulengèle maalù, ke kwambayè nè: “Mwanèètù Branham, ndi muswè nkwelèku lukonko.”

Mèmè nè: “Èyo, Mwanèètù wa bakàji, ncinyì ciinè?”

Yèyè nè: “Udi wela meeji nè mbibi bwà mwànà wa bakàji—mwànà wa bakàji mwena Kilistò kulwàtayè ‘jipè cilèndwishi’ anyì?”

Mèmè nè: “Mwanèètù wa bakàji, eci’s ncintu cimwèpelè cìndi—cìndi ncìyi ànu mwà kuumvwa to. Kàdi ‘jipè cilèndwishi’ ke cinyì’s?” Ke kungambilayè cívwayè. Mèmè. . .

Yèyè nè: “Ùdi ùleeja cívungà cyà mwĩnshì.”

<sup>70</sup> Mèmè nè: “Cinyì—ncinyì cìdi mu mukàji cìdi mwà kumufikisha ku dijinga kuleeja bilàmbà byèndè byà mwĩnshì kùdi mulùme kampàndà? Ncinyì cìdi cifwànyine. . . Ndikwàcisha kaayi—kaayi dídi mwànà wa bakàji mwena Kilistò ùpeta bwà kwenza cintu bu nànkù awu? Nudikù mwà kudífwànyikijila mwena Kilistò wènza aci anyì?”

<sup>71</sup> Mpindyewu, tàngilàayi, muntu mulùme, bwà pa bìdi bitàngila mubidi wèndè kakwèna cìdi cikòka ntèmà nangànangà to. Nènkù yèyè, yèyè mupàtùke cyàdi mùkìdi, kí nkufwànyine—kí nkufwànyine kwikala cilèndwishi to. Kí mbwà nè mèmè ndi ntwà ku cyà muntu mulùme to, kàdi bàdi. . . Nudi bamanyè nè—mmukàji wa mùshindù kaayi udi mwà kuteeciibwa kùdi muntu mulùme kampàndà udi mukòpòle mutèèlù wèndè nè muvwàle kàpùtulù anyì cintu kampàndà? Cintu kampàndà cinène cyà kale cyà mmwènekèlu wa wènza bwòwà, cimwèka cilèngulula cyèndesha ku mwoyi, ndi. . . cyènza bwòwà. Panùdi numòna bantu balùme aba pambèlu apa. . . Èè, ndi ngèèla meeji nè ncifwànyine kufikisha mukàji ku dilùka bwà kutàngila cintu bu nànkù. Bu yèyè mukàji awu nè. . . Kàdi mpindyewu, angàtaayi mukàji nùmutèkè mùshindù awu, awu’s ntempèlù mushiilàngàne. Nudi búmvwè anyì? Eyo.

<sup>72</sup> Kàdi ndi ngèèla meeji nè bwà pa cìdi citàngila masàngà à mu nshìngù, anyì. . . Mpindyewu, pawàditwà mu didimeta bilengà

pambidi pèèbè bu muntu mubwelè nè cyamù cyà nzembu mu nzùbu wa disumbishila bilengà udi kwĩnshì eku, Ndi—ndi ngèèla meeji nè. . . Nwamfwilààyikù luse bwà bwalu abu, ncìvwa nè meeji à kwamba cintu aci mùshindù awu to, kàdi aci—aci’s ncibi.

<sup>73</sup> Piikalàku cintu cyàkambìndululà dyàmbedi bwà kubèngangana nè wanyì. . . kungumvwija bundù bwà Amèrikè, cìvwa. . . Mvwa nsanganyibwa mu Suisse dīngà ditùkù, nènkù mèmè nè Mwanèètù Arganbright twètù kupeta mwaba mwĩmpè pabwĩpì nè Lausanne kutùvwà mwà kupeta munyĩinyi munène, mulenga wà kawüyì mifübà, wà bwalu awu bunène *ebu*, wà bujitu bwà grammes nkàmà yìsàtù nè makùmi àtaanu, ngèèla meeji, biipacila meeyà matwè ku makùmi àsàtù mu mfrangà yà beena Amèrikè. Kaa, tuvwa ànu bu bamfùmù! Ditùkù dyònsò tuvwa mwà kuya kuntwaku. Kàdi bòbò bònsò kuntwaku bàtu bànwa mvinyò, nudi bamanyè’s; màyi àbò kí mmĩmpè to. Kàdi mèmè ncìvwa muswè kunwà mvinyò awu to, pa nànkù mèmè kudisumbila kanzàbà kakesè kàà màyi mu. . . kafwànkoolò kàvwà nè màyi mataata. Ke mèmè kuya nè kanzàbà aku kwònsò kùmvwà nya aku. Ngèèla meeji nè bantu bònsò bàvwa bàdyàmbedila nè: “Nsongààlùmè wàwa ùdi ùdyàmbwila à wa wèndè mùshindù sungasunga.” Pa nànkù mvwa mukàkwàte ku cyanza. Twètù kupweka kuntu kwàka ku mwaba kùvwà byònsò—bàsùmbisha minyĩinyi eyi, kàdi dīngà ditùkù *Mandèmwàzèlè Amèrikè* kulwayè tàmakàtàmakà. Mu kàshinyì kàà Chevrolet modelè wà 28, ùvwa nè kànà kàà mbwa kasòmbe pa binù byèndè è kubwelayè naakù muntwamu, kàbìdì ùvwa nè ndambù wa. . . Bòbò bakàjì bàbìdì abu bàvwa nè ndambù wa bilengà byà mu nshingù byà dikemà, binène menemene, bintu bile, nè tudibu twà ku maci, nè bìvwa bilembèlèlè, bàvwa badilaabè bilaabu; bàà bwalu bùbìdì bwàbò bàvwa nè bidimu makùmi àtaanu, bakùlumpe bu mèmè kùnu. Kàdi pèèbè’s uvwa mufwànyine kwela meeji nè bàvwa baswè kwikala naabì dikùmi nè bitaanu. Kàdi cìdibo bàteeta kwenza ncinyì’s? Bàdi bàteeta bwà kwendesha màshinyì mu njila wa mwoyi batàngila mu lumwènù lwà cimònàànyimà, batàngila paanyimà ku cìvwàbo kale.

<sup>74</sup> Mpindyewu, mwena Kilistò kèna wenza aci to. Mwena Kilistò kèna ùteeta bwà kwikala cìvwàye kale aci to; kèna ùtàngila mwaba ùvwàye ùsanganyibwa awu to, ùdi ùtàngila kàyaayàye. Nwamònu’s, nwamònu anyi? Kùtàbaleedi cyùvwà cikondo cyà kale aci to; aci’s ukàadi mumanè kucipìta. Kwàdyàkwalukilakù ku cyòci aci nànsha; aci cìkaadi cipìte. Nènkù muntu kanà yònsò udi wendeshila màshinyì mu njila wa mwoyi wènda ùtàngidila mu lumwènù lwà cimònàànyimà nèapètè njìwù; nènkù ke muwìkalà mu njila wa bwena Kilistò ewu. Kùtàngidi paanyimà ku cyùvwà to, tàngilà ku ciwìkalà. Pòlò mmwambè nè: “Mpwa mwoyi bintu bikaadi bipìte abi, ndi nkolesha mutàngile ku kiipàcìlà kàà dibìikila ditùmbùke.”

<sup>75</sup> Mpindyewu, kàdi byàkakwenza bundù. Bàakatwàla kabwà kakesè aka, kàà kale kànunka mupùya mubi mwaba awu nè kukatèèka pa mèèsà's! Mpindyewu, aci's cìvwa mwà kulùkisha muntu kanà yònsò ewu's! Nè bènza maalu à lukutukutu nè kabwe aku ànu mwaba awu, bàkàshikika kuulu aku nè byanza byàbò, kàdi pashìshe bàvwa nè cyà kudyà kàbìdì ànu nè byanza bìmwèbìmwè abi's! Ke mwakididi wa ku cidìilu kulwayè mwaba awu, è kubàungeenayè cintu kampàndà. Docteur Guggenbuhl ùvwa naanyi; è kutwàdijayè mu tuseku, kutùmayè mutù wèndè ku luseke.

Mémè nè: “Ncinyi—ncinyi cidìye wàmba?”

Yèyè nè: “Mwakididi wàmbi nè: ‘Umùshaayi kantanyi aku!’”

Bòbò nè: “To, yèyè's mmwena Àmèrikè; mulekèlaayi.” Mu ngaakwilù mukwàbò nè: “Kì mmumanyè cidì cìmpè cyà kwenza to.” Nwamònu anyi?

<sup>76</sup> Pangààkayà ku Sant' Angelo ku Loomò (Mpindyewu, elàngànaayi meeji pa bwalu ebu.), ku Vatican mu Loomò, mu Italie, bàvwa batèèke cimanyinu kuulu ku Sant'Angelo nè: “Bwà bakàji beena Àmèrikè: Kumpàlà kwà kubwela mu nkità emu, bu nwènù mwà kuswà vwàlaayi bilàmbà bwà kutwà bafwè mushinga,” èkèleeziyà wa Kàtòlikè. Nwamònu anyi?

284. Lukonko: **Mwanèètù Branham, mpenyi pìikalà mwà kusanganyiibwa Mukàji-musèla pìikalà buloba mwà kutùdika nè kooshiibwa kubùtuka? Neikalè mu mwaba kampàndà bu mùvwà bânà bàà Izàlèlèlà bàsanganyiibwa mu Goshen pààkakùlukà bipùpù apu anyi? Mukàji-musèla neikalè pa buloba pàdì cyòci eci cyènzeka anyi? Byòbì nànkù, mpenyi? Nè Mukàji-musèla yònsò neikalè mu mwaba ùmwèpelè mu cikondo cyà Dyambwibwa anyi?**

<sup>77</sup> Mukàji-musèla, pààtaayikà buloba.. Cikondo cyà Dyambwibwa necìikalè dibiishiibwa dyà bafwè nè dikungwila dyà bàdì nè mwoyi, bwalu. . .pàmwè nè bàdì nè mwoyi, bwà Dyambwibwa kwenzekadi. Mpindyewu, kàdi Mukàji-musèla. . . Mpindyewu, nwamònu's, cìmwè cyà ku bintu ebi n'Dyambwibwa kumpàlà mene kwà Bukalenge bwà bidimu cinunu. Nè pàdì buloba bùteema bùbùtuka aci mpaanyimà pàà Bukalenge bwà bidimu cinunu nè paanyimà pàà Cilumbulwidi cyà ku Nkwasa Mutòòke. Nwamònu anyi? Bansantu nebìikalè basòmbèle kumutù kwà buloba pààlwà Sàtaanà kunyùngùlukila Cimenga cinangiibwe nè Nzambi kulòkesha kapyà nè soufre bifùmina mu Dyulu nè ùbàbùtula. Eyo. Mpindyewu, aci m'Mufundu.

285. **Kàbìdì, Mwanèètù Branham, ndi ngùitabuuja nè bìvwa bikèngela bwà mukàji kwikalayè ùkòkela bàyendè. Kàdi byòbì byenzè nè mukàji mwena Kilistò ìkalè nè mulùme ngènzàmpèkààtù udi kàyì nànsha ùbwela mu òmwè dyà ku masangisha èbè. . . kàyì ùlwa ku òmwè dyà ku masangisha èbè nè kàyì-. . . nè muswè bwà mukàjèndè ìkalè wènza**

**bintu, ùkòsa nsukì yèndè, ùvwàla tùpùtulù, nè ùya mu myaba yìdì kayìyì yìneemeka Nzambi, mukàjì ewu ùdì nè cyà kwikala ùkòòkela mulùme ewu mu mùshindù ewu anyi? Bu wèwè mwà kuswà umvwijàku elu byà bitàmbe kutòòka tòò, bu mùdì elu ndukonko lùdìbo beelela misangu yàbúngì.**

<sup>78</sup> To, Mwanèètù wa bakàjì, kwèna ukòòkela muntu wa mùshindù awu to. To nànsha byà kumòna lufù. Bwalu mu ebu bwalu neùshiyè bintu byònsò nè neùlamatè kùdì Nzambi. Mpindyewu, cintu eci. . . Wèwè muswè. . . muntu awu mmuswè kwikala nè mwoyi pàmwè neebè, nè wèwè mwikàle. . . shààla mwena Kilistò. . . Kàdì yèyè muswè kukufikisha ku divwàla dyà tùpùtulù, kukosa nsukì yèbè, nè kwenza bintu bikwàbò byònsò ebi, nè kuya myaba yìdì kayìyì yìneemeka Nzambi to, wèwè kèba dyàmbedi Bukalenge bwà Nzambi nè bwakàne Bwèndè. Kwèna muswikiibwe kùdì muntu wa mùshindù ewu nànsha. “Kàdì pàcìdìbì ànu nè,” mùdì Bible wàmba, “bu mùdì mukàjì musànkishiibwe nè mulùme musànkishiibwe bwà kusòmba pàmwè (nudi bavùlùke aci anyi?), bàlekèlaayi. . .”

Nènku mpindyewu, ebi, ncìwà mufùnde Mifùndu to, bwalu mvwa ànu mubyambùle cyanàànà (nudi numòna anyi?) kùkaadi ndambù wa tusunsa. Ndi ngàmbula lumwè ku musangu lùmvwà nciyi mupete dìbà dyà. . .

<sup>79</sup> Kàdì Pòlò wàkamba nè pàdìbo ànu. . . mulùme udi kàyì wìtabuuja mwikàle nè udi kàyì wìitabuuja. . . anyi mukàjì udi wìtabuuja anyi bikwàbò, mukàjì mwena kwitabuuja àshaalè nè mulùme mwena kwitabuuja, piikalàbì kabìyì bibèngangana nè Nzambi mpindyewu to. Piikalà mulùme awu musànkishiibwe bwà kusòmba nendè pàmwè. . . “Tùngùnukà, Munanga wanyì, pawikalà muswè kuya mu èkèleeziyà, abi’s mbìmpè; kàdì mèmè ncyèna nya to. Mèmè ncìtu ndiitabuuja aci to; ncyèna nè bwalu nànsha bùmwe bwà dyenzamù to. Kàdì wèwè tùngunukà; bidi ànu bìmpè.” Kàdì pàdiye wàmba nè: “Kwèna mwà kucyènza to,” mpindyewu aci cintu kampàndà cishìilàngàne. Kwèna muswikiibwe ku aci to dìbà adi; udi utàpuluka nè byònsò bwà Nzambi.

**286. Mwanèètù Branham, bidi (Tùmonèbi.) . . . bwà muntu udi nè—udi nè mwena dyèndè nè mwoyi, udiyè mushipè nendè dìbàkà musèlàngàne cyàkàbìdì kumpalà kwà kulwayè ku Mukenji ùdì mwà kuyiisha anyi?**

<sup>80</sup> Èè, mu Timòtè wa Kumpalà 3.2, panwikalà baswè kufùnda cyòci aci, nè Tiitò 1 too nè ku 6 (Mèmè ndi mucifùnde), ndi muswè nùbalèku cyòci aci bwà lukonko elu. Nwamònu anyi? Muntu yèyè—muntu yèyè ùjinga mudimu wà mwèpiskòpò anyi muyiishi (cintu kampàndà anyi cikwàbò mu èkèleeziyà), bikèngela ikalè ànu nè mukàjì umwèpelè cyanàànà. Ncyà bushùwà! Mwambi kampàndà. Mpindyewu, awu n’Timòtè wa Kumpalà 3.2, nè Tiitò

1 too nè ku 6. Mpindyewu, Tiitò 1 too nè ku 6, èyowà! Èyo. Mpindyewu, mònaayi nè Bible mmwambè nè muntu udi mwambi mu nzùbu wa Nzambi neikalè nè mukàji umwe. Mpindyewu.

**287. Mwanèètù Branham munanga, kùkaadi bidimu bitwè ku dikùmi Nzambi wàkatwilangana naanyi mpindyewu nè wàkangondopa cìvwa dipà dyà dinanga, anyi, kumbuulwila cìvwa dipà dyà dinanga aci, nè byà mwomùmwe dîbà adi disambila dyànyì mbwà...bwà mèmè kwalukila. Nèndìpetè kumpàlà kwà mèmè kufwà anyi? Bàyaanyi neúmuvwè Dîyi anyi, nè nebikèngele bwà ngènzè cinyi?**

<sup>81</sup> Aci's ndukonko lukwàbo. Mpindyewu, kwambayè... Mpindyewu, cidici apa, anyi nganyi...mmwambè nè: "Bàyaanyi," pa nànkù ndi ncinka nè ùdi nè cyà kwikala mukàji udi mwambè bwalu ebu. Mpindyewu, yèyè ùvwa mujìmjìe dinanga dyèndè dyà kumpàlà adi. Nwamònu anyi? Ùkaavwa—ùkaavwa mukwàte mashika mu Nyumà. Mpindyewu, Mwanèètù wa bakàji, pàmwàpa bu mùdi ànu ulwa mu èkèleeziyà nè wenza cidi cyà cijaalàme, kwèna mujìmjìe lupàndù lwèbè to, kàdi udi mujìmjìe disànkà dyà lupàndù lwèbè. Davidi wàkeela lubilà lukolè kùdi Mukalenge musangu kampàndà nè: "Mukalenge, ngalùjilè disànkà dyà lupàndù lwànyì." Wèwè ucidi ànu mwena Kilistò, kàdi ndi... cyùdi nè cyà kwenza, Mwanèètù wa bakàji, nkudisùulula ku bintu byònsò byùdi mumanyè abi, nè kukèba Nzambi, nè kusambila.

<sup>82</sup> "Bàyaanyi neàtelejè Dîyi, nè ncinyi cìndi mwà kwenza?" Ànu bu mungambi mu dindà emu, ikàlà wèwè ànu mutwè mukèlè: "Nudi mukèlè wà bàà pa buloba." Bàyebè neàbàngidile nsòmbelu webè wa cijila, nè mulùme udi kàyì wìtabuuja awu neàjidiibwè kùdi Mukalenge kùdi mukàjèndè udi wìtabuuja awu. Kèba wèwè ànu Mukalenge, shààla mudìpwekèshe, nè sambilà dîbà dyònsò, upèèsha Nzambi butùmbi, nè mwikàle nè kalolo kùdi bàyebè mu ntàntà yònsò udiyè ùjinga kusòmba neebè mu mùshindù awu.

**288. Bwà masangisha à mu dyàlumingu: Muntu mukàji yèyè mwenzè bwalu bubi nè...**(Mpindyewu, anji indilà kakesè; mbìmpè ncibalè dyàmbedi bwànyì mèmè mwinè. Nudi numònu anyi? "...nè muntu mulùme musèlè, ùdi ùnyingalala nè ùcìlongolola bilondèshile nè...bidi bìmukèngela bwà...kuya kùdi mukàji nè mulùme mwena bwalu awu anyi, nànsha mukàji ewu yèyè kàyì mumanyè cintu nànsha cimwè...") Èyo. Ebi bìdi ànu bìmpè.) **Muntu mukàji yèyè mwenzè cintu cibi nè—nè mulùme musèlàngàne, yèyè munyingalàle nè mucìlongòlòle kumpàlà kwà bàyèndè bilondèshile Mifundu, bidi bikèngela bwà kuyayè kùdi mukàji wa mulùme mwena bwalu awu, nànsha mukàji ewu kàyì mumanyè kantu nànsha kàmwe pa bwalu abu to; anyi**

**mmudimu wà mulùme awu bwà kumwambila bwalu abu dyàmbedi; anyi bìdi bikèngela yèyè kwikala mutàpiibwe ku mwoyi anyi? Mmu ntàntà bule kaayi wutùdi mwà kuya nè dilongolola dyà bwalu ebu pàdibo bwenjiiibwe bujike, nè pàdiku bulundà?**

<sup>83</sup> Èè, Mwanèètù wa bakàjì munanga, kùdi cintu ànu cìmwèpelè cyùdi mwenzè cìdi cyà bushùwà. Úvwa mukòndàkàne, mùndi ncinka, anyi muntu kampàndà ùdi wèwè mumanyè uvwa mukòndàkàne, mu cyenzedi cibi, nè wèwè uvwa mwangàte mulùme wa mukàjì mukwàbò mulààle nendè. Nènku paùvwà mwenzè cyenzedi aci, ke mwaba uwàkakùlukila kuumuka mu ngàsà webè; Pashiishe udi munyingalàle, nè kwèna mwà kunyingalala paùdi kùyi walukila kùdi mulùme ewu nè ucìlongolola to. Udi mwenzèjiiibwe bwà wèwè kwangata bàyeebè nè kuya kùdi mulùme awu, ke cyùvwà mwenzè. Nènku ke cintu cìvwà cikèngelà bwà wèwè kwikala mwenzè ncyòci aci; ke Mufundu ngwòwò awu, bìvwa bikèngela wèwè kwikala mucyenzè.

<sup>84</sup> Inábànzà kampàndà mmulwè kùndi àbìdi àdi panshì aa wa mu Louisville emu, bwà nè yèyè, bu nsongàakàjì, ùvwa ùpàtuka nè mulùme kampàndà kàdi—kàdi pashiishe yèyè. . . Úvwa mumanyè nè ùvwa wènzà bibì. Ke kuumukayè mu cimenga amu, kuyayè mu cimenga cìkwàbò kule menemene, nè kushintulula dīnà dyèndè, kusòmba nè bàmwè bantu. Nènku muntu ewu kumulundayè nè kumwambilayè pàakayàye kuntwaku apu nè, yèyè ùvwa nè byà kumubanda naabi bishindikiiibwe. Bìvwa bikèngela bwà kwikalayè ànu mukàjèndè wa ndumbà cyanàànà ùvwa nè cyà kubilondela bantu. (Nènku pàkaavwàye kuntwaku, ùkaavwa musèdiiibwe kùdi mwena Kilistò wa dipòkò.) Ke kwambayè nè bu yèyè kàyì mwenzè nànkù to, ùvwa mwà kwela cintu cyònsò patòòke, kumwenza mukaaka; ki bwà cinyi, mukàjì awu ùvwa nè cyà kusòmba nè balùme bàbìdi abu, ciinè aci wàkenza cintu cibi, pamutù pàà kuleeja maalu ònsò patòòke ànu ku mbangilu aku. Nènku ùvwa nè mwànà wa mu dibòkò, nènku mpindyewu, mwànà wa bakàjì awu ùkaadi nè bidimu bitwè ku dikùmi nè mwandamukùlù kàdi kàyì mumanyè nè nganyì wa kùdibo menemene udi tatwèndè to. Mpindyewu, kàcyenà ùtwà panshì to, ke maalu kumukolelawù. Mpindyewu, ncinyi cidiye mwà kwenza? Mémè nè: “Kùdi cintu ànu cìmwèpelè. . .”

Yèyè nè: “Mémè mwambile bàyaanyi, yèyè neàm̀bèngè; nè mémè. . .mwanaànyì wa bakàjì yèyè ànu mucimanyè, neàdishipè.”

<sup>85</sup> Ke mémè kwamba nè: “Wèwè mulamè bwalu abu munda mwà mwoyi wèbè, neùye mu ifèrnò. Mpindyewu, enza mùdi muswè amu.” Kùdi cintu ànu cìmwèpelè cyà dyenza, nkusukula bintu byònsò abi. Ncyà bushùwà menemene. Ikàlà nè meeji matòòke.

<sup>86</sup> Nudi bamanyè's, misangu yàbúngì mu bikèèna-kumòna, mùshindù wùtù bantu bàlwa, bakàji nè balùme; Nyumà Mwimpè ùtu ùkalula bintu bìdibo benzè mu lwendu lwàbò nè (nukàadi bacyūmwè nè bacimòne, nudi bamanyè's. Nwamònu anyi?), nè ùbàmbila bintu bìdì bikèngelà bwà bôbò kwenza.

Bôbò bàdi bàmba nè: “Èè, mémè—mémè's nkàadi mumanè kucilongolola nè Mukalenge.” Kàdi udi mwena dibànza kùdi bàyeebè anyi kùdi mukàjèebè bwà kuya kamwambila. Ncyà bushùwà. Udi nè cyà kucitonda.

<sup>87</sup> Mpindyewu, muntu ewu, pìikalàye nyéyè udi mupùile, mmucyènzè; mmuyè kùdi bàyendè. Mpindyewu, udi muditòokèshe wèwè mwinè, Mwanèètù wa bakàji, bwalu pankaci. . . Wèwè—wèwè uvwa mwende masandi kumpàlà kwà bàyeebè. Uvwa muyè kùdi bàyeebè nè muditòokèshe kùdi bàyeebè, pashìishe wèwè è kuya kùdi mulùme awu nè bàyeebè nè wèwè kuditòokèsha kuntwaku. Udi mutòokèshiibwe. Bàyeebe yéyè mutungùnùke nè—nè kujinga kusòmba neebè, aci ncimutàngile yéyè. Kàdi kí mmwenzèjìbwa to, kàdi yéyè—kàdi yéyè muswè kusòmba neebè nè kukufwila luse, díbà adi wèwè ikàlà inàbànza wa dipòkò bwà kùyì mwà kupùila kàbìdì ku cintu cyà mùshindù awu nànsha. Kàdi yéyè kàyì mukufwile luse to, díbà adi abu's mbwendè—abu's bùdi ànu bwendè yéyè sungasunga. Ùdi mwà kukwipata. Cyà bushùwà menemene.

<sup>88</sup> Kàdi mpindyewu, muntu mulùme ùdi mwenzè nendè maalu awu, mpindyewu, yéyè ke wàyà kùdi mukàjèndè nè kwangata mukàjèndè nè kwalukila kùdi. Ukàadi mwenzè cyùvwà nè cyà kwenza, mpindyewu ncyèndè cikondo cyà kwenza cyèndè citùpà. Nwamònu anyi? Citùpà ciibìdì. . .

<sup>89</sup> Mukàji ewu ùvwa mwenzè cyenzèdi nè mulùme kampàndà, nè ùvwa mwangàte bàyendè, mucitonde, nè muyè kùdi muntu awu nè mucitonde, nè mucilongòlòle. Mpindyewu, mulùme mukwàbò awu ùvwa pèndè muselàngàne; mpindyewu, ùdi nè cyà kuya kùdi wèndè mukàji nè kwalukila kùdi mukàji ewu. Díbà adi bìdì byònsò bimpè. Nudi bumvwè cìndi muswè kwamba aci anyi? Ncilongolola díbà adi. Kàdi pa kuumusha cyôci aci, newikalè ànu mupùile, nè munda mwà mwoyi wèbè wèwè newikalè mupùishiibwe.

<sup>90</sup> Mwawa nè muntu mukàji kampàndà ànu àbìdì àdì panshi aa kuntu kwàka uvwa nè cyôci aci kacya ku Mvità yà Kumpàlà yà Buloba bujimà. Ke yéyè nè: “Kaa, Mwanèètù Branham.” Ùvwa mutùile nkàmà yà ndola kùdi bangàngàbukà bàà maalu à mitù nè bikwàbò byònsò. Mwawa musòmbè mwaba awu mmubandila mu cibambalu amu. Meda ngwakalwa nendè kuntwaku. Ùvwa musòmbè mwaba awu ùvunga mùshwàlà mu byanza byèndè mùshindù ewu, kwambayè nè: “Ndi ngùmvwà nè buloba ebu bùdi bwàmba kutaayikè, nè mémè. . .” byònsò mùshindù ewu.

Mémè kushààla ànu musòmbe mwaba awu. Mémè kwamba nè: “Mpindyewu, kùdi cintu kampàndà bwà bwalu abu . . . Udi nè cintu kampàndà mu nsòmbe webè mwaba kampàndà anyì?”

“To, mémè ndi mulongeshi wa kàlaasà kàà Dyàlumingu.”

Mémè nè: “Èyo.” Mémè kushààla musòmbe mwab’ awu ndambù mutàngile. Mémè nè: “Ndi mmòna kàshinyi kakesè kàà mâyi à matàmbà, nè wèwè udi nè muntu mulùme wa nsuki yà mitòòkòloka, nè kàwulù kàvwa kàmbè kudikùma ku kàshinyi aku.”

. . . ? . . . Yèyè nè: “Kwàmbidiku muntu nànsha umwe aci to!”

Mémè nè: “Bàyebè ùvwa mu cilwilu mwinè musangu awu.”

Kubangayè kudila mwadi, kutupika nè: “Kwambidikù muntu nànsha umwe bwalu abu to.” Nwamònu anyi? Cìvwa munda menemene mwà kandondo kèndè kàà mwoyi amu. Yèyè nè: “Nkàadi mutondèle Nzambì aci kùkaadi ntàntà mule.”

<sup>91</sup> Mémè nè: “Kàdi anjì indilà kakesè. Kacya kùtukù mwenzèle Nzambì bibì to. S’udi mwenzèle mucipù wèbè wà dibàkà awu bibì. Udi nè cyà kwalukila kùdi bàyebè nè kulongolola cintu aci dyàmbedi.”

Yèyè nè: “Yèyè neàmbèngè.”

Mémè nè: “Nzambì’s ukaadi mukushiye nànsha bìshi. Nànku mpindyewu, ngwèpì ùdi muswè bwà kukubèngayè?” Mémè nè: “Ndà kùdiye.”

Ke yèyè nè: “Kaa, mémè—mémè . . . Yèyè’s mmufwànyine kwenza *cikampàndà*, kàdi mémè ndi nè bânà bàbidì.”

Mémè nè: “Èè, ki cyònsò cìndì mwà kukwambila ncyôci aci. Ngàngàbukà wa mitù katukù mupàtùle aci to, kàdi Nyumà Mwimpè mmubuulùle; nè ncitukù mwànji kukumòna to kacya bândela.”

Yèyè nè: “Aci’s ncyà bushùwà menemene!” Yèyè nè: “Èè, ncyèna—ncyèna ànu mwà kumwambila to.”

Mémè nè: “Èè, ndi . . . Ndi nè disànkà dyà mùndi mutwilàngàne neenù.” Mémè kuya mu cibambalu cikwàbò amu, ke kwalukilayèmù.

Meda kwambayè nè: “Mmuswè bwà ùbwelèmu cyàkàbidì.”

Mémè kuya kuntwaku; ke mémè kwamba nè: “Udi ukèba cinyi?”

Ke yèyè nè: “Mwanèètù Branham, ncyèna mwà kwambila bàyanyi bwalu abu to!”

Mémè nè: “Bàyebè mmuntu wa nsuki mifiike.”

“Èyo!”

Mémè nè: “Yèyè ùdi nè cintu cìmwècìmwè aci bwà kukutondela.”

Yèyè nè: “Kaa, bwà bàyaanyi to!”

Mèmè nè: “Mbîmpè ùye kamukeba bwà nùlwe mwab’ewu.”  
Mèmè nè: “Udikù mumanyè mukàjì *kampàndà*, utu ulwàta nkanzu wa mukùnzùbile, utu wenza mudimu mu birò *kampàndà* byà kùmpànyi *kampàndà* wa tùdyèndelandelà anyi?”

Yèyè nè: “Ncyà bushùwà’s!”

Mèmè nè: “Kabèèna bàmbùikila dîna *kampàndà* anyi?”  
“Èyo!”

Mèmè nè: “Mbingu yîbîdî mishààle eyi bàvwa basòmbe mwînshî mwà mucî wà muhenga nè. . . basòmbe mu kàshinyî kakesè kàà Chevrolet nè nombà *kampàndà*, nè bàvwa mu cyenzi cimwècimwè eci.”

Yèyè nè: “Bwà bàyaanyi to!”

Mèmè nè: “Èyo, ndààku ùkàmwangàte nùlwe apa.”

Kuumukayè. Ndambù wa tusunsa, ke bôbò bàdî bààlukila aba. Mulùme nè: “S’mbulelèlà!”

Mèmè kwamba—mèmè kwamba nè: “Udi umòna anyi? Mpindyewu ndààku ùkambilè Nzambî!”

<sup>92</sup> Kàdî dyàmbedi, paùdî ulwa ku cyoshelu nè uvùluka nè kùdî cintu *kampàndà* cidî kaciyî mu bulongàme to, anjî ndààku dyàmbedî ùkacìlongòlòle. Nènku piikalà elu luseke mu dipiilà dyà kubènga kwambila mukàjèndè. . . Ewu mukàjì yèyè mmumanè kuditòokeshà. Mpindyewu, abu mbulààle kùdiye nè bàyendè. Kàdî mulùme mukwàbò ewu nè mukàjèndè bàdî nè cyà kuditòokeshà mu bwalu ebu. Nè kwèna mwà. . . Nànsha bàmba nè cyùdî wenza ncinyî, necikulondè matùkù èbè ònsò à mwoyi too nè muwàcìtòokeshà. Kùdî ànu mùshindù wùmwèpelè wà kucyènzà: Nkucitonda. Cyôcì cikulamuna dikòbà pambidi pèèbè, cyenzà nànsha byà kumòna lufù. Ambà bulelèlà, dîbà adi ke wèwè kucyàkaja. Amen!

<sup>93</sup> Ndi mwà kuumvwa bààbùngî pa mukàbà wà mèyî awu bàmba nè: “Aci’s ncyà mafi.” Kàdî anjî citeetaayibî ànu musangu wùmwè kàdî nùmonàayibî ní kí mmwòmò. Èyo.

**289. Lukonko bwà mu dyàlumingu mu dîndà:** (Mfwîlaayikù luse bwà mùdici cikondo eci, kàdî. . .) **Ku musangu wà dipeta Nyumà Mwîmpè, anyî dibàtiiza dyà Nyumà Mwîmpè, kùdî dishiilangana anyî? Muntu ùdî wàkula mu myakulu anyî? Byôbî kabiyî nànkù misangu yònsò to, ndimwèneshiibwa kaayi didi dimanyike?**

<sup>94</sup> Èè, udikù mwà kudifwànyikijila maamù wetù ewu ùlela mwànà wa mu dibòko kàdî kàyî mucimanyè anyî? Bwà kubèngayè kucimanya ànu yèyè lungènyi lumujîmine. Ke mùdîbî nè kwèna mwà kupeta Nyumà Mwîmpè kùyî mwà kucimanya to. Kùdî cintu *kampàndà* cidî cyènzeka munda mwèbè amu. Nwamònu anyî? Kùdî cintu *kampàndà* cidî cikushintulula.

Ndongolwelu webè mujimà, ndongolwelu webè yònsò wa nyumà mmuvwijiiibwe cyàkàbìdì mupyamùpyà, nè wèwè ulwa cìfùkiiibwà cipyacìpyà mu Kilistò, mùdì Bible ùcìtèèka nè, *bufùki bupyabùpyà* mu Kilistò. Nudi bacimanyè.

<sup>95</sup> Mpindyewu, wèwè udi wamba nè: “Mwanèètù Branham, dìbà adi kwèna witabuuja nè bìvwa bikèngela bwà muntu kwakulayè mu myakulu bwà kupeta Nyumà Mwîmpè to.” Kì mbwà kujaadika nè yèyè ùdì nè Nyumà Mwîmpè to.

<sup>96</sup> Mvwa mwà kujinga nè cidimba cyònsò cyà mu èkèleeziyà wanyì cyàkulè mu myakulu. Ndi muswè bwà bôbò kwenza nànkù, nè bu. . . Ndi ngùtabuuja nè nwènu balòmbe Nzambì, Nzambì neànùpèèshèci. Kàdì lekèlaayi nnwãmbilè; ndi mumanyè bantu bààbùngì bàdì bààkulà mu myakulu kàdì kabàyi nè Nyumà Mwîmpè to. Nè kakwèna mwambi udi nè meeji matòòke kùdiye yèyè mwinè nè kùdì disangisha dyèndè kàdì wabènga kwambila disangisha dyèndè cintu cimwècimwè aci to. Dyabùlù’s ùdì mwà kutentula cyòci aci.

<sup>97</sup> Pòlò mmwambè nè: “Nànsha mèmè ngàakula mu myakulu yà bantu nè yà banjèlò, nànsha mèmè mufile mubidi wànyì bwà kwoshiibwawù bu mulàmbù, nànsha mèmè ngùm vwa maalu masokoka ònsò à Dìyi, nànsha mèmè mufile bintu byànyì byònsò kùdì bapèlè, nè bintu byònsò ebi, kàdì ncìyi nè dinanga to, ndi ànu cintu cyanààna. Ndi nè diitabuuja dyà nè ndi mwà kutentemuna naadì mikùnà nè bikwàbò; ndi ànu cintu cyanààna.” Ki pashìishe kwambayè nè: “Eci cidì cyà citùpà cìpì necyùmukè piikalà cipwàngàne aci cilwè,” anyì nè: “piikalà cidì cipwàngàne cimanyìshiiibwe.”

Mpindyewu, ndi nè lukonko pa bwalu abu. Ndi ntèkemena nè nèmfikèku dilòòlò edi, pa cyàkenzekà pàakakàngukà Bitampì apu. Nè ndi ngèela meeji nè pàmwàpa ciinè aci necicifikishè kunùdì pa lukonko elu.

**290.** Lukonko: **Mwanèètù Branham, citwènzà ncinyi? Cintu kampàndà ncingiikile mu mùshindù wà ncìyi mwà kubàfukamù to. Mu movù wà mabèji àpòòpoka mushààle ewu, mèmè kulòòta nè mvwa mujimine mu lusenga lutòòke. Kuulu kùvwa kwènda kùbwicidila; ncìvwa mwà kupeta njila wa mèmè kuyiila to. Cilòòtà eci ncishààle naanyì kacya ànu ku movù wà mabèji àpòòpoka mushààle ewu. Mpindyewu, mèmè ndi bu muntu wènda ùbuubuta mu mîdimà. Mwanàànyì wa balùme (E-r-v-. . .), Ervin, nè mukàjàànyì bàvwa mu cilòòtà cyànyì aci. Mpindyewu, bôbò pààbò bàdì mu mîdima amu. Tudi mu dishiikila—tudi mu dishiikila. Ndi ngùtabuuja nè Nzambì neàkuleejè cìdì—cìdì mu myoyi yetù mpindyewu. (Màndamù. . . Kaa, èyo.) Twètù bapiile anyì mu myaba ya mpèkaatù, twàmbilekù. Tudi baswè kwikala balongàme.**

<sup>98</sup> Ncyêna mumanyè inábànzà ewu to, kàdi ndi ndyùmvwà ànu bu nè wèwè mwikala kaaba aka, inábànzà, lutàtù lwèbè ndwòlò elu. Udi mulekèlè cintu kampàndà cìkwenzekela cìdì cibindùlùlè mijilu yèbè, bwalu kwikala mu *lusenga lutòòke* kùdì kùleeja “bukezùke nè bwakàne.” Kàdi udi ànu ulekela Sàtaanà ùkudimukila. Cìlòòtà cyèbè ncìleejè nè kakwèna cintu nànsha cìmwè cibi to. Udi ànu nè mijilu mibìndùlùke, nè mu kwenza kwà cyòci eci nè kwela meeji ku cyòci eci, udi munkaci mwà kuvwija dìkù dyèbè dijimà dibìndùlùke. Imanyikà kwenza nànkù; nanà wèwè makenji èbè mafila kùdì Nzambì. Cìlòòtà cyèbè aci cìdì cijaadika ku dyumvwija nè wèwè udi *mu lusenga lutòòke*. Byònsò bidi ànu bimpè. Ngwèwè, wèwè nkààyebè, udi mubindùlùke.

<sup>99</sup> Nè nwènù ànu balekela cidimba cìmwè cyà mu dìkù adi cibindùlùke, bidi biya kùdì cidimba cìdì cìlonda, nè cidimba cìdì cìlonda, nè katanci aka nudi bònsò nukòkangana nè nutungunuka nànkù. Nè cidimba cìmwè cyà mu dìkù cìdì cyèzà bu cyàpeci disalù bwà cintu kampàndà, cìdì cibìndulula mukwàbò, nè mukwàbò, nè mukwàbò, katanci aka anyi dìkù dijimà ndibìndùlùke. N’Sàtaanà. Dìbà adi pàdì cìmwè cyà ku bidimba cyà dìkù adi cisànka, cìdì cìfikisha bikwàbò ku disànkà pàmwè naaci. Pa nànkù muntu yònsò wa mu dìkù àteeta kwenza cyòci aci.

<sup>100</sup> Teetàayi, yònsò wa kunùdì nwènù bânà, bwà kukwàcisha papa webè, nè maman. Maman, wèwè. . . Papa, wèwè teetà bwà kukwàcisha bânà. Kanùlekedikù nyumà wa dibungama awu, udi kàyì wìitabuujà awu ùseemena pabwìpì neenù to. Nudi beena Kilistò. Nudi balediibwe kùdì Nyumà wa Nzambì. Nwènù nudi mukèlè wà bàà pa buloba. Nudi nè makenji mafila kùdì Nzambì. Nè Bible mmwambè nè: “Kwòkò kwikàlè butùmbi kampàndà, kwòkò kwikàlè bukòlè kampàndà, elààngànà meeji pa bintu ebi.” Kanwèdì meeji ku cintu cibi to.

Nènku Mwanèètù wa bakàjì, ndi ngèèla meeji nè ke lutàtù lwèbè ndwòlò alu, Mwanèètù wa bakàjì munanga.

Mvwa mufwànyìne kushààla pa cyòci aci ntàntà mule, kàdi bilondèshile cìmvwà mulayè, ànu tusunsa makùmi àbìdì cyanàànà. . . Ndi muswà bwà kwangata yàbùngì yà ku eyi. . . byòbì kabìyi nànkù to, yalùjaayi pa cibàsa nè nényangàtùlùlè cyàkàbìdì.

**291. Bàmwè bàtu bàmba nè Mwanèètù Branham m’Mwànà wa muntu. Mvwa ndyàmbidila nè Dikunji dyà Kapyà ke divwà Mwànà wa muntu. Ndi mutùpàkàne anyi?**

<sup>101</sup> Èè, alu’s ndukonko lwìmpè, lwìmpè lwà dikèma. Kàdi mémè ncyêna Mwànà wa muntu awu to, kàdi mwànà kampàndà wa muntu. S’ki dishiilangana dinène ndyòdì adi. Yesù Kilistò ùvwà Mwànà wa muntu awu, Mwànà wa Nzambì awu, Mwànà wa muntu awu, Mwànà wa Davìdì awu.

102 Mpindyewu, kabingilà kàdìbo beelèle lukonko alu pàmwápa bàvwa balwelè muntu ewu anyi bamwambìle, bwalu bantu bàdì bàmbala bu mwena lùmònù, nànsha mùntù kacya ncìyi. . . Ndi nè lukonko mwab'ewu ànu mùdìbo bààkula bibi menemene bwànyì pa bwalu abu. Nwamònu anyi? Kàdi ndi—ndi—ndi. . . wèwè—wèwè. . . Pàndì mbala nkonko eyi nenùmonè bwà cinyi ndi ngààndamuna bintu ebi mùshindù wùndi ngènza ewu. Too nè pàndì ànu menemene mulombodiibwa bwà kwenza cintu kampàndà (nwamònu anyi?), dìbà adi ki mèmè—mèmè kushiisha kwamba cìndi nè cyà kwamba. Kàdi adi dìbà kî ndyànji kùkùmbana to.

103 Pa nàнку mèmè ncyèna Mwànà wa—wa—wa muntu mwela maanyì awu to. Ncyèna ngàmbe mùndi mupròfetà Wendè to. Misangu yàbùngi nkààdikù mwambàmbe cintu aci dìbà dìmvwà ncìyi ngèèla meeji nè mvwa ncyàmbe to, ndwa kucyùmvwà mèmè mwinè pa mukàbà wà mèyi. Kàdi ntu ngaacyàmbe mîngà misangu, bwalu nwènù baswè kucyàmbe mu myàkù eyi, *mupròfetà* mu mwàkù wa Anglais ùdi ùmvwija ànu nè “muyiishi.” Muntu kanà yònsò ewu mmumanyè nàнку; angàtaayi nkòngamyàkù. Nwamònu anyi? *Mupròfetà* mbwena kwamba nè “muyiishi” mu nkòngamyàkù wa Anglais. Kàdi mu cyena Ebèlù anyi mu cyena Ngèlikà, *mupròfetà* mbwena kwamba nè “mwena lùmònò, ewu udi udyànjila kumòna maalu nè ùdyànjila kwamba maalu.” Kàdi mu dyumvwija dyà mu Anglais, *mupròfetà* ùdi ùmvwija nè “mwena lùmònò.”

104 Pa nàнку ncyèna muswè kudibìikila cintu nànsha cimwè to ànu mwanèènu wa balùme. Mèmè ndi mwanèènu, nè nwènù nùmbalè ànu bu Mwanèètù Bill, anyi Mwanèètù Branham, anyi cyònsò cyùdi muswè kwenza pa bwalu abu aci. Aci—aci—aci's ncilenga, aci—aci's ncìmpè be. Cyùdi witabuujà aci, ikàlà mudìlamìnè aci mu wèwè. Udi umòna anyi?

105 Nèнку mpindyewu, lukonko lukwàbò alu lùvwà lwà bìshi? Ndi mfika mu mùshindù wà mudìbwinkemù, ndi mpwà mwoyi cìvwà bintu abi. Lùmwè lwà kù yòyi lùvwà nè: “Mèmè mvwa Mwànà wa muntu awu anyi?” nè. . . S'ki lôlù elu ngèèla meeji. “. . . Mwànà wa muntu awu anyi Dikunji dyà Kapyà ke dìvwà Mwànà wa muntu awu anyi?” To! Dikunji dyà Kapyà n'Dilaabiibwa.

106 Dikunji dyà Kapyà. . . Mpindyewu, elu lùdi mwà kuya ndambù mu ndòndò pa kuumusha bwà bàmwè bàà kunùdi bàdì beena tèòlòjì, Docteur Vayle, pàmwápa Mwanèètù wa balùme ewu, nè bàmwè bàà ku bambi bàdì bafùmìne mu Arkansas aba, nè balundà bàànyì balenga bàdìku aba, bòbò abu pàmwápa mbamanyè.

107 Mpindyewu, Dikunji dyà Kapyà adi ke *Logos* wàkapàtuka mu Nzambì awu. *Logos* awu, udi mu bushùwà bwà bwalu cyambiibwà cyà kaabujimà kàà Nzambì. Pààkalwà Nzambì mu

mbùngakeenu uvwa Yè mwà ku Mwèka, Cìvwa ndilaabiibwa dyà Nyumà munène wàkapátuka awu, Ùdi ùdìpwekesha milongo, ùpweka, Nzambi, Taatù awu, *Logos* uvwa kumutù kwà Izalèlèlà awu, uvwa . . . Ùvwa wa cijila, kàvwakù mwà kutwàla mpèkaatù to. Kùvwa nè cyà kwikalala mulàmbù wà mashi mu Edènà mene. Pashìishe *Logos* awu kushààla Yè mubidi nè kusòmbela munkaci mwètù; nè mwaba wùvwà *Logos* ewu musòmbèle mu mubidi wà buntu, cìvwa ciikàle mulàmbù . . .

<sup>108</sup> Pàvwa muntu mwenjìibwe mu cimfwànyì cyà Nzambi . . . Nè pashìishe Nzambi wàkapweka mu cimfwànyì cyà muntu bwà kupikula Yè muntu; aci cyàkatwàla Nzambi nè muntu kaaba kàmwe. maulu nè buloba kuupukilanganabi è kutwànganabi mishiku ewu nè mukwèndè; Nzambi nè muntu bàakuupukilangana ewu nè mukwèndè bu Buutaatù nè buumwànà pàakalwa *Logos* mubidi nè kusòmbela munkaci mwètù.

<sup>109</sup> Yesù wàkamba nè: “Ndi mufùme ku Nzambi, nè Ndi nya ku Nzambi.” Ncyà bushùwà anyi? Paanyimà pàà lufù, dijiikiibwa, dibìikà dyà ku lufù, nè dibàndà Dyèndè, pàakangaciibwà mubidi bwà kutèekiibwawù ku dyàbalùmè dyà Nzambi . . . Mpindyewu, ncyéna nswa kwamba nè Nzambi ùdi nè cyanza cyàbalùmè to, Nzambi n’Nyumà. Kàdi ku *dyàbalùmè* mbwena kwamba nè “mu bukole nè bukòòkeshi bwà Nzambi.” Bwà nè mu Dìna adi cintu cyònsò mu Dyulu cidi cibìikidiibwa ku Dyòdi adi nè cìDìkòòkela. Bintu byònsò pa buloba mbibìikidiibwe mu Dyòdi edi nè bìDìkòòkela, Dìna didì kumutù kwà mènà ònsò, Yesù Kìlistò.

<sup>110</sup> Mpindyewu, *Logos* uvwa munda Mwèndè ewu, uvwa Nyumà wa Nzambi awu, Dilaabiibwa adi, ku ngàsà mujididi wa Mashi, mutwàle bânà bàábúngì kùdì Nzambi, bàdi balaabiibwe nè *Logos* umweumwe ewu.

<sup>111</sup> Mpindyewu, mu ditùkù dyà Mpenta Dyòdi dyàkatùluka, Dikunji dyà Kapyà adi, nè dyàkatapuluka mùshindù ewu, nè ndimì ya kapyà yàkasòmba pamutù pàà yònsò wa kùdìbo, kabìyi ndimì yàbò to, kàdi ndimì ya kapyà yàkasòmba pamutù pàà yònsò wa kùdìbo, kasumbu kasungula, kasòbola, kamanyìshìibwe kùdì Dikunji dyà Kapyà edi, bìleeja nè Nzambi ùvwa muDìtápùlùle mubwele mu muntu. Nwacyùmvù anyi? Nzambi, *Logos* awu, ùDìtápùlula ùbwela mu muntu! Nzambi, kí mmu muntu umwèpelè to, Yèyè ùdi mu Èkèleeziyà Wèndè wa buloba bujimà. Ke bwà cinyi Yesù wàkamba nè: “Byenzedi bìndì Mèmè ngènza nenùbyènzè pèènù, byàbúngì.” Mpindyewu, ndi mumanyè nè Roi Jacques ùdi wàmba nè: “bitàmbe bunène,” kàdi nkùdimwinu mulelèlà ùdi nè “nenwènzè *byàbúngì* bipìte ebi.” Nzambi ùvwa mukàngila nè mubùmbila mu Muntu umwèpelè, Yesù Kìlistò. Kàdi mpindyewu Yèyè mmukàngila nè mubùmbila mu Èkèleeziyà wa buloba bujimà wa Nzambi udi nè Mwoyi.

<sup>112</sup> Mpindyewu mene, pàdì Nzambi munkaci mwà kwakula neetù mu myoyi yètù apa, Yèyè ùdi mu Àfrikè, Ùdi mu Asie, Ùdi mu Mputu, Ùdi mu Angleterre. Mwaba wònsò wùdì beena kwitabuuja bàsangile pàmwè awu, ke Yèyè awu munkaci mwàbò.

<sup>113</sup> Mpindyewu, paanyimà pàà lufù Lwèndè, dijiikiibwa, nè dibàndà, nè dilwa dyà Nyumà Mwímpè, Pòlò mu njila wendè ùpweka, uvwa Shawùlà awu, mutàngile ku Damàsèkè awu, wàkabyànkudiibwa panshi kùdì Dikunji dyà Kapyà, *Logos* awu. Nè mwena Yudà awu kàvwakù mufwànyine kwikala mubiikile Dikunji dyà Kapyà adi nè: “Mukalenge” to, bu yèyè kàyì mumanyè nè Dìvwa *Logos* umweumwe awu uvwà cisàmbà cyèndè cyènda cilonda mu cipèèlà cijimà amu. Nwamònu anyi? Mpindyewu, awu kàvwa Mwànà wa muntu to, ùvwa *Logos* awu.

<sup>114</sup> Mpindyewu, tudi twamba eci nè kaneemu kààbùngì, nè dinanga, nè kaneemu. Nwamònu anyi? Bu mùdì Yesù Kilstò umweumwe awu makèèlèlè, leelù, too nè kashidi, nè kàbìdì nè mu matùkù à ndekeelu, bu mwàkadìbì kumpàlà kwà cikondo cyà Lotà, anyi mu cikondo cyà Lotà mu Sodomà, ki mwikalàbì mu ditùkù didì Mwànà wa muntu ùDìbuulula cyàkàbìdì, ùDìbuulula. Mpindyewu, mu matùkù à ndekeelu aa *Logos* uvwa pambidi pàà Yesù awu, mùdìYe mufùmìne ku cyôci aci mwalukile ku Dikunji dyà Kapyà cyàkàbìdì nè mmutùùlùke pa buloba bwà (Mvwa muswè kwamba cintu kampàndà, kàdì ndi ntàngila mukàbà wa mèyì awu. Kì mbafwànyineku kwitabuuja aci bu wèwè mwà kwikala mubàmbìle to. Kì ncifwànyine kwikala nè cìdici cishintulula to. Bòbò . . . Bantu kì mbafwànyine kuciitabuuja to, kàdì nèncitèèkè ku luseke), kàdì mupwekè bwà, bu dikenketa dyà cilumbulwidi cìdì munkaci mwà kwenzeka.

<sup>115</sup> Nènkù mpindyewu, Dikunji dyà Kapyà dinène edi didì dimwènèshìbwe kakùyì mpatà to nànsha ku byamù byà mpòngòlòfwatù byà maalu à mamanya, didì pa buloba apa leelù ewu . . . Ke fòtò waDì wàwa mukùdika pààpa. Ndi ngùitabuuja nè ùcidi ànukù, kí ncyà bushùwà anyi? Ùdikù anyi? Mujaadikìlbe ku maalu à mamanya à matàmbe bwímpè atùdì naawù. George J. Lacy, mfùmù wa FBI bwà tushoonyi twà byàlà nè mikàndà mifùnda, kwambayè nè: “Ndi mucibiikile mèmè mwìnè nè mbintu byà mu meejì, Révérend Branham, kàdì,” yèyè nè: “bukènkè mbutuutè ku dísù dyà lumwènu. Ndi mucitèèke mwìnshì mwà makènkè matàmbe kutwila nè muciteetè munda mwà matùkù ànaayi anyi àtaanu. Kàdì bukènkè mbutuute mu lumwènu. Nènkù lumwènu elu kalwàkukwàta dilonga dyà nsòmbelu to!” Mpindyewu, aci ncimanyìshìbwe.

<sup>116</sup> Dìbà adi tàngilàayi byenzi byà Cyôci aci. Cyôci, munkaci mwètù, cìdì cijaadika nè Yesù umweumwe uvwa musòmbèle mu Pàlèstinà awu, Nyumà umweumwe uvwa pambidi Pèndè awu mmubànde mu Mubidi kampàndà too nè mùdìYe mwalukila cyàkàbìdì bu Mutù, kùdìYe ùlwa katààtaaka bwà kunana Mubidi

awu. Amen! Mutù wùlwalwa ku Mubidi. Nwacyǔmvù anyì? Awu neikalè Mwànà wa Nzambi, Mwànà wa muntu, Mwànà wa Davidi, NDI awu, Rose wa Shalònà, Mbata wa mu Cibanda, Mùtootò wà mu Dìndà.

<sup>117</sup> Ncyèna Yèyè to; ndi musadidi Wendè. Nè Dikunji dyà Kapyà kí n'Yèyè to; Didi mu mmwènekèlu wa Nyumà (nwamònu anyì?) uvwa pambidi pàà Mwànà wa muntu awu nè mmulwè mpindyewu bwà kulaaba bânà bàà bantu maanyì, bwà kwaluja mudimu wà bwambi ànu mwàkambàYe menemene nè ke mwikalàbi, bwà Mutù wàmòna mwà kusòmba pa Mubidi bwà kulamakanabi pàmwè.

<sup>118</sup> Ànu mùdì—mùdì cipaapu cyà musàkà mùvwà Henòkà mwibàke amu. Nènku tudi tusangana mu cipaapu cyà musàkà aci nè, kabàakatèekapù dibwe dyà mùsongà to. Bwà cinyi? Dibwe dyà mùsongà dicìdi nè cyà kulwa. Bibàndilu mwandamutekètè mu—mu cipaapu cyà musàkà. . . Netùyiile cintu aci dīngà ditùkù, nè ndi muswè ànu bwà kunùleeja mùdici menemene cikùmbànàngàne nè Mifundu.

<sup>119</sup> Nènku mpindyewu, bu nwènu mwà kumòna pa kabèji kèènu kàà ndola umwe kàà Àmèrikè aku, dibwe dinène dyà mùsongà adi, pàdi dīsù, mbāmbāpu nè: “Citampì Cinène.” Necilwe.

Nènku mònaayi mabwe awu. . . Kùdikù muntu kaaba aka ùkààdikù kacya mufikè ku bipaapu byà misàkà mu Èjiiipitù anyì? Èè, bu nwènu mwà kumòna. . . Èyowà, mwab'ewu, kùdi byanza mabwe'awu bìdi byela muulu lwà paanyimà pàapa. Èyo. Òwò mabwe awu mmalàale muntwamu mu mùshindù mupwàngàne menemene, nè lusongo alu, mwaba wùdì mbwiku mwenze bu mu lusongo mwàci amu, pàdi dibwe adi dīlwa, nedīikalè bu dibwe dinène dyà mbongò dikùmbànàngàne ànu menemene naadi mwòmò amu.

<sup>120</sup> Mpindyewu, dibwe adi kí ndifwànyine kukùmbana pa cishimikidi cyà kwīnshì aci to, anyì kadyàkukùmbanangana nè cishimikidi ciibìdi anyì cishimikidi ciisàtù to. Nedikumbananganè ku lusongo lwà cishimikidi, dībà dīikalà nzùbu mujimà mulwè mukùmbànàngàne nè dibwe adi. Nè Yesù kèna mwà kulwa pàdi Èkèleeziyà kàyì mwànji, Mubidi wà beana kwitabuuja nè mudimu wà bwambi ùvwàYe musangu kampàndà mushiye nebikengelè bwà kwikalawù wùmwèwùmwè dībà adi bù mùvwàwu cikondo aci. . . Nènku dībà adi, aci cidi citwàla. . . “Bòbò kabàyi neetù kabàakuvwijiibwa bapwàngàne to,” mwàkambà Pòlò, mu Ebèlù 11. “Twètù katùyiku bòbò kabèèna mwà kuvwijiibwa bapwàngàne to.” Badi nè cyà kwikalà nè mudimu wà bwambi ewu bwà kjuula ba-Luthériens, ba-Wesléyens, nè bònsò abu munda mwà bikondo byàbò. Pàalwà cyòci aci, pīikalà citùpà aci civwà mikankù midisangishila. . . “Ànu mùdì mubidi amu ke mwàdisangishilà mikankù,” ke

cìvwà nkonko ayi. Kaa, s’mbipwàngàne ànu menemene. Ndi ntèkemena nè aci cyàndàmùnù ku lukonko.

**292. Mwanèètù Branham, Sàtaanà ùdikù mwà kukwàta mudimu nè dipà dyà myakulu anyi dyà cipròfetà mu muntu udi nè Nyumà Mwimpè anyi?**

<sup>121</sup> Alu’s ke lwîmpè lùdiku, kí mmwômò anyi? Èyowà’s, mukalenge! Byòbì nè. . . Bidi nè cyà kwikala bitàbaleela bikolè, bikolè menemene. Bu nwênù mwà kumòna mu Kolintò wa Kumpàlà 14.29, nwênù bàdi baswè kucifùnda abu. . . Nwamònu anyi? Muntu uvwa—uvwa mufunde eci awu kí mmufunde dínà dyèndè nànsha; mwambe ànu nè: “Nzambì àkubènèshè.” Nwamònu anyi? Mu Kolintò wa Kumpàlà 14.29 tudi tujandula nè dipà kanà dyònsò mu èkèleeziyà didi nè cyà kulumbulwishiibwa dyàmbedi. Nwamònu anyi? Bikèngela nùtabaleelè, bwalu nyumà mibi yidi yidifindamù. Bwalu vùlukàayi nè, mvùla ùtu ùlòkela pa baakàne nè babì. Mvùla wumwewumwe wuvwa mutùmìibwe bwà kubobesha blé awu wùdi wùbobesha bisoosà bibi, màyi àmwèàmwè awu. Mbanganyi bàdi bamanyè nànkù? Mpindyewu, aci’s cìvwà nè cyà kunùtòkeshila dimiinu dyà nyòka dībà adi, mùshindù wàkalwà mwànà ewu. Ndi nteeta bwà kulwàngata mwômò emu bwà kulwandamuna kumpàlà kwà dībà dyànyi kujikadi, kàdi ncyèna ndùpeta to: pa nànkù, mùshindù mwine ùvwà mwànà awu bwà bwalu bwà dimiinu dyà nyòka. Nwamònu anyi?

<sup>122</sup> Nzambì ùdi nè mukenji kampàndà. Mpindyewu, pa cyòci eci, mu mukenji ewu wà Nyumà wa Mwoyi ewu bikèngela nùtàngilè, bwalu Sàtaanà ùdi ùdifindamù.

<sup>123</sup> Nènku Pòlò, pàvwà cintu kampàndà cibuuludiibwà kùdi muntu kampàndà, bìvwà bikèngela kwikalakù balumbulwishi bàbidì anyi bàsàtù kumpàlà kwà kwambiibwaci kumpàlà kwà èkèleeziyà.

<sup>124</sup> Mpindyewu, kàbidì apa ndi mufwànyine kupàtula cyòci eci. Ndi mmòna wànyi. . . Ncyèna ngèela meeji nè Mwanèètù wa balùme ewu ùdi kaaba aka dilòòlò edi to, kàdi muntu kampàndà wàkeluwila muntu kampàndà uvwa mupàtùke mu tabernacle emu muyè mu èkèleeziyà wa Mwanèètù Junior Jackson. Yèyè nè: “Mmuyè munkaci mwà ‘nyuunyi mifwè.’” Kwènakù nè bundù bwà kwamba dīyi bu nànkù anyi? Nànsha wèwè nganyi, pawikalà mwanàanyi mu Kilistò kaaba aka, udi umfwishisha bundù be. Kwènjikù cintu cyà mùshindù awu nànsha. Junior Jackson’s mmwanèètù. Don Ruddell mmwanèètù.

<sup>125</sup> Èè, kabingilà kàà bwalu abu nkàà nè, bwalu pangàakatèeka èkèleeziyà kaaba aka mu bulongàme kampàndà, pangàakalukila, bwà kumòna ní ndikù mwà kupeta dimwèneshiibwa dyà mapà, cyàbibidì cyà bantu cyàkuumuka mu èkèleeziyà ewu. Bwalu pawùvwà mwà kubanga kwakula, anyi kuyiisha, anyi cintu kampàndà, bìvwà. . . Bìvwà bikafika

mu mùshindù wà bilwa bikolè bwà wêwè kuyiisha kakùyi muntu kampàndà wàkula mu myakulu, muntu kampàndà wàndamuna, muntu kampàndà ùfila dyandamuna to; nè cyàbibìdì cyàbì kabìvwa nànsha byènzeka to.

126 Mpindyewu, mèmè ndi ngìtabuuja dyakula dyà mu myakulu. Mèmè ndi ngìtabuuja dyandamuna dyà myakulu, kàdi cìdì nè cyà kwikala cintu kampàndà cyà buludì cyambila èkèleeziyà, kabiyì nè: “Mukalenge ùlwalwa kàtàatakà,” anyi cintu kampàndà—aci’s ncimpè. Kàdi: “Kwènji dyambulula didi kadìyi nè mushinga to,” mwàkambà Yesù, “mùtù bampàngaanù bènza amu.”

127 Cìdì nè cyà kwikala cintu cyà nè: “Nda kambilà Mwanèètù *Kampàndà* cintu kampàndà cìvwaye mwenzè nè—nè cidìyè nè cyà. . .” “Mòna’s, nda ùkambilè Mwanèètù wa balùme, Mwanèètù wa bakàjì *Kampàndà* nè, pàvwaye mwenzè cintu kampàndà kuntu kwàka ditùkù adi, ùvwa mushipè mikenji kumpàlà kwà bàyendè. . .micipù kùdì bàyendè. Ànu yèyè mulongòlòle—mulongòlòle cyòci eci, Nyumà Mwimpè neàmumùshè.” Apu nudi nè EMU MMÜDÌ MUKALENGE WÀMBA!

128 Pashiishe kubweja mpèkaatù awu. Apu’s ke patùdì nè èkèleeziyà bu uvwakù mu cikondo cyàkabwelà Ananiyà nè Safilà aci. Dìbà adi tudi nè èkèleeziyà udi mwimàne mushindàme.

“Kaa,” mùdì wamba, “Mwanèètù Branham. . .” Mulùmyàna kampàndà, mèmè kumulondela bwalu abu; yèyè nè: “Èè, wèwè’s udi utùtèeka mu bwalu kashondo.”

129 Mèmè nè: “Mèmè ncyènà mu bwalu kashondo kùdì beenyi bāndi kacya nciyi mumòne kacya bāndela anyi? Kàdi ndi nè diitabuuja nè dyeyemena kùdì Nzambì wanyì Udi muntùme bwà kwenza cyòci eci awu, nènku musangu nànsha wùmwè kacitukù cyānji kwikala cyà mafi nè kacya dyàkwikala cyà mafi pādici ànu Nzambì to.” Ncyà bushùwà.

130 Kì ndyakula dyà mu myakulu nè bintu byà mùshindù awu to. . . Mèmè ndi ngìtabuuja nè myakulu ayi nè bantu bàdì nè mapà awu abu, bōbō biikàle beena Kilistò bashùwashùwālè nè bàsànkila mu cyòci aci, nebàtwilanganè bōnsò pām̀wè, bwalu. . . nè bafilè myakulu yàbò nè mandamuna àbò nè kumòna cìdìbò mwà kwenza bwà kuyiisha Bukalenge bwà Nzambì kumpàlà. Bàdì nè mudimu wà bwambi wàbò wà sungasunga, kàdi kí ngwà mwab’ewu munkaci mwà batèèleji emu mùdì—mutùdì tukwàta mudimu nè bangènzàmpèkaatù nè bikwàbò to. Bible mmwambè nè: “Nebāmbè nè kanwena balongèshìibwe to.”

131 Misangu mikwàbò bàdì bènda bàtamba kubùla kaneemu nè cyòci eci—nè bikwàbò. . . Musumbà wètù twètù wòwò kí mmubùla kaneemu to, kàdi ndi mubàlekèle bwà kutungùnukabo munda mwà cipòlù. Mèmè kwamba ne: “Citàngilaayi.”

132 Mpindyewu, mèmè kwambila bânà bèètù (kùdi bantèmu kaaba aka bàdi bamanye bwalu ebu), mèmè kwamba nè: “Cilekèlaayi. Paanyimà pàà katancì mèmè nèn—netùjandulè nè ncyà kùdi Nzambi anyi to. Yèyè kàyì mwà kutwàla dinyooka to, díbà adi mmwànà wa panshì.” Ke cyôci aci menemene cìdì Bible mwambè. Nènku pàakalwà dinyooka, cyàkenzekà ncyinyi? Mvwakù munwàmbile nànkù kùkaadi ntàntà mule anyi? Nwamònu anyi? Nùkonkàayi mpaasàtà ewu.

Yèyè nè: “Kàdi bishi bwà *cikampàndà* nè *cikansanga*?”

133 Mèmè nè: “Mulekèlaayi ànu cyanàànà! Bòbò mbânà bàà mu mabòko. Katwèna mwà kucilumbulwisha to, kàdi tàngilàayi díbà didìci menemene cìnwàngana nè Dìyì.”

134 Mpindyewu, Mwanèètù Junior Jackson ùwà nè bukenji bwà kubenga kwitaba cyôci aci. Yèyè mmuswè èkèleeziyà wendè. . . Bantu bònsò mbaswè kwakula mu myakulu nè bikwàbò mu batèeleji amu. Ayi ntàtù nyà Mwanèètù Junior; aci—aci’s ncìmutàngile ànu yèyè. Kàdi Junior Jackson ùdi witabuujà Mukenji ewu mùshindù wùm wèwùm wè wùdì. . . yònsò wa kutùdì witabuujà awu. Yèyè ngumwe wetù. Nènku kí “nyuunyi mufwè to” bwà diya kuntwaku to. Junior Jackson mmuntu wa Nzambi ùndì munangè nè mwoyi wànyì wònsò. Nè yèyè kèna apa dilòlò edì to, pa nànkù ndi mwà kubitùnkumuna mùshindù wùndì muswè dilòlò edì.

135 Nè—nè Don Ruddell. . . Ncyèna ngèèla meeji nè Don ùdi kaaba aka dilòlò edì to, bwalu bòbò bàdi nè masangisha mu èkèleeziyà wabò sungasunga. Kàdi mèmè mumòne muntu yònsò utu ulwa ku tabernacle ewu, ùpàtuka ùya kùdi Don Ruddell, anyi—anyì Mwanèètù J. T. Parnell, anyì Mwanèètù. . . yònsò wa ku bânà bèètù aba mwab’ewu bàdi bânà bèètù kaaba aka nè beena mwàbò bàà Bukalenge, Ndi mufwànyine kwikala nè disànkà dyàbùngì mu mùshindù wà ncyì mufwànyine kumanya cyà dyenza to. Ndi mufwànyine kwamba nè: “Mukalenge, ùjà ewu cyàkàbìdì. Tùmutùnkùmùnà nè tùjè mu kwàbò.” Ndi mwà kucinanga. Ndi mwà kunanga bwà kumòna nsongàalùme yààya. . . Bàdi bàànyì—bàànyì bânà.

136 Mpindyewu, J. T. nànsha—nànsha umwe wa ku bakwàbò abu kèna nè cyà kwitabuujà ànu mùndì mèmè ngitabuujà emu to; kèna nè cyà kwenza nànkù to. Ànu mùmwà munwàmbile mu dindà emu amu, ncyèna nànsha mpetangana nè mukàjàànyì to, anyì yèyè kèna ùpetangana naanyì to. Ambàbi tùng bu mèmè mwà kuya ku mèèsà nè Junior wàngata dyàmpà dyela pomme nè mèmè ngàngàta dyàmpà dyela cérise. Mwanèètù, tudyàdya bònsò dyàmpà, netupetangàne pa cyôci aci, kàdi. . . Nè twètù bònsò tudi tuiyishi Èvànjeeliyò umweumwe awu. Dikàzamuna dyà èkèleeziyà Wendè. . .

137 Nudi bamanyè’s, Peetèlò nè Pòlò bàwà nè tulumbùlumbù, kí mmu malongesha àbò awu to, kàdi mùshindù wùvwà Peetèlò

ùdítwàla yéyè's Bàvwa nè—nè dishiilangana dikesè mu cyôci aci, kàdi kacýàkabàtàpululakù to. Bàvwa bàna bàà muntu. Mòna's, ncyà bushùwà nè netwikalè nè mmwènenu mishiilàngàne, kí ndishiilangana to... Ndi mbèngangana nè beena Assemblées de Dieu. Ncìtu mpetangana nè ndongolwelu yàbò ayi, kàdi kùdi beena Assemblée de Dieu bààbúngì bàtù bàna bèètù bàà mushinga mukolè. Ncìtu mpetangana nè dilongesha dyà ba-Unitaires to, kàdi kùdi bààbúngì bàà ku bantu abu bàdi balùme bàà mushinga mukolè.

<sup>138</sup> Ndi mpetangana... mbèngangana nè ba-Baptistes, nè ba-Presbytériens nè ndongolwelu yàbò, kàdi mwómò amu, mùdi beena Kilistò bashùwashùwàle.

<sup>139</sup> Mu mùshindù kampàndà anyì kansanga mu mapingaja emu mémè kwambula mukenji wà ku nshinga. Mémè kuwùpangila. Mwanèètù wa balùme kampàndà, muiishi wa ba-Baptistes, mmwambè nè yéyè ùvwa mwà... ùvwa wènda ùkèba kùkaadi ntàntà mule bwà kulwa mu mwaba... anyì kufika mu mwaba wùvwà bantu bàneemeka Nzambì muntwamu pamutù pàà kuneemekanganabò muntu nè mukwèndè.

<sup>140</sup> Ke mwanèètù wa balùme wa mushinga mukolè utu ulwa mu èkèleeziyà ewu kwamba nè: “Nènyè neebè ku mwaba bu nànkù.” Ùvwa ùjinga bwà kufika apa, Baptiste. Nudi numòna's, mbatangàlake myaba yònsò. Ncyèna mufwànyine kwitaba ndongolwelu wabò awu to, kàdi ncyà bushùwà nè mémè ntu munangè...?... Pa nànkù kwàmbi aci bwà bàna bèètù to.

<sup>141</sup> Mpindyewu mwómò emu, mapà aa àdi... bikèngela kuàtàbàleela. Dipà nànsha dimwè... Bikèngela nùdìtàngilè. Sàtaanà ùdi mwà kutentula dipà kanà dyònsò edi. Tàngilàayi baaMùyàpàndì aba mpindyewu mùdìbo bènda bàtentula dyondopa dyà kùdi Nzambì: bàà bukooyà, bàà manyaanù, babolè, balediibwe mu ifernò. Nwamònu anyì? Èyo.

**293. Danyèlè nguvwa muntu mwinâyì mu cikùtù cyà kapyà bwalu yéyè nguvwa mupròfetà mu cikondo aci anyì?**

<sup>142</sup> To, ùvwa n'Yesù. Muntu mwinâyì awu ùvwa... mufwànàngàne nè Mwànà wa Nzambì. Ncyèna ngèela meeji nè ùvwa mmupròfetà to, bwalu yéyè ùvwa mu bwinà bwà ntambwe; kàdi ncìvwa—ncìvwa mufwànyine kwitabuujà nè Danyèlè ùvwa mu cikùtù cyà kapyà to. Ncyèna—ncyèna nè mùshindù wà... Mpindyewu, mwaba awu udi mufwànyine kwikala mubingè, kàdi dībà adi aci cìdi ànu mmwènenu wanyì mémè cyanàànà.

**294. Mwanèètù Branham, mu Genèsè 6 ku mvensà wa 12, Nzambì mmwambè nè mubidi wònsò wùvwà munyangakàjè njila wawù. Cyôci eci cìdi cìtàngila difwà dyà dibàkà nè dibàkà anyì? Byòbì nànkù, Yesù kààkaleedilakù ku cintu cimwècimwè aci pàakambàYe nè: “Ànu mwàkadìbi mu matùkù à Noà amu, ki mwikalàbi**

**kàbìdì pìikalà Mwánà wa muntu nè cyà kubuuludiibwa” mu Maatàayi 24, mvensà wa 38 nè wa 39?**

- 295. Mwanèètù Branham, nekwikalè bânà bààlèdiibwà mu Bukalenge bwà bidimu cinunu. . . Bukalenge bwà bidimu cinunu, bukòòkeshi bwà bidimu cinunu bwà Kilistò pànu pa buloba apa anyi? Anyi nekwikalè cimanyinu kampàndà pa buloba. . . nekwikalè mpèkaatù kanà yònsò (mfwìlaayikù luse) pa buloba mu ciinè cikondo aci; nènkù nekwikalè bantu pa buloba mu mibidi yà musunya mu ciinè cikondo aci anyi?**

<sup>143</sup> Nenteetè ànu bwà kuyàndamuna yònsò lùkàsàlùkàsà. Mpindyewu, mu Genèsè nshapità mwi<sup>6</sup>, mvensà wa 12, Nzambì mmwambè nè mubidi wònsò wùvwa munyangùke. . . Èyo, aci civwa ndibàkà, dishipa dyà dibàkà, nè bikwàbò byònsò. Bible mmwambè nè: “Ànu mwàkadìbi mu matùkù à Noà, mwàkasèlanganàbo, nè kusèleshangana,” nè bikwàbò byà mùshindù awu. Ke cimwè cyà ku bimanyinu byà cikondo cyà nshìikidilu ncyòci aci, ànu cimwè cyà ku bimanyinu.

<sup>144</sup> Mpindyewu, pìikalàbi nè ke cyònsò civwà bàà pa buloba bènza, ncìvwà mwà kucìbìikila nè ncileejì cyà cikondo cyà nshìikidilu to, ànu mùdìbi nè ncyèna mwà kubìikila dyakula dyà mu myakulu nè ncileejì cyà Nyumà Mwìmpè to. Ncyà bushùwà nè kùdì nè cyà kulwa cikondo cìdì dibàkà nè dishipa dyà dibàkà bìikàlè ànu menemene mwàkadìbi mu matùkù à Noà, kàdì kùdì bintu bikwàbò búngì cyanàànà bìdì byènda naaci; cidi ànu cimwè cyà ku bimanyinu.

<sup>145</sup> Nè dyakula dyà mu myakulu ncìmwè cyà ku bimanyinu byà Nyumà Mwìmpè, kàdì kí ncìmanyinu cìdì kacìyì mwà kupangila cyà Nyumà Mwìmpè to, ànu mùdì bakàjì nè balùme bàsèlangana nè bashipa dibàkà nè bàsèlangana cyàkàbìdì. Aci kí ncìfwànyìne kwikala cimanyinu cyà pelè to. Bu nè ke cyà pelè civwàku, ncìvwà mwà kucìbìikila nànkù to. Nwamònu anyi? Bintu bikwàbò bìdì nè cyà kwendela pàmwè nè dyakula dyà mu myakula anyi dipà kanà dikwàbò bwà kucìvwìja Nzambì.

<sup>146</sup> Mpindyewu nè: “Bânà nebàlèdiibwè munda mwà bukòòkeshi bwà Bukalenge bwà bidimu cinunu anyi?” Ke lukonko ndwòlò alu mu meeji àànyì, lùmvwà munwàmbìlè ditùkù adi. Ncyèna mumanyè to. Bidi bimwèka bikolè bu nè bàdì mwà kwikalàmù; bìdì bimwèka bikolè bu nè kabèèna mwà kwikalàmù to. Nèngìikalè neenù nè meeji matòòke ànu mùndì mumanyè mwà kwikala amu. Bwà mpindyewu ncyèna mumanyè to. Bu Nzambì ànu mwà kucìbuulula, nènnwàmbìlè. Kàdì indìlaayi; cidi nè cyà kufùmina kùdì Nzambì. Nudi bânà bàànyì. Ncyèna mufwànyìne kunwàmbìla to. Ncyèna mumanyè ní bìikalakù anyi ní kabààkwikalakù to. Ncyèna mwà kwamba to.

147 “Anyi nekwikalè mpèkaatù pa buloba mu ciinè cikondo aci anyi?” To! Kakwàkwikalala mpèkaatù nànsha umwe pa buloba to. Sàtaanà mmuswikiiibwe.

148 “Kàdi nekwikalè bantu pa buloba mu mibidi ya musunya mu ciinè cikondo aci anyi?” Èyowa’s, mukalenge! Netwikalè nè mubidi wètù mutùmbishiibwe ànu pa buloba apa mene, tudyà, tunwà, twibaka nzùbu, nè—nè—nè biikàle nè nsòmbelu ànu mutùdi nendè mpindyewu emu munda mwà bidimu cinunu. Cidi—cidi ndipèngama dyà Mukàjì—musèla nè Mubàki.

**296. Mwanèètù Branham, Yesù ùvwa ùmvwija cinyi mu Maatàayi 12, mvensà wa 32, mwàkambà Yesù nè: “Ewu yònsò udi wakula òyì dibi bwà Nyumà Mwímpè, kabààdyàkumufwiladi luse to, anyi mu buloba ebu, anyi mu buloba bùcilwalwà”?** Bu wèwè mwà kuswà ngumvwijèku mvensà yà Mifùndu eyi. Twasàkidila. Nènku didi nè dînà dyà muntu mulùme; yèyè’s mmwambi. Èyo.

149 Mwanèètù, ndi. . . wèwè udi mwena tèlòlòjì, kí mmèmè to. Kàdi ndi muswè kwamba nùnkù ewu nè, Yesù wàkamba nè: “Ewu yònsò udi wakula bibi bwà Nyumà Mwímpè kacỳàkumufwidiibwa luse to.” Mu ngaakwilù mukwàbò, bwà kucitèeka pàmwè nè Mifùndu mikwàbò ayi, “Mpèkaatù wa mùshindù ònsò neàfwidiibwè luse kùdi muntu, kàdi kupenda Nyumà Mwímpè kakwàkufwidiibwa luse kùdi bantu to.” Kupenda kwà Nyumà Mwímpè nkuMwelulwila, kwakula bibi Bwèndè, kuMupeetula, kwenza cintu kampàndà cyà mùshindù ki dîbà dyùdi usambuka mulongo ùdi pankaci pàà bwakàne nè bubì.

150 Mpindyewu, bu nwènù mwà kumòna Nyumà Mwímpè. . . Cileejilu, ambàbi tũng bu Nyumà Mwímpè mwà kulwa mwab’ewu ne kujingulula mùtùYè wènza amu, kàdi bu nè cívwa n’Nyumà Mwímpè, nè wèwè kùyì mwitàbùùje nè n’Yèyè to, nè wèwè kupàtuka nè kuMwelulwila nè kwakula bibi Bwèndè; Ciwikalàku mwà kwenza nànsha ciikàle cinyi, kwèbè nkujikè. Nè kwèna mwà kucyènzakù to. Aci cidi cijaadika ànu mwaba awu nè wèwè kwèna wa Nzambi to, bwalu Dimiinu dyà Nzambi ndisòmbèle munda mwà muntu awu nè yèyè kèna mwà kwenza mpèkaatù to. Kàdi mpèkaatù ncinyi’s? Bupidyà. Pàdiye ùmòna Diyì dimwènèshiibwe, yèyè neàDiiitabùùje. Nè yèyè ùdi mwà. . .

151 Nwamònu’s, kùdi mpèkaatù ànu umwèpelè, mpèkaatù ànu umwèpelè. Mbanganyi bàdi bamanyè nànkù? Mbupidyà. Ncyà bushùwà. Kwenda kwà masandi kí mmpèkaatù to. Kunwà kwà mfwankà, kwamba kwà mashimi, kudicipa, kí mmpèkaatù to. Abi mbyambiibwà byà bupidyà. Udi ubyènza, bwalu kwèna mwena kwitabuuja to. Ncyà bushùwà. Nànkù, nwamònu’s, kùdi mpèkaatù ànu umwèpelè, nè mwinè awu mbupidyà. “Ewu udi kàyì witaabuja ùkaadi mumanè kupiishiibwa.” Cidiye

wènza nànsha ciikàlè cinyi anyi cintu nànsha cimwè, yéyè mmupìshìibwe ànu kwìnè kwònsò aku. Èyo.

**297. Mwanèètù Branham, mbibì bwà nsonga udi kàyì musèlè— udi kàyì musèlè (kí mmusungùlùja to) bwà kukòsa yèndè... nsukì yèndè?** Ndi ndifwànyikijila nè mmuntu mukàji.

<sup>152</sup> Èyowà! Èyowà, mbibì—mbibì bwà mukàji kana yònsò kukòsayè nsukì yèndè.

Aku's kàdi ànu kakonko kakesè kipi. Nukàdi—nukàdi nwenda nuumvwa tulù anyi? Èè, netù—netùlwijakajè nè lùkàsà nè mwètù mwònsò. Mvwa nteeta bwà kupeta dimiinu dyà nyòka adi nè mwànyì mònsò.

**Sambidilàkù mwanèètù mulela wa balùme mu . . .**

Adi's ndilòmbà dyà disambila. Ndi mwambùle ànu eyi è kukùtula lubilu, ànu . . .

**298. Mwanèètù Branham, bakàji bàdi nè dyanyisha dyà kuya kukwàta mudimu myaba yà bantu bònsò pàdibo nè mulùme mwikàlè nè mubidi tumatuma nè bânà anyi? Ndi ngèèla lukonko elu bwà muntu mukwàbò.**

<sup>153</sup> Èè, mèmè—mèmè—mèmè—mèmè ncyèna mumanyè aci to. Ncyèna mwà kwamba to. Kàdi ndi—ndi ànu nè njiyà eyi's. Ngànji ngàmbe eci nùnkù: Ngèèla meeji nè, bu nè mvwa—muntu mukàji nè mumanyè nè bàyaanyi ùvwa nè mubidi tumatuma nè mwikàlè nè mudimu mwìmpè, wènza mudimu, Ngèèla meeji nè ncifwànyine kwikala di—disànka dinène bwànyì mèmè bwà kushààla kumbèlu, kukùba bânà bàanyi balela nè ngèenza . . . nè—nè—nè kukùba bânà bàanyi balela nè mbàkolesha, nè kunanga Mukalenge. Nè bu nè mvwakù nè díbà nànsha dikesè panyimà pà mumanè kusukula bilàmbà byànyì nè bikwàbò bìmvwà nè cyà kwenza abi, ndi ngèèla meeji nè ndi mufwànyine kulongesha bânà bàanyi mùshindù wà kukwàcila Mukalenge mudimu.

<sup>154</sup> Mpindyewu, wèwè nè di—dibànza anyi cintu kampàndà cyùdi uteeta bwà kukwàcisha bàyeebè bwà kucifutayè, anyi cintu kampàndà cidì cikèngela wèwè kwenza bwà . . . Èè, ngèèla meeji nè mbìmpè bu wèwè mwà kuteeta kumukwàcisha. Nè—nè wèwè mwikàlè nè nsòmbelu wa inábànza. Nè ndi—ndi ngèèla meeji nè mbikolè. Muntu nànsha umwe udi nè dyumvwa dímpè kí mmuswè bwà mukàjèndè kubwelayè mu musùmbà wà bantu, mùdi musùmbà wà bantu bàà bwakùlàvi, bàà manyaanù nè bintu byà mùshindù awu nànsha. Kàdi piikalàbi bikèngela bwà mukàji kubwelayè mu cyòci aci, ndi ngèèla meeji nè bìvwa bikèngela bwà yéyè . . . bìvwa bikèngela bwà bàyende ikalè mumanyè bwà nè mmukàji mwena Kilstò mushùwashùwàlà udi mwà kweyemenyìibwa, mukàji udi ukùmbànyina dyeyemena.

<sup>155</sup> Kàdi mpindyewu, bwà kwamba nè kabìvwa bikèngela bwà kwenzayè mudimu to, ncyèna—ncyèna mumanyè to. Nwamònu's,

kakwènaku Mufundu bwà kucitwa nyama ku mikòlò to. Ndi ànu—ndi ànu mfla wanyì mmwènu. Kàdi ndi ngèèla meeji nè mukàji yêyè muswè kwenza mudimu nè yêyè mwinè muswè kwenza mudimu. . .

<sup>156</sup> Mpindyewu, ncyà bushùwà nè ndi mbèngangana nè bakàji bàdi bàkwàta mudimu mu maabirò eyi mùdi balùme bônso beena kantu-ku-byanza aba. . . Bàdi benza maalu à lukutukutu, benza minèkù yà bundù ayi. Nènku mukàji kampàndà mulenga, mukezùke musòmbe mwaba awu, nè bintu byà bukooyà byonèke byônso ebi bimunyungùlùke mùshindù awu, ndi—ndi mbènga aci. Ndi ngèèla meeji nè nuwva nè cyà kupàtuka munkaci mwà bintu byà mùshindù awu.

<sup>157</sup> Kàdi mpindyewu, bu muntu mukàji mwà kudilama bu—bu inàbànzà mulelèlè nè ùteeta bwà kukwàcisha bàyendè bwà kwenza cintu kampàndà bwà kukumbaja ndambù wa bilàmbà byà bàna bwà kuya mu kàlaasà, anyi—anyi kufuta fàkitiilà, anyi cintu kampàndà cyà bwena aci, nè mmuswè kwenza mudimu too nè pààjikà maalu awu. . . Mpindyewu, eci kì m'Mukalenge to, bwalu ncyèna nè Mufundu bwà eci nùnkù to. Ndi ngàmba ànu nè aci ncifwànyine kwikala wanyì mmwènu; kàdi mu mùshindù mukwàbò, ncivwa ànu mufwànyine kwela meeji bwalu yêyè mmuswè ànu kwenza mudimu bwà kutàmbakana nè, anyi, kupeta mfrangà yàbùngi yà kutùula, ùnyeemakanangana eku nè eku, ùnyeemena ku binwinyi byà maala, anyi kunwà maalà, kunwa mfwankà, nè kwenza maalu à lukutukutu; ncyèna ngèèla meeji nè bìwva bikèngela bwà yêyè kucyenza to. Ndi ngèèla meeji nè bìwva bikèngela bwà kushàalayè kumbèlu, kuteeta bwà kwikala inàbànzà, nè kutàngila bwalu bwà nzùbu wendè.

**299. Bu Yesù mu diibìdi. . . (To!) Bu Yesù. . . bu wèwè mu dibàkà diibìdi mùdi bantu bônso bàbìdi bashipè dibàkà. . . cidi. . . ku (k-a-n-y-i-. . .) kanyinganyinga. . . kanyinganyinga nkakumbàne anyi nudi nè cyà kushipa, anyi, nudi nè cyà kushipa dibàkà dyènù adi bwà kwikala mu bulongàme?**

“Pawikalà—pawikalà mu dibàkà diibìdi mùdi bantu bônso bàbìdi abu bashipe dibàkà. . .” Ndi ngèèla meeji nè nkàadi mumanè kwandamuna cyòci aci. Nwamònu anyi? Eyo, nkàadi mumanè kwandamuna cyòci aci. Mùdi bônso bàbìdi abu bàdi—bàdi. . . Ndi ànu. . .

<sup>158</sup> Mvwa—mvwa kujinga nè katwikadi nè cyà kwakula pa bintu ebi to, balùmyànà. Ndi nè balundà basòmbe kaaba aka mene, mu batèeleji emu bândi mumanyè. . . Bidi bintàpa ku mwoyi byàmba kunshipa bwà kubyàmba, kàdi ndi—ndi nè cyà kubyàmba. Nwamònu anyi? Nè buloba bùdi búsanganyiibwa mu cinyangu cyà mushindù ewu.

<sup>159</sup> Mukàji kampàndà mukesè, mukwàte nè byà luse, wa kale ewu udi wenza cilèma nè ùsèdiibwa kùdi kanwàyi kàa maalà à kapyà nè—nè bàkashàala mùshindù awu, anyi mulùme

kampàndà wa wènzà nè luse mukasèla ndumbà kampàndà wa mu misèsù kàdi kàyì mumanyè to, nè pashìishe kushààla mulamàkàne nè mukàjì awu anyì nè mulùme awu mu matùkù àbò ònsò à mwoyi. Aci's ncintu cibì be. Dibàkà ncintu cinsantu.

Misangu yàbùngì bânà batekète bangènzàmpèkààtù bàdi bàdibwinkamù nè bènza byòbì bintu abi, kàdi pashìishe bàdikonka cìdì munkaci mwà kwenzeka. Ndi—Cìdì... Ndi ngèèla meeji nè, bu Mukalenge mwà kunganyishila bwà kuumvwija dibàkà nè dishipa dyà dibàkà edi mùshindù wùvwàbi bikèngela kwikaladi, Ndi ngèèla meeji nè necitookeshè cintu cyònsò aci. Cyònsò cìdì. . . [Katùpà kàà mukàbà wà mèyi munda mutupù—Muf.]

**300. Tudi tumòna... Mbwà cinyi katwènà mwà kusùmbisha nzùbu wetù? Twasàkidila. Tudi... P.S. Tudi basambile nè bajilè byàkudyà—kàdi—bwà kumusùmbisha, kî nkwanjì ànu kupàtuka bipeta nànsha.**

<sup>160</sup> Èè mpindyewu, Mwanèètù wa balùme anyì Mwanèètù wa bakàjì (kî mbafùnde dìnà dyàbò to), kàdi nànsha wèwè mwikàle nganyì, mpindyewu, pawikalà uteeta bwà kusùmbisha lupangu lwèbè nè mwenzè cyùdì. . . Udi muswè kulùsùmbisha nè pàmwàpa bwà kusùmbakù lukwàbò anyì cyònsò cyùdì muswè kwenza aci, ncyèna mumanyè to. Kiipàcìlà kèèbè kòkò kajaalàme, udi uteeta bwà kusùmba nzùbu. . . Wèwè nè bânà anyì cintu kampàndà cyà mùshindù awu, muswè kubàpetela nzùbu mutàmbe bwimpè anyì cintu kampàndà. . . Ncyèna mumanyè nè biinè byònsò abi mbinganyì to, kàdi ndi mufwànyine kwamba nùnkù ewu: Wèwè uteeta kulùsùmbisha, nè kujila kwà byàkudyà nè uteeta bwà kulùsùmbisha, dîbà adi lùlàmbùle kùdì Mukalenge nè ùbùpwe mwoyi. Nwamònu anyì? Bwalu mbifwànyine kwikala nè Nzambì. . . Udi mufwànyine kubwela mu mwaba kampàndà mukwàbò kàbidì, kàdi kawùyi mufwànyine kwikala wa mwimpè to. Nwamònu anyì?

<sup>161</sup> Wèwè mwikàle mwena Kilistò nè weyemena Mukalenge, bwalu ndi mutwishibwe ki cyùdì pàtupù kùvwa mufwànyine kujila byàkudyà nè kusambila to. Nwamònu anyì? Pa nànkù bu mèmè wèwè mwà ànu mufwànyine kulàmbula bwalu abu kùdì Mukalenge. Wamba nè: “Mpindyewu, Mukalenge, piikalà dîbà Dyèbè bwà twètù kulùsùmbisha dikùmbàne, Wèwè nèutùmè musùmbi kampàndà.” Dîbà adi ncilàmbùdìbwe kùdì Mukalenge, umùshà byanza byèbè pa cyòcì aci nè tungunukà. Ndi ngiitabuujà nè necikumbanè. Ndi mwenzè ànu bu muvukùte lùbilu kaaba aka bwalu ndi ngènda ngipatangana nè dîbà.

**301. Mwanèètù Branham, mbibì bwà muntu mukàjì kuvwijayè nsukì yèndè mwàngala anyì?**

<sup>162</sup> Nkàadi mumanè kwandamuna cyòcì aci. Bushùwà's, nànsha byòbì bishi, yilamà ànu mile. Nwamònu anyì? Ncyèna. . . Ndi mumanyè nè udi. . . Ncyèna nè meeji à kwikala “mwedi wa

minèkù” nè nwènu bâna bàà bakàji to. Nwamònu anyi? Aci’s ncyà meeji matòòke. Udi—udi—udi muswè kumanya, nènku ke wèwè kunkonka’s. Udi nè dyeyemena mu mèmè cyanààna kùvwa mwà kwikala munkonkè cintu aci to. Mpindyewu, ndi nè dyeyemena kùdi, Mwanèètù wa bakàji, bwà nè cìndi mufwànyine kukwambila, ndi ngiitabuujà nè udi mufwànyine kucyènzà.

<sup>163</sup> Ncyèna mwà kucitwa nyama ku mikòlò nè Mufùndu to. Wèwè muswè. . . Wèwè kuyi nè nsuki milenga, ya mvwàngala nè wèwè mwikàle muntu mukàji, udi muswè kumwèka mulenga bwà bàyeebè, bwà mulundà webè mulùme, anyi cintu kampàndà cyà mùshindù awu, mèmè—mèmè ncyèna mwà kukwambila pa bìdi bitàngila dyenza dyà nsuki mvwàngala anyi—anyi mmunyi mene mùvwàbò bacìbiikila’s wè, kuyèèla meekala anyi cintu kampàndà? Ncyèna—ncyèna nè cintu nànsha cìmwè cyà kwamba pa bwalu abu to; aci ncikutàngile wèwè. Nudi numòna anyi? Ndi—ndi. . . Wèwè udi ànu, pankaci pàà. . . Lòmba wèwè ànu Mukalenge cyà dyenza, Yèyè—Yèyè neàkwambile cyòci aci, bwalu ndi—ndi nteeta kuumvwija bintu ku Mifùndu. Nwamònu anyi?

**302. Bu wèwè mwà kuswà umvwijaku Kolintò wa Kumpàlà 13.8-12. Mpindyewu pàdi Dìyi dipwàngàne dyalujila Ekèleeziyà apa mvensà eyi—eyi mmyùle anyi?**

<sup>164</sup> Mpindyewu, ngèèla meeji nè ndi mufùme ku dicyàkula, kí mmwòmò anyi? “Nè pùikalà cidi cipwàngàne cilwè, cidi cyà citùpà necyumushiiwbwè.” Pòlò mmwambè nè: “Nànsha mèmè ngàakula myakulu ya bantu nè ya banjèlò, nè ngènda bintu byònsò ebi kaaba aka. . . Kàdi pààlwà cidi cipwàngàne aci. . .” Mpindyewu, kùdikù cintu cipwàngàne pa kuumusha Nzambì anyi? To, mukalenge! Nzambì ngudi mupwàngàne awu anyi? *Ku cibangidilu kwàkadi* [Disangisha didi dyamba nè: “*Dìyi*.”—Muf.] nè *Dìyi dyàkadi nè Nzambì, nè Dìyi dyàkadi Nzambì*. Dìyi dicitu ànu Nzambì. Nwamònu anyi? Èyo. Pàdi cidi cipwàngàne cilwè, cidi cyà citùpà aci ncyumùke.

**303. Mwanèètù Branham, mbibì bwà kwikala nè nsukì mibebwila lwà pamutù bu cisuba anyi?**

<sup>165</sup> Ndi ncinka—ndi ncinka nè ewu muntu mulùme; ndi—ndi ntekemena nè ke mùdìbi. Èè mpindyewu, bàmwè bakàji bàdi bènza nànkù’s. Cyà bushùwà. Mvwa ngènda nya mu bisè musangu kampàndà pàmvwà mukùbi wa nyama ya mwitu kaaba aka. Ngènda nya mwaba ewu. . . Mvwa musòmbe mwaba awu, nè muntu kampàndà ùvwa ùyiikila mùshindù awu, ùvwa nè kafulu kàà baansenda ku mutù, nè mvwa ànu munkaci mwà kuyiikila nendè. Nè yèyè awu ùvwa mutungùnùke wènda ùnwa mfwankà, ùvwa nè binetè byà baansenda bibàndisha mùshindù ewu. Kùvwa ndwà kuulu eku pabwìpi nè Sellersburg. Nènku mvwa musòmbe mwaba awu nyiikilangana nè mulùmyàna awu. Kwambayè cintu kampàndà mwaba awu, ke twètù bònsò

kudibwinka mu tuseku; mêmè kumutuuta cyanza ku mukòlò; Mêmè nè: “Balùmjànà wa yaaya, aci’s—aci’s ke cilenga ku byònsò, kî mmwômò anyi?”

Nènku mvwa musòmbe mwaba awu mùshindù ewu, ke—dyàkàmwè muntu mukàji mukwàbò—kampàndà musòmbe mwaba awu kwambayè nè: “Ambà tũng, Luutà, newikalè mwà . . .?”

<sup>166</sup> Ûvwa muvwàle cinsàlabeeta, ùvwa munène wa katankù, bu muntu mulùme, musòmbe mwaba awu munkaci mwà kunwà mucì wà mfwankà nè kupwidijila mwìshì mu dyùlù, mvwa ndyàmbidila nè ùvwa muntu mulùme. Ûvwa wàkula cintu kampàndà pa dimacisha dyà cimunyi cyà acétylene nè wènza cintu kampàndà, mutuutè muntu kampàndà pa mutù nè mumacishe *cintu kampànda*, kàdi kutwàdija kuseka. Mêmè è kuseka pàanyi nè kumutuuta cyanza pa cibelu, ngèela meeji nè ùvwa muntu mulùme; Ncìvwa mumòne dishìlangana to. Kwèna mwà kubàtápulula to. Nè Bible mmwambè nè: “Mukàji kanà yònsò udi uvwàla civwàlù cidi cikùmbànyine muntu mulùme, ncinyangu.” Ki bwalu mbwòbù abu’s.

<sup>167</sup> To, Mwanèètù wa balùme, wèwè muswè nsuki mibebula bu cisuba, nènkwambilè nè: wèwè indilà too nè pawàkùmbaja bidimu byànyì ebi, newùpetè cisuba aci. Pa nàнку . . . Abi’s mbîmpè. Ncyèna mwambè aci nè meeji mabi to, mulundà wanyì. Mwoyi wèbè wùbèneshiibwèku pawikalà wela meeji nè Mwanèètù Branham ùdi ùkwambila bulelèlè. Ncyèna ngèela meeji nè Nzambi ùdi wàmba cintu kampàndà pa bìdi bitàngila muntu mulùme to, cyèndè—cyèndè cibwikilu cidi ànu pàdiye ùkòsa nsuki yèndè. Yèyè mulekèle nsuki yèndè yileepa bu mùdi muntu mukàji, Bible ùdi wàmba nè bìdi bundù bwà muntu mulùme kwenzayè nàнку.

<sup>168</sup> Kàdi mpindyewu, bu wèwè—bu mùdi nè nsuki yèbè nè mwikàle mwàna mukèsè wa balùme . . . Nènku ndi mumanyè nè nkàadi mwambàmbe byàbũngi pa bwalu abu nè: “Nè nwènu, ba-Rickys, nè cisuba cyènu cyà nsuki milàndàkàna pampàla aci,” nè byònsò byà mùshindù awu, nè bintu byà mùshindù awu, kàdi ndi—ndi ngàmba ànu nàнку. Nwamònu anyi?

<sup>169</sup> Ncyèna—ncyèna ngèela meeji nè Nzambi ùtu ùcyùka mùdi muntu mulùme ùkòsa nsuki yèndè to, bu mudìbi ànu nè yèyè ùdi ùyikòsa, bwalu mutù wèndè n’Nzambi. Kàdi mutù wà mukàji mmntu mmulùme; ki bwà cinyì, mùkàji ùdi nè cyà . . . Nènku yèyè mukòse nsuki yèndè, ùdi ùfwisha mutù wèndè bundù. Dìbà adi mukàji udi mufwìshìibwe bundù ùvwa nè cyà kwipaciibwa ku dibàkà nè kutàpulukabo nendè. Ncyà bushùwà anyi? Pa nàнку mukàji yèyè mukòse nsuki yèndè, ùdi nè—bàyèndè ùdi nè bukenji bwà kùdi Bible bwà kumwipata bwà nsòmbelu mubi—muntu udi mufwìshìibwe bundù. Mbanganyì bàdi bamanyè nè aci m’Bulelèlè? Ncidi Bible mwambè, bwalu yèyè ùdi ùfwisha

mutù wèndè bundù. Mukàjì udi mufwìshìibwe bundù kabàvwa mwà kusòmba nendè nànsha.

**304. Mwanèètù Branham, pàakaakulà Yeshàayi nè bânà bàà bakàjì bàà mu Sìonà** (anyi mwakùle nè, mündì nswa kwamba nè, ndi ncinka nè ùvwa ùswa kwamba nè: “wàkula bwà”) **bânà bàà bakàjì bàà mu Sìonà bwà bikànù byà mu nsukì, dyenza dyà nsukì mvwàngalà, nè pamutù pàà kulongolola nsukì bímpè, mu mutù dibàla; pamutù pàà. . . Aci cìdi mwà kwangaciibwa bwà leelù ewu anyi Bible wa kale kacýèna nè bukolè bu mùdi bakwàbò bantu bàmba’s?**

<sup>170</sup> Bible wa kale ùtu misangu yònsò ànu nè bwenzeji, nè díyì dyònsò didì Nzambì wàmba didì nè bwenzeji. Eyowa’s, mukalenge! Cintu cimwèpelè cìdi cyènzèka pankaci pàà Bible mupyamùpyà nè Bible wa kale awu, cìdi ànu cidýundishe cyanaàna. Yesù wàkamba nè: “Nukàadi bumvwè bàmba nè: ‘Kwèndì masandi’ (bìvwa bikèngela bwà wèwè kwikala mwenzè cyenzi); kàdi Mèmè ndi nzwàmbila nè: ewu yònsò ukàtàngidi muntu mukàjì bwà kumwalakana wàmanyi kwenda nendè masandi munda mwà mwoyi wèndè.” Ebi mbintu byà bitàmba kukèmesha kaayipu’s wè!

Mpindyewu, bikèngela njikijè, balundà bàanyi. Dìbà dikaadi dyènda dipita ndambù. Mpindyewu, alu ndupitèpìte bule. Tùmonèbi ní ndikù mwà kubàkulakù cikwàbò cintu. Tùmonèbi tũng.

**305. Mwanèètù Branham, bìvwa bikèngela bwà bakàjì** (kaa, ekèlekèle!) **kulamabò nsukì yàbò mùshindù kaayi’s?**

<sup>171</sup> Kàbìdì, ànu mùshindù wònsò wùdi muswè awu. Timòtè wa Kumpàlà 2.9. Nwamònu anyi? Bakàjì bàvwalè mvwàdilu wa kalolo.” **Ndi muswè bwà—ndi muswè bwà kulama yànyi mu mùshindù wà ùsànkisha Nzambì.** (Nzambì àkubènèshè, Mwanèètù wa bakàjì munanga.) **Twasàkidila. Nzambì àkubènèshè. Tùsambìdìlèku.** Nè muntu awu mmufunde dìnà dyèndè.

<sup>172</sup> Sharon, bushùwà, Mwakùnyànyi wa bakàjì! Nzambì àkubènèshè. Ikàlà naayi ànu mile bule mùdiyi mile amu, Mwanèètù wa bakàjì. Mwànà mutekète wa bakàjì. Nzambì àkubènèshè, Munanga wanyi. Mbímpè, tũngunùka wèwè ànu nè kwenda kuya kumpàlà.

**306. Paanyimà pàà Mukàjì-musèla mumanè kwambwibwa nekwikalè bàà ku virgò mikùtākàne bààsùngidiibwa anyi nebàjiminè bònsò?**

<sup>173</sup> To! Nwamònu’s, byònsò nebìjikè bwà èkèleeziyà wa bàà Bisàmbà byà bendè pùumushiibwà Mukàjì-musèla pa buloba. Nyumà wa Nzambì ùdi wùmuka pa buloba: “Ewu udi mukooyike ùdi ùtũngunuka ànu nè kwikala mukooyike; ewu udi mwakàne ùcìdi ùtũngunuke ànu nè kwikala mwakàne; ewu udi wa cijila àtũngunukè ànu nè kwikala wa cijila.” Mu ngaakwilù mukwàbò

mwaba wà cijila ùdi ùshààla ùfwima mwíshì, mwaba ùdi Ndumbùlùlù wimana bwà kwakwila bantu. Kilistò ùdi ùmuka mu mwaba wà cijila; ditùkù Dyèndè dyà mutwàngaji dyàjiki. Dyambwibwa dìdì dilwa; Yéyè ùdi ùmuka mu mwaba wà cijila, ùpàtuka ùya nè wàngata Mukàndà wà Bupikudi, nè wùnana byònsò bìdìYe mupikùle. Kakùcyèna kàbìdì mudimu wà butwàngaji to. Mbanganyì bàdì bùmvwà aci? Ndi naaci pa cimwè cyà ku Bitampì—anyì cimwè cyà ku . . . Èyowà, Bitampì, ngèela meeji nè mmwòmu, Kilistò ùdi ùlwa bwà kunana mudimu Wendè wà butwàngaji.

<sup>174</sup> Mpindyewu, anjì indilà kakesè. “Virgò mukùtākàne neàsungidiibwè anyi?” To! Cyònsò cidi cimwenzekelà—cidi cyènzeka mpindyewu. Paanyimà pàà cikondo aci yéyè ùdi mu ngiikādìlù . . . Mpindyewu, nebikèngelè bwà kupicilayè mu Cikondo cyà Dikènga dinène. Nè kabingilà kàà cyòci aci nkàà nè, mbwalu mmubenge Difuta dyà cibawu mu kaabujima kààDì. Yéyè mmwena kwitabuuja, mwena kwitabuuja uvwa ùdyamba, kàdi nebikèngelè bwà kupicilayè mu Cikondo cyà Dikènga dinène. Bible mmwàmbè nè: “Nè bakwàbò abu, dragon wàkapwìdija màyi à mukana mwèndè bwà kuya kenza mvità . . .” Kàdi ndìbà kaayi diinè adi’s. Dyà . . .

<sup>175</sup> Kacya kakùtukù kwanjì kwikala cikondo kampàndà mu maalu malonda cyà nè èkèleeziyà yà ku dìnà mmilwè nè nzala yàbùngì bwà kupeta dibàtiiza dyà Nyumà Mwímpè to. Ndi—ndi ngàakula bwà Beena Kilistò bàà Kantu-ku-byanza. Ku musangu nè ku musangu, mba-Presbytériens, nè ba-Luthériens, beena Kàtòlikè, nè bònsò abu, Ba-Baptistes nkàmà nè nkàmà, Église de Christ, ba-Nazaréens, ba-Pèlerins de la Sainteté, ba-Adventistes du Septième Jour, yònsò wa kùdìbo bàkùngwila bàteeta bwà—bwà kupeta . . . Nwamònu anyi?

<sup>176</sup> Mpindyewu, eci ncintu cyà cìpapulangana. Bu nwènu mwà kuswà kanwàngacikù aci bu dilongesha to, kàdi nudi bumvwè cidi Mifundu myambè nè ncyènzekè pàvwà cyòci aci mwà kwenzeka anyi? Cikondo cyàkajika. Bwalu tàngilàayi, kùvwà virgò mwandamutekète, anyi, virgò dikùmi bààkapàtukà bwà katwilangana nè Mubàki, nè cyàbibidì cimwè cyà ku yòyi civwa nè maanyi mu myèndù yàbò, cyàbibidì cimwè cyà ku yòyi kacivwa naawù to. Ke citùpà cyà Mubidi cidi cifwè nè citùpà cidi nè mwoyi ncyòci aci. Yitaanu yidi nè meeji, dìbà divwàyi—pààkalwà lubilà nè: “Mònaayi Mubàki . . .” bònsò bààkalongolola, anyi, bààkabìika nè bààkalongolola myèndù yàbò bwà kubwelabò mu didyà dyà dibanjì. Kàdi pàakambà virgò mikùtākàne ayi nè: “Tùpèèshaayiku àmwè à ku maanyi ènù, myèndù yètù mmijime. (Nwamònu anyi?) Tùpèèshaayikù à ku maanyi ènù.” Bòbò kwamba nè: “Lekèlaayi aci, atùdi naawù mmatùkùmbàne ànu twètù. Ndaayi nùkaàsumbayi.” Kàdi pààkayàbo kaàsumba, Mubàki wàkalwa.

<sup>177</sup> Pààkapàtukà dīyī dyà patòòke, mukenji mukòbola wà

nè: “Mubàki ùlwalwa,” muntu yònsò ùvwa muswè kwikala mudilongòlòle, nè lùkàsà lwònsò. Aci kí ncikondo cidì mufundu wùsanganyibwa ku cimanu anyì?

<sup>178</sup> “Kaa, tudi baswè dibàtiiza dyà Nyumà Mwîmpè.” “Tudi baswè *cikampàndà*, *cikansanga*, anyì *cikankènga!*” Kàdi pààkayàbo bwà kuÀsùmba apu, Mubàki wàkalwa. Beena meeji bààkabwela, nè bààkabàshiya pambèlu piikalà myadi, ditwà dyà mikèmu, nè disumakaja dyà mènù.

<sup>179</sup> Ndi nè nkonko ànu yà mîmpè mwab’ewu yà kwenda naayi pàmwè nè cintu aci nè: “Muntu uvwa muvwàle mùzàbì wàkabwela awu ùvwa nganyi, uvwa kàyì muvwàle civwàlù cyà dibanjì awu?” Nè nkonko yònsò ayi yidì miswikàkàne mu cyòci aci.

**307. Bivwa bikèngela bwà muntu àfutè byàdiikùmi kùdi muntu-nkààya, anyì mwena Kilistò ùvwa nè cyà kukwàta mudimu?**

<sup>180</sup> Ncyà bushùwà ùvwa nè cyà kukwàta mudimu. Yèyè ke muntu wakwàta mudimu, s’mmwena Kilistò.

<sup>181</sup> “Kufuta byàdiikùmi kùdi muntu-nkààya?” Mbilondèshile cidì mwinè muntu-nkààya awu. Nwamònu anyi? Ncyà bushùwà. Mu Ebèlù 7, musangu wà kumpàlà wàkaakulabò bwà byàdiikùmi mu—mu mùshindù wutùdi. . . Anjì indilaayi kakesè, ngèèla meeji, lukonko lwibìdi. To! Uh-uh. To! Bwalu Mwanèètù. . . Yèyè nè: “Nkonko yibìdi bwà Mwanèètù Branham.”

<sup>182</sup> Pàvwà. . . Mu Ebèlù nshapità wa 7, pàvwà Abraham, pàvwàye ùfùmina ku dishebeya dyà bamfùmù apu, wàkatwilangana nè Melekisedekè, wàkaMufuta cyàdiikùmi. Ùvwa m’Melekisedekè awu, Mfùmù wa Salèmà, udi Mfùmù wa Ditalala awu, nè Mfùmù wa Bwakànè, uvwa kàyì mungà muntu to ànu Nzambì Yèyè mwinè. Nwamònu anyi?

<sup>183</sup> Kàdi paùdi ufuta byàdiikùmi. . . Mu bushùwà bwà bwalu, mwaba wùdi nè cyà kufuta byàdiikùmi mmwaba wùdi upetela cyàkudyà cyèbè. “Lwáyì nè byàdiikumi byènù byònsò abi mu nzùbu Wanyi wa diyeebà, mùdi Mukalenge wàmba. (Ncyà bushùwà anyi?) Nè nuNteetè mmùdi Nzambì wàmba, nùmonè ní Ncyàkukàngula màdidiishi à Dyulu nè kunùlòkeshile mabènesha mu mùshindù wà nè kanwàkupeta mwaba mukùmbàne wà kuàtèeka to.” Ndi ngèèla mulùme anyi mukàjì kadyòmbò udi kàyì mufuci wa cyàdiikùmi bwà kwitaba cyòci aci.

<sup>184</sup> Ndi mwà kwimana mwab’ewu too nè mu dindà, munkaci mwà kunwàmbila ànu civwa cyenzèke pangàakamòna cyòci aci, nè mmu ngiikàdilù kaayi mùmvwà nsanganyibwa. Kàdi ànu nè lulamatu lwònsò lùmvwà naalù, mvwa mfuta byàdiikùmi. Nènku pàmvwà ngàngata mfrangà yànyi mu èkèleeziyà emu anyi yà mu tùmpanye twànyi, mvwa mwà kwangata yàbùngì. . . mvwa mfla cyàdiikùmi. Pashìshe mvwa mwà kucipeèsha bambi, nè kupèèsha bambi civwà cishààla cyà ku cyòci aci.

Pashiishe, dîbà dîmvwà nciyì mwà kwenza nàнку to, dîbà adi cintu cîmvwà ngénza, mvwa ndama byà palukàmà diikùmi kàdi mpèèsha Nzambì byà palukàmà makùmi citèèmà. Kàdi pashiishe, pàakangambila mikenji nè ncivwa mwà kwenza nàнку to, bivwa bikèngela mèmè kwangata. . . Nè bu mèmè mwà kwenza nàнку, bàvwa nè cyà kumfucisha bwà cyòci aci, pashiishe mvwa nè cyà kwangata nè kwela mu mudimu wà buumpàndànjilà wà kù baabèndè nè bikwàbò, nè pashiishe ànu kwangata difutu dyà ndola lukàmà ku lumingu; nè mvwa mfuta byàdiikùmi byànyì ku yòyi ayi;

<sup>185</sup> Èyowà's, mukalenge! Mèmè ndi ngiitabuujà difuta dyà byàdiikùmi. Ndimwè dyà ku mabènesha à Nzambì àdi majaadikiibwe nè ndibènesha. Wèwè udi wamba nè: "Aci's ncyà mu Dipungila Dikùlukulu." Cìdi kàbìdi cyà mu Dipungila Dipyadìpyà! Èyowà's, mukalenge!

**308. Mwanèètù Branham munanga, mwànà wa mu dibòko yèyè mulediibwe ku. . . pambèlù pàà nsangilu wa dibàkà, mwànà ewu udi mwà kusungidiibwa anyi kuya mu Dyambwibwa anyi?**

<sup>186</sup> Kusungidiibwa? Mòna's ncyà bushùwwà, ndi ngiitabuujà nè mwànà awu ùdi mwà kwikala. . . Mwànà kènà mwà kupangisha cìvwa cyenzèke aci to. Aci's ncilelèlè. Kàdi mèmè. . . Pa bìdi bitàngilà diya dyà mu Dyambwibwa. . . Musungidiibwe, ndi mufwànyine kwamba nè: "Èyowà." Kàdi mu Dyambwibwa ndimiinu didyànjlà kulongolola dìdi diya mu Dyambwibwa. Nènku mèmè ncyèna mwà kwitabuujà nè masandi àvwa ndimiinu didyànjlà kulongolola to. Nudi bùmvwè anyi? Nwamònu anyi? Ndi ngiitabuujà nè bantu bàdi mwà—mwànà mutòoke ùdi mwà kusungidiibwa; kènà nè—nè bukenji bwèndè yèyè mwinè to. Ncyenzèdi cìdi cyènza bwòwà nè bikwàbò.

<sup>187</sup> Kàdi mpindyewu, mu Dipungila Dikùlukulu pàvwà mwànà ùlediibwà mwànà wa panshì, kàvwa nànsha mene mwà kubwela mu disangisha dyà Mukalenge to munda mwà nkòngo dikùmi, bidimu nkàmà yinaayi nè byà mu njila, mulawu awu wùvwa mubì be. Anjì elààyibì ànu meeji ku bwalu abu. Mwànà wa mu dibòkò uvwa kàyi mwenzè bwalu to, biikùlù bàà biikùlù bàà biikùlù bàà biikùlù bàà bânà bèndè, anjì elààyibì meeji, biikùlù bàà mwànà, biikùlù, biikùlù, biikùlù nkòngò diikùmi, kabàvwa nànsha mwà kubwela mu disangisha dyà Nzambì to. Ncyà bushùwà.

<sup>188</sup> Kàdi nudi numòna's, kakùcivwa cintu nànsha cìmwè muntwamu cyà bukolè bukùmbàne bwà kufwila mpèkaatù awu luse nànsha. Mashi à Dipungila Dikùlukulu kàvwa àjimija mpèkaatù to; àvwa àbwikila mpèkaatù. Kàdi Mashi à Yesù Kìlistò àdi àshipa dibàkà nè mpèkaatù. Aci's ncishiilàngàne mpindyewu. Pàdi Mashi à Yesù Kìlistò àbwela, mbishiilàngàne.

**309. Mwanèètù Branham, tudi baswè kwikala pabwìpì nè Mukenji wèbè nè mwètù mwónsò. Tudi nè cyà kuumuka kuya ku Arizona peeshì ku Jeffersonville anyi?**

<sup>189</sup> Enza muwàsawà amu, eci anyi eci. Ncyà bushùwà nè mémè ndi mukunangè, nànsha wèwè muyè penyì, cyùdi wenza aci nànsha ciikàle cinyi. Kàdi mpindyewu, bu mubelu, ndi ngèèla meeji nè mvwa nè cyà kulwa ku Jeffersonville. Nwènu nè cyà kutentemuka nànsha bishi, mvwa mwà kulwa ku Jeff. Ndi ngèèla meeji nè ndi mwab'ewu kutàmba mûndi mu Arizona. Abi's mbîmpè be.

**310. Mwanèètù Branham, dibà dikaadi—dikaadi dimané kupita bwà kuyiisha kàbìdi bangènzàmpèkààtù anyi?**

<sup>190</sup> To! To! Kubweji aci mu meeji èbè to, mwanèètù. Tùngunukà wèwè ànu nè kwibaka nzùbu. Tùngunukà nè kwenza cyònsò cyùdi mwà kwenza aci. Tùngunukà wèwè ànu nè kuya too nè pawàbìlkidiibwa bwà kuumuka. Nwamònu anyi?

**311. Lukonko nombà mwibìdi. Basùngidìibwe bàvwa nè cyà kutàpuluka nè bangènzàmpèkààtù mu dikuukwila anyi? Basùngidìibwe bàvwa nè cyà kutàpuluka nè bangènzàmpèkààtù bwà kukukwila anyi?**

<sup>191</sup> Ncyèná mumanyè menemene cyùdi uswa kwamba ku cyòcì aci to. Pawìkalà uswa kwamba bangènzàmpèkààtù bu mùdi bàdi pambèlu apa... Nudi nukuukwila Nzambì myaba yònsò. Kàdi ndi ngèèla meeji nè twètù bacyènzè, mmunyi mutwènzà disangisha, bwalu bangènzàmpèkààtù batu bàbwela ànu mu èkèlezìyà nè bàsòmba ku luseke lwà mwena Kilistò. Kanùtàpululuki nè cingà cintu to ànu mpèkaatù, kî nnè ngènzàmpèkààtù to. Twàlaayi ngènzàmpèkààtù nwènu nè mùshindù, kàdi kanwikadi baabanyanganyi bàà mpèkaatù wendè to.

**312. Mukàji musùngidìibwe ùdi nè cyà kubèngela bàyendè piikalàye ngènzàmpèkààtù anyi?**

<sup>192</sup> To, mukalenge! To, mukalenge! Awu's mbàyeèbè. Wèwè's neùmusemèjè kule menemene nè Nzambì kutàmba kwònsò eku mu dyenza dyà nàнку awu adi. Nwamònu anyi? Ncyà bushùwà, Mwanèètù wa balùme, Mwanèètù wa bakàji. Wèwè wakasèdiibwa kùdiye; yèyè's ngwebè, nè wèwè udi wendè.

**313. Mwanèètù Branham, dyumvwija dyà dishipa ncinyi? Bantu mbadishikàmine bwà kusèlangana anyi eci cidi ànu mwàkù mukwàbò bwà dishipa dyà dibàkà? Ndikù dijinga nè kumanyakù bwalu ebu.**

<sup>193</sup> Ncyà bushùwà nè mbasèlàngàne. Pàdìbo ànu bènza mucipù awu, mbasèlàngàne. Ànu mùdi mwànà wa balùme, mwànà wa balùme yèyè mulayè mwànà wa bakàji bwà kumusèla nè meeji mîmpè, mmwenzèjìibwe bwà kusèla nsongàakàji awu. Mbyenzè ànu bu nè mmùmusele. Cintu cimwèpelè cidi mikenji

yènza, nkunùpèèsha mu—mukàndà wà dyanyisha bwà nwènu kusòmba pàmwè bwà kwepela disòmba bu babanjijàngàne. Kàdi pàdi muntu mulùme wàmabila mukàji nè: “Nénkusèlè, Munanga wanyi; Nénkwangàtè bwà wikalè mukàjàanyì. Udi muswè kungangata . . .?” mulùme awu mmusèlàngàne.

<sup>194</sup> Mucìpù wènu ngwà cijila; ke cìdi cìnùswika mu dibàkà ciine’s. Kakwèna muyiishi nànsha umwe udi mwà kunùswika mu dibàkà to, ndùmbùlùlà nànsha umwe, anyì ní ncinyì cikwàbò to; mmucìpù wèbè wèwè mwinè kùdi Nzambì nè kùdi muntu ewu. Paùdi ulaya, udi musèdiibwe.

<sup>195</sup> Tàngilà. Wèwè udi wamba nè: “Mwanèètù Branham, aci cìdi . . .? Wèwè udi wamba . . . S’udi mwambè nè udi mufwànyine kwandamwina cyòci aci ànu ku Bible.” Nuvwakù baswè Bible pa bwalu abu anyì? Elàayi byanza byènu muulu panwikalà baswè. Mpindyewu, tudi nè tusunsa tutwè ku túsambòmbò anyì mwandamukùlù. Èyo.

<sup>196</sup> “Yòzefù, bàyèndè, bu mùvwàye muntu wa maalu malulàme (mubangila wèndè awu, mumane kubiikidiibwa nè bàyèndè) . . . Yòzefù, bàyèndè, bu mùvwàye muntu mwakàne, ùvwa ‘nè wèla mееji mundamunda’ bwà kumwipata mu musokoko mùshindù ewu; kàdi kumpalà kwà kudìsangabò, wàkasanganyibwa nè difù dyà Nyumà Mwìmpè. (Nwamònu anyì?) Ke Mwanjèlò wa Mukalenge kumumwènekelayè mu cilòòtà wàmaba nè: ‘Yòzefù, wèwè mwànà wa Davidi, kùciinyi bwà kwangata pàmwè neebè, Màriyà, mukàjèèbè to.’” Mumanè kusèlangana, yèyè ùkaavwa mumanè kumulaya.

<sup>197</sup> Nènku bwà . . . Nènku inàbànzà mutekète, wèwè mulayè bwà kusèdiibwa kùdi mwànà wa balùme awu, udi mwenzèjìibwe bwà kucyènza. Wèwè mukasèdiibwe kùdi mukwàbò paanyimà pà micìpu awu, newikalè, kuumukila ku mpindyewu mu mishindù yònsò, newikalè musòmbè mu masandi. Kàdi mònaayi nè, ncintu cìmwècìmwè aci bwà mwànà wa balùme mwikàle ùlaya bwà kusèla mukàji . . .

<sup>198</sup> Kwènzèdi ní nganyì yònsò mucìpù to ànu wèwè wambidilamù bwà kulamakanangana nèndè. Vùlukàayi nè, ke Bible awu bwà bwalu abu. Yòzefù wàkalaya bwà kusèlangana nè Màriyà. Nè Nzambì mmwàmbè nè cìvwa . . .

<sup>199</sup> Balàayi mikenji yà Dipungila Dikùlukulu pa bwalu abu. Nwamònu anyì? Mu mikenji yà Dipungila Dikùlukulu, wèwè mulayè bwà kusèla mukàji, kàdi mukasèle mukwàbò, uvwa munkaci mwà kwenda masandi; nè ciinè aci cìvwa cìkupàtula pambèlù pàa citùùdilù. Eyowà’s, mukalenge! Udi nè cyà kulama micìpù yèbè paùdi muyenzèle mukàji kampàndà; Yèyè ndupànza lukesè lujidila, nè biinè abi mbwà kutwàla mwoyi wà mwànà pa buloba apa cyàkàbidi; Nànku paùdi umulaya, udi nè cyà kumusèla.

**314. Dìbà dikaadi dimanè kupita bwà masangisha à mu bùlokò nè mudimu wà mùshindù awu bwà bujaadiki bwa kuteeta kusùngila misùùkà anyi? Kàbìdì muntu ùdi nè cyà kusùmbisha byònsò bìdiye naabì mpindyewu, bwalu Mukalenge ùlwalwa kàtààtaakà anyi?**

<sup>200</sup> Èè, mmunyi—mmunyi mùdì. . . Ndi ntèkemena nè ncyèna mwambè cintu nànsha cimwè cìdì cifwànyine kunùfikisha ku diitabuuja bintu byà mùshindù awu to. Ndi mucyambè anyi? Ní ndi mucyambè, mfwìlaayikù luse! Ncyèna nswa kwamba nànkù to. . . Nwamònu anyi? Kanùdicinkìdì ànu bintu abi to. Tùngunukàayi nè kuya kumpàlà, bwalu nuyiisha, nwenza masangisha à mu bùlokò, nufikisha bantu bònsò, kàdi kanwikadi. . .

<sup>201</sup> Tàngilàayi kùnweku. Ba-Adventistes bàà Ditùkù dyà Mwandamutekète mwaba ewu kí nkwànji kunènga to, kùkaadi bidimu bitwè ku makùmi àtaanu anyi makùmi àsambòmbò, Mvwa mucimòne mu cikàndàkàndà cyà *Courier-Journal* (Ndi naaci mwaba kampàndà mu mùshèetà), bwalu bunène mu cikàndàkàndà cyà *Courier-Journal*, mùvwàbo bakùpe mapwàpwà à kale pambèlu, mùvwàbo bàbàbùikila nè mbaa Millerites kumpàlà kwà kulwàbò ba-Adventistes du Septième Jour. Nènku bàvwa nè dibèji dinène mu cikàndàkàndà cyà *Courier* amu mùnwemu mu Franklin, mu Kentucky emu, cikondo cyàkasùmbishabo mpangu yàbò nè bapetè. . . Bààkiimanyika ditùkù kampàndà dyà ngondo, kucishindikabò nè Mifùndu, nè Yesù ùvwa ùlwa mu ditùkù dyà ngondo adi, è kuyabò kuntwaku bambùle nkòmbè yàbò nè bikwàbò, nè kusòmbabò ku lusongo lwà kakùnà aku. Dìndà dyàkalondà è kutùùlukabò, lumuma lùvwa lupwekèshe nsàlà yònsò, nè kutùùlukabò bafwetèlèlè. Nwamònu anyi? Ntusùmbu nè bintu bikwàbò.

<sup>202</sup> Kanwìtabuuji aci to. Yesù mmufwànyine kubènga kulwa munda mwà bidimu lukàmà. Ncyèna mumanyè nè Yèyè neàlwe dìbà kaayi to. Muntu nànsha umwe kí mmumanyè nè Yèyè neàlwe dìbà kaayi to! Kàdi nènteetè bwà kutùngunuka nè kuyiisha nè kwenza cyònsò cìndì pàànyì mwà kwenza aci too nè pààlwàYe cyà bushùwà. Yèyè kàyi kaaba aka leelù ewu to, nèngiikalè muMwindile mààlabà. Yèyè kàyi mulwè kaaba aka bwà. . . lumingu elu to, nèngiikalè muMwindile lumingu lùlwalwà elu. Yèyè kàyi mulwè apa mu bidimu diikùmì byàlondà to, nè mèmè mwìkalè nè mwoyi, nèngiikalè muMwindile bidimu makumi àsàtù bìdì bilonda ebi. Nwamònu anyi? Nèntungunùkè ànu nè kwindila. Ncyèna mumanyè nè Yèyè neàlwe dìbà kaayi to, kàdi ndi maswè kwikala nè nsòmbelu wa lulamatu ku Dìyi Dyèndè nè lulamatu kùdì bantu Bèndè, nè kwikala nè nsòmbelu bu mwena Kilistò, nè kwindila dilwa Dyèndè. Nwamònu anyi?

<sup>203</sup> Tùngunukàayi ànu nè kwenza masangisha à mu bùlokò, kufikisha muntu yònsò unùdì mwà kufikisha ku disungidiibwa

awu. Ncyèna mumanyè nè Yèyè neàlwe díbà kaayi to; muntu nànsha umwe kí mmumanyè to. Kàdi nèngàmbe cintu cimwepelè eci. Cíndi nteeta kunwambila ncyôci eci, nè ndi ntèkemena nè kanwena nuteeta kudyènzela dyumvwija dyènù nwènù biinè to. . . Ncyèna ntàndisha muntu ewu to. Nzambi àkubènèshè Mwanèètù wa balùme, Mwanèètù wa bakàji, nànsha wèwè mwikàlè nganyì. Byàkamwèka ànu bu nè ùvwa mmuntu kampàndà wa pambèlu pàà cimenga, bwalu cívwa mpa—pa carte postale, ngèèla meeji, kuumukila ku Denver, mu Colorado, nè. . . Èyowà, Pike’s Peak, mu Colorado. Pa nàнку bìvwa bifwànyine kwikala muntu kampàndà wákacintùmina ku poste, kàdi aci—aci’s cidi ànu cimpè menemene. Mbafwànyine kupeta mukàbà wà mèyi awu.

<sup>204</sup> Kàdi tívùlukàayi nè, kanùshintuludikù cintu nànsha cimwè to, ànu njila yènù yà kuumuka ku mpèkaatù kuya ku bwakàne. Túngunukà wèwè ànu nè mudimu wèbè awu, wenda uya ànu bu nè kakwèna bwalu to. Bònsò bàdi bùm vwa aci bitòòke tòò, bàmbè nè: “Amen,” [Disangisha dìdi dyàmbe nè: “Amen.”—Muf.] Nwamònu anyi? Enzàayi nàнку mpindyewu!

**315. Mwanèètù Branham, mu Maatàayi 12.40, bàdi bàmba nè:** “Ànu mùvwà Yona mu—matùkù àsàtù à muunya nè à bufùkù àsàtù mu difù dyà mushipa wa bàlenà amu; ke mwikalà kàbìdi Mwànà wa muntu munda mwà matùkù àsàtù à muunya nè àsàtù à bufùkù mu mwoyi wà buloba.” Mmunyi mùdibikù mwà kwikala ditùkù adi didìbo bàmba. . . leelù ewu dyà nè bàdi bàmba nè Yèyè mmwediibwe mu lukità mu diitànù dilòòlò nè kubìikayè mu dyàlumingu mu dindà, ciinè aci ncyenzè ànu mafùkù àbìdi nè ditùkù òmwè anyi?

<sup>205</sup> Mpindyewu, bu nwènù mwà kumòna, mbàmbè nè: “Ànu mwàkadìbi” (nudi numòna anyi?) mu matùkù àvwà Yona mu difù matùkù àsàtù à muunya nè à bufùkù. Mmunda mwà matùkù àsàtù à muunya nè mafùkù àsàtù à bufùkù, munda mwà cipòòlù aci cyà matùkù àsàtù à muunya nè matùkù àsàtù à bufùkù, bwalu kwèna mwà kufikisha Mufundu ku dishima to. Mupròfètà wàkamba nè: “Ncyàkwitabakù bwà wa cijila wanyi Awu àmonè dibola nànsha, anyi Ncyàkulekela musùùkà Wèndè mu ifernò to.” Nè dibola dítu dibanga mu mubidi wà muntu mu mèbà makùmi mwandamutekète nè àbìdi, ciinè aci ke matùkù àsàtù à muunya nè matùkù àsàtù à bufùkù. Díbà kampànda munda mwà òwù matùkù àsàtù à muunya nè àsàtù à bufùkù awu bwà nè Yèyè neikalè nè cyà kupàtuka mu lukità.

<sup>206</sup> Pa nàнку bu mùvwàwu matùkù àsàtù à muunya nè àsàtù à bufùkù, kacýènà cyùmvwija nè bìvwa nè cyà kwikala ànu nàнку menemene to; cidi ndìbà kampànda munda mwà òwù matùkù àsàtù à muunya nè àsàtù à bufùkù awu. Ùvwa nè cyà kupàtuka, bwalu cipròfètà kacýèna mwà kunyangakajiibwa to, bwà nè. . .

Yèyè kàvwa mwà kumòna dibola to nè ùvwa mufwànyìnè kubola bu Wàshààlapu ciinè cipòòlù aci menemene.

**316. Mwanèètù Branham, muntu yèyè musèlàngàne nè mushipè dibàkà** (Aci kí ncibi menemene anyi, nwamònu's, byàbúngi be? Mpindyewu, ncyèna ngàmba ncintu nànsha címwè bwà kudyula bantu to; ànu nè cidi mu meeji à bantu's. Ncyà bushùwà, mbatàcishìibwe. Dyambwibwa, bantu kabàvwa nè ciibidilu cyà kwela meeji bikolè bwà bwalu to; kacivwa nangànangà citèèdiibwa to. Kàdi mpindyewu, cidi ànu cibwikidìja maalu à buloba. Nè bantu bàdi bàbala bintu ebi mu Mifundu. Nènku bantu, Basungula, Pambèlu apu ke kubwelabù bwà kucitàngila eku. Nènku bàdi bàcimòna, nè bàdi nè meeji matòòke. Mbaswè kumanya. Ke bwalu kaayi ndi muswè kuyàndamuna ànu nè meeji ònsò àndi naawù mündi mwà kunùpèeshaci.) —**ukaavwà musèlàngàne kàdi kushipa dibàkà nè pashìishe kusèlùlula cyàkàbìdi mukàji ukàavwa pèndè musèdiibwe nè mushipè dibàkà kàdi pashìishe musèlùlùdiibwe kùdiye, nènku bàbìdi aba bàdi mwà—bàdi mwà...mbasèlàngàne ku mèsù kwà Nzambì...mbasèlàngàne ku mèsù kwà Nzambì anyi? Mmunyì mùdìbo bònsò bàbìdi anyi umwe wa kùdìbo mwà kwikala mu Dyambwibwa?**

<sup>207</sup> Mùshindù kaayi? Ncyèna mumanyè to. Ncyèna mwà kunwàmbila to. Lukonko lùdi nè: “Bàdi mwà kwikala mu Dyambwibwa anyi?” Mbashipè dibàkà, yònsò wa kùdìbo mmushipè dibàkà, yònsò wa kùdìbo ùdi nè nyàànenèdè nè mwoyi, pashìishe kusèlanganabò cyàkàbìdi, bònsò bàbìdi basèlàngàne cyàkàbìdi. Nènku mpindyewu, ewu udi... Mukàji ewu ùdi nè bàyèndè nè mwoyi; mulùme ewu ùdi nè mukàji nè mwoyi. Nènku mpindyewu, bàkaadi nè bàna nè bikwàbò nè mbaswè kulwa kùdi Nzambì. Bàdikù mwà kuya mu Dyambwibwa anyi? Aci's neciikalè ànu bwalu bùdi butàngile Taatù wa mu Dyulu. Mèmé ncyèna mufwànyìnè kwandamuna aci to. Nwamònu anyi?

<sup>208</sup> Mwà—mwà mumòne cintu címwèpelè. Bible mmwambè nè nebàbìkidiibwè nè bangèndàmàsàndì. Nè Bible mmwambè kàbìdi nè: “Ngèndàmàsàndì kààkubwelaku mu Bukalenge bwà mu Dyulu to.” Ke cyònsò cìndi mwà kwamba ncyòci aci. Ndi—ndi mumanyè nè, aci cidi ànu cinshebeya pàndi ngàmba nànkù awu apu, kàdi ndi mwà kwamba ànu cidi Dìyì dyàmba. Ndi nè cyà kushààla nè cyòci aci. Ndi ntekemena nè byònsò abi kí mmu byòbì to. Kùdi myaba mu Bible... .

<sup>209</sup> Ncyèna nnùbela to. Bu nwènù mwà kuswa, ndekèlaayi nnùpèeshèku ànu Mufundu mukèsè. Bu nwènù mwà kuswà, bu nwènù mwà kuswà kanwikadi—kanwikadi—kanwikadi... Pawikala musòmbe nè disànka nè bàyeebè, musòmbe nè disànka nè mukàjèebè, swàyi nùshaalè mùshindù awu. Nenwènzèku nànkù anyi? Ànu—ànu bwalu, bwalu ntu munwàmbile cyòci aci, kanù—kanùlekedì bàna bakesè abu kabàyi nè lubànzà nè bintu

byà mùshindù awu to. Nzambi mmulongòlòle bilèma mu yimwè myaba bwà bantu bàvwà—bàvwà—bàvwà benzè bintu bibi. Nudi bavùlùke nè, Yesù ngwákamba bwà Davidi nè pàvwàye nè nzala, wàkabwela mu ntempèlù wa Nzambi nè wàkadyà dyàmpà dyà baakwidi, didi dikumbànyine ànu baakwidi, nè basanganyibwa kabàyi bapiishibwe to. Mwakwidi ùdi pèndè ùpenda Nsabatu mu ditùkù dyà Nsabatu nè ùsanganyibwa kàyi mupiishibwe to, kàdi munène mutámbe Nsabatu ùvwa mwab'ewu. Nwamònu anyi? Kùdi . . . Ndi . . . Tù—tùbùlekèlèlaayi ànu Nzambi, nè tütungunukàayi, kàdi ikàlaayi ànu nè nsòmbelu mùshindù wunùdi . . . Ikàlaayi ànu—ànu nè mwoyi bwà Kilistò mpindyewu.

<sup>210</sup> Tùmonèbi tǔng, kùdi mwà kwikala mpùngà wa nwènu kubwela. Kanwènji . . . Bilema bìbìdi kabyàdyàkulongololakù bubì bùmwe to. Tùngunukàyi nwènu ànu nè kwikala nè nsòmbelu unùdi nendè awu panwikalà—pawikalà nè disànka pàmwè. Udi mufwànyine kwikala nè nyààneebè mubì awu. Nèngàmbe cintu cimwèpelè eci nè: wèwè nè nyààneebè mubì mu mukàji ewu, mu nsòmbelu ewu, kwàdyakumupeta mu mukwàbò awu nànsha. Bilèma byònsò nebilongolodiibwe.

### **317. Beena kwitabuuja bònsò balediibwe cyàkàbìdi abu nebàye mu Dyambwibwa anyi?**

<sup>211</sup> To, ànu bàshààdilè abu, ànu bàshààdilè abu, kí mbeena kwitabuuja bònsò bàdi balediibwe cyàkàbìdi to. Bible mmwambè nè: “Nè bafwè bakwàbò kabààkiikala nè mwoyi to munda mwà bidimu cinunu,” nè pashiishe bàakabiishiibwa nè bàakatàpuludiibwa, mìkòòkò nè mbùji. Kí mbònsò bàdi balediibwe cyàkàbìdi bàabwela . . . bilondeshile Mifundu.

### **318. Cileeji cyà nè muntu mmùle tètè menemene nè Nyumà Mwímpè ncinyi?**

<sup>212</sup> Yone 14.26: Yèyè neikalè . . . “Pààlwà Nyumà Mwímpè (nwamònu anyi?), Yèyè neànùleejè maalu àcilwalwà.” Nwamònu anyi? Yèyè neikalè . . . Yèyè neàcipwàngajè; “bintu byenza ku byanza byà bantu” kabyakucyènza to; nè Yèyè ùdi Diyì. Pìikalà Yèyè Nyumà Mwímpè mulwè, Yèyè neàDimanyishè munda mwènu nè Mifundu. Nènku aci ke cimanyinu cilelèlà cyà nè Nyumà Mwímpè ùdi munda mwèbè, bwalu Yèyè ùdi Diyì.

<sup>213</sup> Mpindyewu tàngilàayi! Ambàbi tǔng bu wèwè mwà kwakula mu myakulu? Ndi muswè ànu nnùkonkèku cyòci aci. Yesù wàkamba cìikalà Nyumà Mwímpè mwà kwenza pààlwàYe. Kàdi ambàbi tǔng bu wèwè mwà kwakula mu myakulu, kutùpika kuya muulu kwalukila panshi, kwela mbilà, nè bikwàbò byònsò, nè pashiishe kulwa ku Diyì; nènku ndi mufwànyine kunwàmbila bwà dibàtiiza dyà . . . kunùjaadikila ku Mifundu bu mùndi mwenzè amu, nè dibàtiiza mu mwànzù wà Taatù, Mwànà, nè Nyumà Mwímpè kakùyì mpatà to didi ndyumvwa dibì dyà Mifundu, kacya muntu nànsha umwe kàtukù mwanji

kubàtijiibwa mùshindù awu to, kàdi wêwè ànu mutùngùnùke nè kushààla mukùlame ku cyòci aci twamb'eku twamb'eku? Udikù mwà kungambila nè Nyumà Mwîmpè munda mwèbè mmufwànyîne kwenza cintu bu nàнку anyi? Mmunyi mùdiYe mwà kuvila Díyi Dyèndè Sungasunga?

214 Pàndi nnùleeja cidì nè cyà kwenzeka mu ditùkù edi, mùshindù wùdi Mwànà wa muntu nè cyà kuDìbuulula, nè cidìYe nè cyà kwenza, nè Mifundù yònsò yìkaavwàku mpindyewu eyi, nè pashiishe kuMumòna utùuluka buludì nè ùcijaadika, kàdi wêwè kacya ànu washààla mukùlame ànu ku dingomba kampàndà kàdi wamba mùdi mulediibwe cyàkàbìdi? Udi mwà kucyùmvwija anyi?

215 Ndikù mwà kwambila mukàjàànyì nè ndi mumunangè, kàdi—kàdi kupàtuka nè mukàji mukwàbò, nè kwenda kwenza nèndè mananga eku nè eku, kàdi pashiishe kumwambila byùmukila munda mwà mwoyi wànyì nè ndi mumunangè anyi? Nudi nwela meeji nè aci ncifwànyîne kwikala dinanga dilelèlà anyi? Yèyè ùdikù mwà kungambila nè mmunangè, kàdi dîbà dîndi mupàtùke muyè, yèyè eku wènda wènza mananga nè mulùme mukwàbò anyi?

216 Ke cyòci aci menemene cidì Izàlèèlà mwenzè bwà... Nudi bamanyè Bible mwaba awu's, mwàkambàYe, wàkula... Izàlèèlà, wàkamba nè: "Udi mubaalùle mikòlò yèbè kàdi kubwejamù mulùme yònsò udi upicila mwaba awu, nè udi mwèndè bundumbà kumpalà Kwànyì; nè Mèmè nènkwèlè pambèlu nshipè neebè dibàkà." Menemene's! Ncinyi aci? Udi wenda masandi ulwisha mubidi wèbè sungasunga. Nènku pàdi mukàji kampàndà upàtuka ùkashààla nè mulùme mukwàbò, anyi mulùme nè mukàji mukwàbò, pàdìbo nè mbasèlàngàne, bàdi munkaci mwà kukooyisha mubidi wàbò mene. Nè pàdi muntu wàmba nè mmwena Kilistò kàdi kakùyì mpatà to ùvila nè Mufundù kí mmulelèlà to, ùdi munkaci mwà kwenda masandi kumpalà kwà Mubidi ùdiye wàmba nè ùdimù awu. Nwamònu anyi? Pa nàнку aci's ncimanyinu cyà mufwilakanyi nè Kilistò, mu mùshindù wa bifwànyîne kuseeswisha Basungula bu byòbi mwà kwenzeka.

### **319. Mwanèètù Branham, bìdi ànu bîmpè bwà m—mwànà mutekète wa bakàji kuvwàlayè mîpanù nè tûpùtulù anyi?**

217 Mmutekète wa bidimu bìngà? Wèwè nkààyebè ikàlà mukòshi wa bwalu abu; pawìkalà mwena Kilistò. Mwànà mukese wa bakàji anyi mwànà mukèsè wa menemene, mùndi ndifwànyikijila, ncyèna mumanyè to, ndi...Cintu cimwèpelè cîndi mumanyè, Bible ùdi wàmba nè ncinyangu bwà muntu mukàji kuvwàlayè civwàlù cidì—cidì cikùmbànyîne muntu mulùme. Nwamònu anyi? "Mukàji kampàndà," kí mbambe nè: "mwànà" to. Kàdi mpindyewu, ndi ànu...Wèwè nkààyebè ngudi mumanyè muwàpità nè bwalu abu, mèmè...Bwà ku

lwànyì lusekè, ncyenà mmòna cintu cibì kùdì mwànà mutekète menemene, mwànà wa bakàjì mutekète menemene wa bidimu binaayi anyì bitaanu mwikàle nè... Pàcìdibò bânà bakesè, nudi bamanyè cìndì nswa kwamba, bàdi bènda bànyeemakana pambèlu apu mu bulà amu. Yèyè muvwàle, cyùdì wèwè ubiikila nè mipanù anyì ní ncinyì cyònsò aci, mmwànà mukèsè menemene, ncyèna—ncyèna mmòna cintu cibì mu cyôci aci to. Pàmwápa. . .

<sup>218</sup> Nwamònu's, ndi ànu nnwàmbila cìdì Dìyì dyàmba. Ncinyangu bwà muntu mukàjì kuvwàlayè civwàlù cìdì cikumbànyine muntu mulùme.

**320. Mpenyì patùdì nè cyà kudìsangishila pàmwè? Udi mwambè bwà twètù kudìsangishila mwìnshì mwà Mpungi ayi.**

<sup>219</sup> Ndi ngiitabuujà, nyànà, Mwanèètù wa bakàjì, nànsha yèyè mwikàle nganyì, udi—udi mutùpàkàne pa bwalu abu. Kacya ncitukù mwambè nè disangishilaayi nwènù biinè pa Mpungi to. Mèmè mvwa mwambè nè Izàlèlèlà ùvwa mudìsangishile pa Mpungi, kì m'Mukàjì—musèla wa bàà Bisàmbà byà bendè to. Tò, tò! Mpungi ayi, mwadi wa Mpungi Mwandamutekète yìvwa nè cyà kusangisha Izàlèlèlà (mbanganyì bàdi bamanyè nànkù?) kuumukila ku myaba yònsò... Èyowà's, kì... To, tò! Uh-uh! Tò, kì—kì—kì ny'Izàlèlèlà to. Pa nànkù, kì ng'aci to... Katwèna tudìsangishila pa Mpungi nè—kùdì—Mukàjì—musèla awu kèna ùdisangishaku to. Mpungi yìdì yìlwa paanyimà pàà Difestò dyà Mpenta. Nwamònu anyì? Nènku Dyambwibwa dìdì dilwa... Nènku aci. . . kì ndukonko elu mpindyewu to.

**321. Mwanèètù Branham, bu wèwè nè dībà swàkù umvwijèku Maatàayi 10.41. Ndi muswè kumanya cìdì difutu dyà mupròfètà.**

<sup>220</sup> Èè mpindyewu, Yesù wàkamba nè: “Ewu yònsò udi wakidila mupròfètà mu dìnà dyà mupròfètà, ùdì ùpeta difutu dyà mupròfètà.” Difutu dyà mupròfètà nkwikala mulundà wa mupròfètà. Ewu yònsò udi wakidila muntu mwakàne mu dìnà dyà muntu mwakàne, ùdì ùpeta difutu dyà muntu mwakàne. Ncyà bushùwà anyì? Nènku bóbò baswè kumanya cìdì difutu dyà mupròfètà, nkwikala mulundà wa mupròfètà. Nwamònu anyì? Aci's ke difutu. Yèyè's mmùlundà webè.

<sup>221</sup> Bu mukàjì mwena Suunèmà awu, ncifwànyine kunùkwàcisha musangu kampàndà. Nwamònu anyì? Ke cyàkamwenzekela. Nwamònu anyì? Tàngilàayi basadidi bàà Nzambi.

Kaa, ekèlekèle! Mpindyewu, tudi. . . Ndi—ndi nè cyà kujikija, mulundà wanyì, ndi—ndi ngùmvwa bibì bwà kucyènta, kàdì anjì tàngilàayi kùnweku, anjì tàngilàayi ànu cìdìku, nkàmà's. [Mwanèètù wa balùme kampàndà ùdì wàmba nè: “Tùngùnukà, mwanèètù.”—Muf.] Tò! Kàdì—ndi mumanyè, kàdì nta- . . . Ndi—ndi munangè panùdì nwamba nànkù apu, kàdì ndi ngèèla meeji

bwà bantu bàdi nè cyà kwenza kàbìdi nkàmà yà kilòmèetà dilòòlò edi. Ekèlekèle, bàdi ànu...bàdi bààbùngì kuntwaku, ndi... .

**322. Mwanèètù Branham, ndi muswè kumanya bwalu bwà Bukalenge bwà bidimu cinunu. Mpaanyimà pàà Didyà dyà Dibanji anyi, anyi—anyi mpa buloba? Byòsò bìdi bitàngila bwalu abu. Ncyèna—ncyèna ncyùmvwakù to.**

<sup>222</sup> Èè, Mwanèètù wa balùme anyi Mwanèètù wa bakàji, mbinkolèle bwà kucyùmvwà, mèmè mwinè. Kàdi cintu cimwèpelè cìndi mwà kwamba ng'eci's nè: Didyà dyà Dibanji adi didi dilwa kumpalà kwà Bukalenge bwà bidimu cinunu.

<sup>223</sup> Mpindyewu, nwamònu's, muntu kampàndà, ndi mumanyè nè mwaba kampàndà kaaba aka ùdi nè lukonko pa cyòci aci, mùdìbo bambè nè: “Mwanèètù Branham, udi—udi mupùile pa mbingu makùmi mwandamutekète ya Danyèlè. Nekwikalè ànu kàbìdi mbingu makùmi mwandamutekète.” To, bivwa bikèngela bwà Maasiyà kulwa nè kwamba cipròfetà, nè munkaci mwà mbingu makùmi mwandamutekète ayi, mbingu makùmi mwandamutekète ayi, yìdi bidimu mwandamutekète ayi, Yèyè ùvwa nè cyà—Yèyè ùvwa nè cyà kuumushiiwa munkaci mwà bàdi nè mwoyi, nè kuvwijibwa mulàmbù. Mbanganyi bàdi bavùlùke aci? Èyo. Bidimu bùngì kaayi byàkayiishà Yesù, Maasiyà awu? Bisàtù nè citùpà. Pashiishe kùcìdi ànu bisàtù nè citùpà bikòsa.

<sup>224</sup> Nènku mu Bwàkabaulwibwà nshapità wa 11, bapròfetà bàbìdi aba, bàdi bàmba cipròfetà munda mwà matùkù cinunu nè nkàmà yìbìdi nè makùmi àsambòmbò. Bidimu bisàtù nè citùpà bicìkàlè ànu bilaya Izalèlèlà pùikalà Mukàji-musèla wa bàà Bisàmbà byà bendè muyè. Mbanganyi bàdi bùmvwà aci mpindyewu? Nwamònu anyi? Èyo, èyo.

**323. Eci cìdi . . . Ntu nè nzùbu wa cidìilù nè ntu mpèèsha balongi bàà mu tùlaasà twà ciikadilu byàkudyà mu ciibùngì. Kacya ngàbwela mu Bukènkè, ndi muumùshe cyamù cyà mubèlè wà mfrangà nè (cisanji cyà kutèèlejila mâtadi; cidibo batèeka mwaba awu) j-box. Bansongà bàdi bànwa mfwankà nè mbaswè mijikì yà bidùndadùnda ku—ku cisanji. Ndi nkàngula ànu mèbà matwè ku ànaayi cyanààna ku ditùkù. Ncyèna—ncyèna mwitàbe kunwà kwà mfwankà anyi kunwà kwà maalà to, kàdi bìdi bintàcisha bwà dilombola dyà kaaba aka.**

<sup>225</sup> Nudi bamanyè's, ke bwalu mbòbò abu. Nwamònu anyi? Bwalu bùdìku mbwà nè, wèwè udi—wèwè udi...pàmwàpa mbwà kupetelakù cyàkudyà. Kàdi nudi bamanyè cìdi aci cifwànyine kungenzela anyi? Aci's ncifwànyine kumbìndulula bikolè mu mùshindù wà nciyi mwà...Ndi—ndi—aci...Wèwè udi mufwànyine kwikala mukùmbàne bwà kucitwàla, kàdi musùmbà mukesè wà tu “Rickys” tùdi munkaci mwà kwenza

maalu à lukutukutu mùshindù awu atu, nè tu “Rickettas,” ndi mufwànyine—ndi mufwànyine—mbifwànyine kumpèèsha mukupa. Nwamònu anyi?

226 Nènku ndi nnwàmbila; ndi—ndi . . . Bu cìkala cyànyi mémè, ndi mumanyè cìmvwa mufwànyine kwenza. Mvwa mufwànyine kwamba nè: “Imànyikà aci anyi pàtukà mwab’ewu.” Nwamònu anyi? Mvwa mufwànyine kwenza cyapù cijaalàme anyi ncivwa mwà kwenza cyapù to. Kàdi wèwè, byòbì bikèngela bwà wèwè kucyènta bwà kupetelakù cyàkudyà, ncyèna muswè kukudyombola to, Mwanèètù wa balùme anyi Mwanèètù wa bakàjì. Ndi—ndi mumanyè nè mbikolè bwà kwamba maalu aa; kàdi aci—aci cidi ànu . . . Kì ncyà bushùwà to (nudi numòna anyi?), bwalu bìvwa bimwèka ànu bu nè bìvwa . . .

227 Bu mwāmbi muntu kampàndà mu dindà emu bwà bakàjì bèètù bàdi bàvwàla nkanzu yàbò mîpì, bakàjì bèètù bakùlumpa aba, cìvwa cileejilu cibì bwà bansongàakàjì. Ngèèla meeji nè aci cidi pàaci cyà bushùwà. Nudi numòna anyi?

228 Nènku ndi ngèèla meeji cintu cimwècimwè aci. Pàdìbo bàkumòna mwòmò amu mùdi dinwà dyà mfwankà dyònsò nè dyenza dyà maalu à lukutukutu adi, nè bamanyè bujaadiki bwèbè, nè dyelangana dyònsò dyà milawu edi nè—nè kusanganyiiibwa munkaci mwà bansongà bàà mùshindù awu abu, nè bóbò bènda bènta maalu à lukutukutu à mùshindù awu, kàdi wèwè kùyì wamba kantu nànsha kàmwè pa bwalu abu to, ncintu cibì pa bujaadiki bwèbè. Udi wenza cyònsò cidi Mukalenge ùkulombola bwà kwenza aci. Ndi ndòmba bwà Nzambi àkulombolè mu mùshindù mujaalàme.

**324. Bu nè (k-i-m-a- . . .) kwimana mu mulongo bwà kubwela mu èkèleeziyà nekwikalè ànu civulukilu, cìkalà mwà kwenzeka ncinyi twètù katùyì tupicila mu Dikènga dinène? Bìdi bikèngela bwà twètù kwikala—kwikala bamòne . . . umweumwe awu . . . dikènga kampàndà anyi? Byòbì kabiyi bikèngela bwà twètù kumòna . . .**

Nwamònu anyi? Ndi . . . Lukonko elu pàmwápa lùdi nùnkù. Ndi nteeta bwà kulwijakaja; kabìvwa bikèngela bwà mémè—mémè—mémè kwenza cikampàndà eci to. Bìvwa bìkèngela bwà mémè kulwàluja pa mikwàbò, bwalu kùdi mwaba wùdi mufwànyine kushàalapù díbà dijimà (nwamònu anyi?) nènku cidi—cidi ànu kucìsùnsula’s. Nè—nèngiimanyikè.

229 Tàngilàayi. Bantu bàdi bàjinga kwamba nànkù, bàdyàmbidila nè bóbò—Èkèleeziyà neàpicilè ku Dikènga dinène. Nwamònu anyi? Kacyàkwenzeka to; Kacyèna mwà kwenzekaku to (nwamònu anyi?), bwalu Ùkaadi mumanè kupikudiibwa.

230 Mpindyewu, èkèleeziyà awu, beena kwitabuuja bàà—bàà ku dìnà abu bu Lotà, ùdi ùpicila mu Cikondo cyà Dikènga dinène (nwamònu anyi?) nè kusùngidiibwayè bu nè cìvwa nku kapyà. Noà wàkàpicila mu Cikondo cyà Dikènga

dinène, mwambwibwe pa mutù pàdi, wàkapàtuka nè Ham wàkakooyisha cyàkàbidì buloba awu. Nwamònu anyi? Lotà wàkapàtuka, bânà bèndè sungasunga bàà bakàji bàakalàala nendè, nè kulelayè bânà nè bânà bèndè sungasunga bàà bakàji. Nwamònu anyi? Kàdi Abraham wàkatwàla Dimiinu dyà Bukalenge, kutwàla Dimiinu dyà mulayi. Henòkà wàkaya mu Butumbi mu Dyambwibwa, wàkakùtula ànu lwendu è kwalukilayè kumbèlu. Yèyè kàakapicilakù mu Cikondo cyà Dikènga dinène to. Nudi numòna anyi?

<sup>231</sup> Ki bwalu mbwòbù abu's. Nwamònu anyi? Kabyèna nàнку to, Bible kènàku ku cifwànyikijilu . . . Nè bifwànyikijilu kabyèna mwà kupangilakù to. Nwamònu anyi? Kacyèna cidyanjila kwamba nè Mukàji-musèla . . . Mpindyewu, èkèleeziyà neàpicilè mu Cikondo cyà Dikènga dinène.

<sup>232</sup> Mpindyewu, bantu bàdi bàmba nè: “Kàdi bìshi bwà bansantu bàà ku cibangidilu?” Aci's civwa ndishintuluka dyà bipungu. Aci's civwa nku dikèngeshiibwa, bu nè wèwè uvwa kaaba aka bwà kutèeleja *Bikondo Byà Èkèleeziyà* ebi, nè pa kumòna mwàkaditwàbo mu mîdimà ayi nè kukèngelabi bwà kwenzabò nàнку, dîbà adi aci cidi cileela mwaba wùvwàbi bikèngela bwà kwangatabò dikèngeshiibwa adi, bwalu cyònsò cyà ku bikondo byà èkèleeziyà nè bikwàbò byònsò mbibange kuleela nè bìvwa bitàmba ànu kwenda kulwà mifitù, mu mùshindù wà nè ndekeelu wa byònsò bàakaya ku mwaba kampàndà mujimà wàkavilàbo Dîna Dyèndè nè kwangatabò dîna dikwàbò dyà nè bàvwa nè mwoyi pàabò bafwè, Sàadi. Ke pashìishe kulwakù, Twatilà nè Sàadi, nè pashìishe kupàtuka, pashìishe kubangaci kupàtuka kuya ku Filàdelèfiyà nè bikwàbò, nè pashìishe kulwakù cikondo cyà dibìikila dyà dipàtuka dyà Mukàji-musèla uvwa nè cyà kupànduka ku dipiishiibwa dyònsò. Cyàkabadiibwa bu cikumbànyine bwà kupànduka ku dipiishiibwa dyònsò nè ciiji cicolè cidi nè cyà kulwa pa buloba eci, bwà nwènù kubadiibwa bu aba bàdi bakumbànyine bwà kupànduka ku cyòci aci, kanùyì nupicilamù to, nupàndukakù. Nwamònu anyi? Nudi nuumvwa mpindyewu anyi, nwènù bònsò? Nwamònu anyi?

<sup>233</sup> Èkèleeziyà, wa civumvù awu, cintu kanà cyònsò cidi kaciyi Mukàji-musèla musungula aci necipicilè mu Cikondo cyà Dikènga dinène. Kabàakujuuka mu dibìikà dyà ku lufù dyà kumpàla to: “Bafwè bakwàbò kabàakashàala nè mwoyi to munda mwà bidimu cinunu,” ànu Mukàji-musèla, mudyànjila kulongolola, musungùdibwe, disungula dyà Nzambi Yèyè mwine. “Nganyì awu's, Mwanèètù Branham?” Ncyèna mumanyè to. Ncyèna mwà kunwàmbila nè nganyì mwinè awu to, kàdi ndi mumanyè nè yèyè neikalèku, bwalu Mukalenge mmwàmbè nè bòbò nebìikalèku. Nwamònu anyi? Ng'aba bààyà bàshiya Dikènga dinène, kàdi bakwàbò bàà ku bòbò nebàpicilè mu Dikènga dinène, bàpweka, nè bintu byònsò nebishiibwè

kumpalà kwà Bukalenge bwà bidimu cinunu. Pashiishe baa—baakàne nebàpatukè mu Bukalenge bwà bidimu cinunu nè nebiikalè nè mwoyi bidimu cinunu.

<sup>234</sup> Nènkù paanyimà pàà bidimu cinunu, pashiishe ke Cilumbulwidi cinène cyà ku Nkwasa Mutòoke kulwaci, nè pashiishe bafwè, bònsò bàbidi baakàne nè babì nebàbiishiibwè. Nè mikàndà neyikàngùdiibwe, nè Mukàndà wà Mwoyi wàkabuuludiibwa; nè bansantu, Mukàji nè Mulùme, basòmbe bàlumbulwisha bàà pa buloba. Nènkù's ke pènzekà dîyi dyà nè: “Nè Yèyè neàlumbulwishè matùnga ònsò nè dikombo dyà cyamù cifiike.” Matùnga ònsò neimanè kumpalà Kwèndè mwaba awu, nè Yèyè neàbàlumbulwishè nè dikombo dyà cyamù cifiike. Yèyè neàtapululè mìkòòkò nè mbùji nè neàmblè mbùji nè: “Kàtukàayi,” nè mìkòòkò nè: “Lwàyi, nwènù babènèshiibwe bàà Taatù Wanyì.”

<sup>235</sup> Mpindyewu dîbà adi, nekwikalè didisangisha dyà mu citùùdilu dyà bansantu pa mikàlù yà buloba. Nè Sàtaanà mulekelela mupàtula mu bùlokò bwèndè nè ùya bwà kalwisha bansantu mvità kàbidi, ànu menemene cyàkenzàye mu Butùmbi ànu kwìnè kwònsò aku. Nè pashiishe Nzambì ùdi ùlòkesha kapyà nè soufre bìfùmina mu maulu, nè buloba bujimà bùumushiibwa byenzè bu. . . Bùdi ànu bwoshiibwe nè bubùtùdiibwe butubutu. Nè kakùcyèna kàbidi mbù to, kakùcyèna kàbidi màyi to, kakùcyèna kàbidi cintu nànsha cimwè cidi cishààle pa buloba to. Mudilu wà mu buloba newùpatuke nè newùbwayikè nè bùtaayikè, nè cintu cyònsò mu kaabujimà. . .

<sup>236</sup> “Nènkù ngàkamòna Maulu Mapyamàpyà nè Buloba Bupyabùpyà: bwalu maulu à kumpalà nè buloba bwà kumpalà byàkajimina; nè kakùcivwa kàbidi mbù to. Mémè, Yone, ngàkamòna Cimenga cyà Cijila cipweka cìfùmina kùdi Nzambì mu Dyulu bu Mukàji-musèla mulengejila bàyèndè.” Nwàcivùluku anyi? Nènkù mu Mukàji-musèla ewu. . . “Mònaayi Tabernacle wa Nzambì udi nè bantu,” nè Nzambì neàsombelè naabò pa Cimenga cyà cipaapu cyà musàkà eci cyà kílòmèètà binunu bibìdi nè nkàmà yinaayi ku luseke nè ku luseke. Nènkù ku lusongo lwà Cimenga nekwikalè Bukènkè kampàndà. Amen!

Kaa, Cimenga aci pa Mukùnà wà Siònà,  
Nànsha bu mwenyi, neidi ànu mucinange.  
Nèntwilanganè neenù mu bikondo abi,  
Pangàáfika mu Cimenga aci kuulu kwà  
kakùnà aku.

<sup>237</sup> Ku lusongo lwà Mukùnà wà Siònà Mwànà wa mùkòòkò neàsombèku. Nè Cimenga kacàyakukèngela bukènkè to, bwalu Mwànà wa mùkòòkò ke Bukènkè bwàci. Nè kuulu kwà Mwànà wa mùkòòkò nekwikalè Taatù, udi *Logos* awu, Nzambì, Bukènkè bunène, Bukènkè bwà Cyèndèlèlèlè bwàtemà ànu kumutù kwà Nkwasa wa butùmbi aku abu. Nè Yesù kààkwikala pa Nkwasa

wa butùmbi wa Taatù Wendè to, Yèyè neikalè pa Nkwasa Wendè wa butùmbi. Nè Taatù neàpaapalè pa Mwànà, bwalu Taatù nè Mwànà nebiikalè Umwe. “Kàdi pacidibo ànu bààkula apu, Mémè nèngàdamunè. Kumpàlà kwà bôbò kwelangana meeji, ndi ngèèla meeji bwàbò bôbò.” Ncyà bushùwà.

<sup>238</sup> Nè Yesù neàpingajè cikondo cipwàngàne, cipwàngàne kùdi. . . Nzambi mupwàngàne udi nè mwoyi, bàdiYe mupikùle nè mupèèshe Taatù. Ncyà bushùwà anyi? Bààpèèshàye Nzambi Taatù udi Nyumà awu, kí mmuntu to, Nyumà. Ngiiikàdilù yònsò wa bwimpè musangisha pàmwè, n’Nzambi. Nè mu bwimpè. . . Mpindyewu, cintu cyònsò cinyangakaja cyumusha ku ku cimpè mbubi; ke bukalenge bwà Sàtaanà mbwòbù abu. Cimpè cyònsò ncyà Nzambi. Cibi cyònsò ncyà. . .

<sup>239</sup> Ke pashiishe Nzambi kulwaYè wa bàlenga nè byanza mu Muntu mubiikidibwe nè Yesù Kilistò uvwa Mwan’Èndè awu. Mwànà ewu wàkafila Mwoyi Wèndè bwà Wàmòna mwà kutwàla bàna bakwàbò bàà balume, bwà Nzambi wàmòna mwà kushààla wa balenga nè byanza, ùkwàta mudimu mu byònsò nè mu byònsò. “Mu ditùkù adi nenùmanyè nè Mémè ndi munda mwà Taatù, Taatù munda Mwànyì, Mémè munda mwènù nè nwènù munda Mwànyì.”

<sup>240</sup> Kaa, mwanèètù, adi’s nediiikalè ditùkù dyà cyà bushùwà. Kabyàkukèngela bwà nwènù kwendesha màshinyi kuumukila ku Birmingham kwàka bwà kutèèleja Mukenji to; Mukenji newikalè ànu neetù díbà adi, kí mmwòmò anyi? Kaa, neciikalè—neciikalè bwalu bwà dikèma, cikondo cyà dikèma. Tudi bindile ditùkù adi; Nzambi àseemejè lùkàsà dilwa dyàdì.

<sup>241</sup> Cimenga cinène cidi cisòmbe mwaba awu aci (mpindyewu, nwamònu anyi?), kacyàkwikala. . . Nudi nwela meeji nè: “Mu butùmbükè bwà kilòmèètà binunu bibidi nè nkàmà yinaayi anyi?” Ke cidi Bible mwambè. Mpindyewu, kacyàkwikala kilòmèètà binunu bibidi nè nkàmà yinaayi miyè muulu buludì nànkù to. Nwamònu anyi? Tudi nè cipimu cikwàbò cyà buloba cidi nseke yònsò miikàle bule bùmwe; aci ncipaapu cyà musàkà. Nwamònu anyi?

<sup>242</sup> Nè Cimenga necibangilè pàmwàpa bu cipimu cyà makùmi àsambòmbò. Nènku cyòci ciinàme, kilòmèètà binunu bibidi nè nkàmà yinaayi yàaci, anji elàayibi meeji tũng butùmbükè bwàci nebwiikalè bishi, kàdi nebikèngelè ntàntà bule kaayi bwà kufika kuntwaku. S’nebikukolèlè bwà wèwè kumanya nè udi wenda ubàndà kakùnà. Bwà butùmbükè bwà kilòmèètà binunu bibidi nè nkàmà yinaayi cipidi cyà makùmi àsambòmbò, wèwè udi ànu bu nùnkù ewu. Nwamònu anyi? Nè Cimenga cidi cìsanganyiibwa cyònsò pa kakùnà aka. Nè butùmbükè bwàci bùdi mùdi bule bwàci; bule bwàci bùdi mùdi bucyàmà bwàci. Butùmbükè, ku bwondòke, ku bucyàmà, cidi—cidi ànu mwomùmwe; bimanu

byônsò bîdi ànu mwomùmwè. Cipaapu cyà musàkà cîdi nè bîmanu bînaayi, nè bîmanu bînaayi ebi nebîikalè. . .

<sup>243</sup> Mpîndyewu, bîmanu bîikalè bînyùngùlùkile Cimenga nebîikalè—nebîikalè byà metèlè makùmi àsambòmbò nè àsambòmbò à butùmùbùke, nè coudées lukàmà nè makùmi ànaayi nè yînaayi, nè yônsò wa kùdiyî ndîbwe. Anjî elààyîbî ànu meeji ku Cimenga aci, balundà bàànyî. Kaa, ekèlekèlè! Ncinyî—ncinyî citùdî basòmbèlè kaaba aka mu mwaba wà luuyà lukolè emu? Citùdî twenzela bîntu ebi ncinyî? Tudi twendesha màshinyî ntàntà buleyî nùnkù bwà cinyî's? Bwà cinyî tudi—bwà cinyî tudi tukwàta mudimu mukolè? Ncîkùmbànyîne katùpà kònsò kàà njîla.

Kaa, ntàtù yà mu njîla kayàkumwèka bu cintu to,

Pangààfikà ku ndekeelu wa njîla.

Ncyà bushùwà. Nènkù, kaa, ncikondo kaayîpu cîikalàci's wè.

<sup>244</sup> Nènkù mwaba awu Yesù neàsombè pa Nkwasa wa butùmùbî. Nènkù lwà mwînsî mwà Nkwasa wa butùmùbî amu musùlù wà mâyî à mwoyî newùtuutè nkòkà, wènda wùpwekela ku bîmanu bînaayi ebi ùbwela mu bipòngòpòngò bîkesè, nè mu tusùlù tukesè, nè tùlwa twènzà musùlù, nè ùpweka ùpicîla mu Cimenga aci. Newùpwekelè mu mìsèèsù mùshîndù awu, nè ku luseke nè ku luseke lwònsò nkwmàne micî yà mwoyî yîkalà mwà kukwàma, anyî, kushîntulula mamuma àyî matùkù makùmi àsàtù ònsò—ònsò. Kaa, Cimenga kaayîpu's wè!

<sup>245</sup> Nènkù vùlukàayi nè, Nzambî, Mufùkî awu, wàkafùka maulu nè buloba awu, ùdî mu Butùmùbî mpîndyewu mene munkacî mwà kulongolola Cimenga aci. Abraham wàkaCîkèba. Wàkashîya dîkù dyèndè; wàkatàpululà nè byônsò bîvwà nè mushînga wàbùngî bwèndè yèyè nè wènda ùkèba. . . Bwà cinyî? Yèyè ùvwà mupròfetà. Nè bu mùvwàye mupròfetà, ùvwà muswîkàkàne nè Nyumà nè citùpà cyà Nyumà. Ke Cintu kampàndà kumwambîlacî munda mwèndè nè: "Kùdî Cimenga kampàndà," ke kubangayè kuCîkèba. Yèyè nè: "Mèmè ndî mwena lwendu, mwenyî. Ndi ngènda nkèba Cimenga cîdî Mwîbaki nè Mwenjî mwîkàle Nzambî." Ùvwà mumanyè nè Cimenga aci cîvwà mwaba kampàndà. Kaa, ekèlekèlè! Nènkù ndî ngîitabuuja nè ànu mu malaba àvwàye wènda ùCîkèbela awu, ànu mu Pàlèstîna mwàmwa, mwómò amu ke mwàjuukîlâCi, bwalu Cîdî pa Mukùnà wà Sìonà. Ke mwîkalâCi.

<sup>246</sup> Tàngîlàayi mwaba wàdyòlwelâCi cîkabwela mu—mu mbù, kuumukîla ku mbù too nè ku mbù. Elàayi meeji ku Cimenga cyà kilòmèètà bînunù bîbîdî nè nkàmà yînaayi kuntu kwàka pa mîkùnà yà Mukalenge ayî. Kaa, aci's ncîfwànyîne kwîkala cîlenga be!

<sup>247</sup> Nè nyama wa ntambwe nè mwànà wa mùkòòkò neyîlaalè pàmwè. Nyama wa ntambwe neàdyè mashînda bu mùdî ngombe

wa mpàngà. Nè ours neikalè nè kalolo, nè mbwa wa diitu neikalè mutekeshiibwè. Neciikalè cikondo kaayipu's wè! Kakwàkwikala cintu nànsha cimwè cyàtàcishà anyi kubùtula; cintu cyònsò neciikalè ditalala nè dinanga. Kakwàkwikala kàbidì bukùlákàjì to; kakwàkwikala kàbidì mabèèdì to, kakwàkwikala kàbidì byà difwà to.

<sup>248</sup> Balùmyànà, eci kí mbwalu bwà Taatù Noël kampàndà, cintu kampàndà cifwikakaja to, ncifùnda mu Dìyì. Nè kacya Dìyì kàditùkù dyànji kupangila to. Nè pa kwela meeji ku mulayì mwinè wà. . . Kí mmu ditùkù dyà kale dyà Bible to, kàdi mu ditùkù edi, ditùkù didì Nzambì, leelù ewu, katobà nànsha kàmwè kakèènakù kapangile ku Dìyì Dyèndè to. Kaa, mèmè's ndi mu njila mutàngile ku Cimenga aci. Ndi muCinangè, kàdi nwènù?

<sup>249</sup> To! Mpindyewu, Mwanèètù wa balùme, Mwanèètù wa bakàji, ntankù ùdi wàmba nè dībà citèèmà nè tusunsa makùmi àbidì. Ndi mumanyè nè ndi nè balundà kaaba aka bàà ku Kentucky kwàka. Ndi mumanyè nè ndi nè balundà kaaba aka bàà ku bitùpà bishiilèshiilàngàne byà ditùnga. Nwènù baswè kushààla bufùkù bujimà, mèmè nèmfutè bwà cibambalu cyènù. Mwawa mukwambilè nè, uvwa nè didyà dyà mundaamuunyà dikwindile ndi mfuta bwà cilààla-beenyi cyèbè pawikalà muswè kushààla. Nènku cintu cimwèpelè cidi cikèngela wèwè kwenza nkumumòna paanyimà pààpa, nènku nèncyènzè bulelela. Nèngènzè cyònsò cindi mwà kwenza aci bwà kukukwàcisha. Ndi mukunangè.

<sup>250</sup> Ncyèna nè meeji à kwandamuna ku nkonko eyi mīngà misangu mu mùshindù mubèngàngàne to. Wèwè kuyì ucitabuuja to, aci's cidi ànu cimpè menemene. Ndi muswè bwà wèwè kunnanga ànu bu pa kànà kakùlù, bwalu Nzambì mmumanyè nè ndi nnwenzela mùshindù awu. Mèmè ntu ànu ngàndamuna ku nkonko eyi ku dyànyì pàànyì dimanya-. . . Ndi mufwànyine kwikala mupiile mu yimwè yà ku yòyi ayi, mulundà wanyì, kàdi kacivwa ku budiswilà bwànyì nànsha. Bu nè mvwa nè nkonko mitwè ku yisambòmbò anyì mwandamukùlù, nànkù mvwà mwà kushààla ànu naayi nè muyumvwije ànu too nè mu ndòndò, kàdi ndi, pamutù pàà kuya naayi lùbilulùbilu mpindyewu. . . Ndi naayi ndambù pa dibàkà nè dishipa dyà dibàkà. Mwawa nè. . .mwelè meeji nè mvwa mwà kwandamuna yimwè yà ku yòyi. Ncivwa mwà kusangana mikwàbò mitèèka mwab'ewu to, mu diyàngata, kàdi ndi nè ndambù wa nkonko yà musinga mukolè kaaba aka, nkonko yà musinga mukolè menemene. Ndi muswè kuyàndamuna bwènù nwènù bu mèmè mwà kufùdishà.

<sup>251</sup> Mpindyewu, ní nudi basòmbèlè lwà pabwìpì mu nyùngulwilu emu, bìikilààyì Billy, mu diisààtù; nèmanyè dībà adi ní ndi mwà kwalukila. Nènsambilè lumingu elu. Kàdi ndi nè miyiikì yà bàbidì yà pàà nkààyeetù yàbùngì, kaa, mushikì wà mùshindù

*awu*. Nènku ndi nè mushiki wà mùshindù *awu* ku Arizona bwà mémè kuteeta kuyàndamuna ní ndi mwà kufùdisha. Nè biinè abu mbantu bàdì bàsaamà menemene. Bamwè bàà ku bôbò bàdì nè ntàtù, nènku kî mbamanyè cyà dyenza to: balùme nè bakàjì biikàle nè ntàtù.

<sup>252</sup> Nè yimwè yà ku yôyi mwab'ewu yivwa nè cyà kushààla miyiiki yà bàbìdì, bwalu ncivwa mwà kubìbala nè dîyi dikolè nànsha, bintu bidì bantu bàmba mwab'ewu bidì bitàngila maalu à mu dibàkà dyàbò nè bintu byà mùshindù awu. Nènku mvwa mwambile ànu Billy bwà kwalukila bwà kujandula nè mbanganyi, nè—nè kubàbìkila, nè kubàmbila nè netùbàtèèke ànu mu miyiiki wà bàbìdì, bwà ngàmòna mwà kuyiikila naabò. Yimwè nyà mushinga mukolè, nè yôyi nkonko yivwà nè cyà kwandamunyiibwa.

<sup>253</sup> Ndi mwab'ewu bwà kuteeta bwà kunwàmbulwisha, bwalu ndi munùngè. Nudi bàna bàanyi bàndì mulelèle Kilistò. Ndi nnana muntu nè muntu wa kunùdì. Ndi nnàna dilòlò edi; ndi nnàna dibà dyònsò; Ntu misangu yònsò ànu nnàna, nè ciine aci bu mwanèètù wa balùme nè wa bakàjì. Nudi bàna bàanyi; mémè ndi—mémè ndi tatwènu mu Èvànjeeliyò, kaciyi taatù mùdì nsaserdòsè to, mémè ndi—mémè ndi tatwènu mu Èvànjeeliyò bu mùdì Pòlò mwambè amu. Ndi munùlèlèle Kilistò, nè mpindyewu, ndi—ndi munùsèlèshe kùdì Kilistò; aci's nkunwenza mubangila kùdì Kilistò bu mushikankunde virgò. Kùnungeedi màyi ku makasa to! Kùnungeedi màyi ku makasa to! Shààlaayi mushikankundè virgò.

<sup>254</sup> “Nèngènzè nànkù bishi, Mwanèètù Branham?” Shààla wèwè ànu nè Dîyi; yikàlà nè nsòmbelu mutòòke nè mukezùke; kwikadi nè bwalu nànsha bùmwe bwà dyenza nè bintu byà pa buloba to. Dinanga dyàbì dyòdì mu mwoyi wèbè, ambà nè: “Kaa, Yesù, bu wèwè mwà kuswà ùdìngumùsheku. Ncyèna muswè kwikala nànkù to.”

Mpindyewu ncyèna ànu nè meeji à kwikala muntu kampàndà udi—udi wamba cikampàndà to. Ndi—ndi muswè kwamba nè kwikala mwena kwitabuujà mushùwashùwâlè. Itàbuujà Yesù Kilistò nè ikàlà nè mwoyi Bwendè ditùkù dyònsò. Kwènji cintu cibì nànsha.

<sup>255</sup> Mpindyewu, misangu yàbùngì ntu ngàakula bwà diitabuujà dyà bu Calviniste. Mpindyewu, kanwèdi meeji nè aci cidì cikulekela wenza cyònsò cyùdì muswè kwenza aci to. Muntu kampàndà ditùkù adi. . . Mémè nè: “Uvwa muyè mu èkèleeziyà anyi?”

Yèyè nè: “Mvwa muyè kalemba nyama.”

Mukàjì wa muntu awu kulwayè kùndì, nè ùvwa ùfùmina ku disukula dyà bilàmbà mu dyàlumingu. Ke mémè nè: “Kwèna muyè mu èkèleeziyà bwà cinyi?”

Yèyè nè: “Mvwa mukasukùle bilàmbà byànyi.”

Mémè nè: “Kabivwa bikèngela wêwè kwikala mwenzè aci to.”

“Èè,” yèyè nè, “mémè ncyèna mwena nè ànu mikenji wa kale to.”

Mémè nè: “Kàdi mvwa ndyàmbedila nè wêwè udi mwena Kilstò.” Nwamònu anyi? Mémè nè: “Udi mumanyè nè udi utèeka dibwe dyà cilèndwishi mu njila wa muntu kampàndà anyi?” Nwamònu anyi? Mémè nè: “Cidi. . .”

“Èè, hmm, mémè—mémè ndi ngiitabuuja *cikampàndà*. Kabyèna bikèngela bwà mémè kwenza bintu abi to. Mémè ncyèna mwena nè ànu mikenji to.”

<sup>256</sup> Èè, tàngilà Mwanèètù wa balùme, Mwanèètù wa bakàji, tàngilà kùnweku. Pòlò mmwambè nè: “Kudyà kwà munyiinyi ní kùdi kùtèeka dibwe dyà cilèndwishi mu njila wa mwanèètù wa balùme kampàndà, Ncyàdyakudyà kàbidì munyiinyi pàcidì buloba bwikàlekù to.” Nènku ndi ngèèla meeji nè mbifwànyine kwikala bimpè menemene. . .

<sup>257</sup> Mpindyewu, kwambayè nè: “Mwanèètù Branham, wêwè’s utu uya kalemba. Kacya kùtukù mwànji kulemba mu dyàlumingu anyi?” Lekèlè nkwambilèku cintu kampàndà. Kabiyi. . .Ncyèna nditwa makùmbù nkààyaanyi bwà bwalu ebu to, kàdi ndi. . .Mémè ncyèna mwena Nsabatu mpindyewu to, ndi ngiitabuuja nè Nyumà Mwimpè ke wetù Nsabatu. Mémè ndi ngiitabuuja nànkù, kàdi ndi ngèèla meeji nè bìvwa bikèngela bwà twètù kutwà dibìlka dyà ku lufù adi mushinga bu civùlukilu. Aci’s ke civùlukilu cìndi. . .Panwikalà nutwà ní nditùkù kaayi mushinga, twàyi dibìkà dyà ku lufù adi mushinga.

<sup>258</sup> Mpindyewu, kakwèna mukenji wà kuneemekela ní nditùkù kaayi nànsha, bwalu udi ubwela mu Nsabatu, ditalala, paùdi ubwela munda Mwèndè. Ndi nè lukonko alu kaaba aka bwà kwandamuna ànu mu mutanci mukèsè emu, bu Mukalenge mwà kwanyisha, bwà cìdì ditùkù dyà Nsabatu. Némcyūmvwìjè, bu Nzambì mwà kwanyisha.

Nènku mpindyewu mònaayi, vùlukàayi eci. Nwamònu anyi? Pàncìvwà mwànà mutekète, ànu lwà kuulu eku kùvwà Eichs musòmbèle mu njila aku, ncìcìvwà nè bidimu bitwè ku dikùmi nè bìnaayi; mvwa ntèya nyama bwà kudìlakù. Ncintu cìmwèpelè cìmvwà naaci bwà kwambulwisha nzùbu wetù ku byàkudyà cìvwà nkukwàta nyamà yà dyobo, mpùkù yà masenga, nè nyama yà opossums.

Mvwa munangè kutèeya nyama, nè mvwa nè cyà kwenza nànkù. Mvwa mwà kuya mu kàlaasà mwikàle nnunka bu dyobò, nènku mvwa—mvwa nè cilàmbà ànu cìmwèpelè, nè cyòci aci ke cìmwèpelè cìmvwà mwà kulwàta. Ke cyònsò cìmvwà naaci. Màmù ùvwa mwà kubìmvùla nè kubìsukula, kubitèeka paanyimà; nè mpindyewu, ke mùshindù ùmvwa nya

mu kàlaasà, muciiikàle mwânà mukesè. Kàdi mvwa mwimàne kuntu kwàka dilòòlò kampàndà; mémè nè: “Ndi nè matèyi àndi mwelè lwà ku Wathen’s, lwà kuulu kwàka.” Mvwa mpàtuka dindà dyònsò lwà pa díbà ibidì jaajaaja nè mwèndù bwà kwela matèyi awu, pashiishe kwalukila pa díbà bwà kuya mu kàlaasà. Mvwa mufwànyine kukwàta kàlulù; mémè kupetelaku meeyà dikùmi nè àtaanu. Mvwa nsùmba kashèètà kàà māsashi ku kòkò aku, nè pàmwàpa mvwa mwà kushipa tùlulù túsàtù ànyì tūnaayi. Citùvwà bapangile bwà kwenza tumàmpà tukesè nè tùlulù—mòna’s, nè nsupù bwà didyà dyà dilòòlò, mvwa mufwànyine kusùmbishakù kakwàbò, nè pàmwàpa kupeta màkùtà makùmbàne bwà kupeta ndambù wa màmpà, anyì ndambù wa byàkudyà, anyì ndambù wa bukula bwà kwenza naabù nsupù. Ncyèna mumanyè ní nuvwakù pèènu ne cyà kupicila mu nsòmbelu wa mùshind’awu anyì to.

<sup>259</sup> Mvwa mwà kulààdika ndòbu mu màyi; mpweka, nè nkakwàta mishipa ayi, nè kuyipànyisha ku mushinga wà bìcyela diikùmi. Ndààdika ndòbo yànyì ayi. Ncìvwa nànsha nè bwàtù bwinè to; mvwa mwà kwenda kowela mukwàte citùpà cyà mucì. Mbwela mu musùlu, mwinè awu muciiikàle nè mashika, mvwa ntèeka kambekeci kàànyì kàà bìshì byà ku ndòbo pa citùpà cyà mucì nè mvwa ngènda ncisàka mùshindù awu, pambidi pàànyì patupù mu musùlù amu, nè mvwa nyùnguluja eci. . . Mvwa nè monji ku luseke lwànyì elu wùmvwà nkùdika mishipa yànyì. Mishipa yà dibanga ayi yènda yìntuuta bipèpà byàyi abi ku mikòlò pàmvwà ngènda nya mùshindù awu, nè ngèela bìshì ku ndòbo. . .

<sup>260</sup> Kàdi tàngilàayi, mafùkù àbùngì mvwa mpàtuka nya mu musùlù awu pa díbà cilù cibedi jaajaaja nè ngènda nkenketa cìshì nè cìshì ku nshinga wa ndòbò aku. Bu mémè nciyì mwà kukwàtakù bùngì bukùmbàne mu matùkù àsambòmbò to, ncìvwa muswè ewu ùvwà ùlwa mu dyà mwandamutekete awu to. Mvwa mwimàne mwaba awu mu mvùla.

<sup>261</sup> Dilòòlò kampàndà ndi ànu mwà kudimòna mémè mwinè mwimàne, mweyèmène ku. . . Mvwa ngènzàmpèkàatù; kàdi mvwa mwimàne, mweyèmène ku dikunji mùshindù ewu, ku ciibi. Kaa, kùvwà mvùla wa ùtùnkumuka, pabwìpì nè díbà cilù cibedi jaajaaja. Mémè nè: “Nendwe pashiishe dilòòlò edi, kàdi ndi nya nè nkasùlùlù butèyi nè butèyi bwònsò. Ncyà kumukwàta mu dyà Nsabatu to.” Mémè nè: “Ncyà kwe—ncyà kwela matèyi awu to.” Nzambi kutwà cyòci aci mushinga.

<sup>262</sup> Ndi mvùluka cikondo cìmvwà ànu njinga misangu yònsò, mvwa misangu yònsò, nsòmbelu wanyì yònsò mvwa muswè kwikala cilembi. Kakwànyì mulùme ùvwà cilembi. Nudi bamanyè’s, kakwànyì mukàji mmufùmìne mu meetu; ùvwà ùfuciibwa difutu dyà bwena buloba. Ntu ànu munange diya mu meetu be.

263 Nènku ndi mvùluka nè mvwa misangu yònsò ànu muswè. . . Mvwa—mvwa ànu muswè matùkù àànyì ónsò à mwoyi. . . Mémè kudyàmbidila nè bu mémè mwà kupetakù mfrangà búngì bukùmbàne mu mùshindù wà mémè kupeta cingoma cyà 30-30 aci. . . Bu nè mvwakù mufwànyine kucyèenza, díbà adì's ndi mufwànyine kupeta mushikì wà matèyi. Mvwa mufwànyine kuya ku mikùnà; nèndekelè bikwàbò byà pa buloba biya. Mémè kudyàmbidila nè: “Pàmwápa misangu mikwàbò bu mémè mwà kwangata cingoma cyànyì cyà 22 nè kudiibidija bwà kwikala mwashi wa cingoma wa dipòkò, cilembi kampàndà neànyishè misangu mikwàbò bwà mémè kuya nendè. Mémè mufike ku diikala cilembi wa ndudì menemene, neítabè bwà mémè kumushindikija bwà kumukùba; ndi mwà kuya kalemba.” Ndi ntàngila, ku bimanu byànyì kulembèlèlè, bingoma bìmpè bìdì mfrangà mwà kusùmba bilembèlèlè kuntwaku, mu mùshindù wà nè ndi mwà kubisombesha bantu bwà kuyabò kalemba.

264 Yèyè ùdi ùndekela nya mu mikùnà bwà kayiishamù, nè bàmwè bàà ku balombodi bàà batàmbe bwìmpè bàdìku pa buloba bàdi bàngangata mu bulembi, cyanàànà. “Ngàsà udi ukemesha, díyì dipòle kaayi's wè.”

265 Pàndì. . . Nànsha mu dindà emu mene, cilembi wa kale wa tushà mwaba kampàndà nè cingoma cyà 35 cyà Remington, mu bulelèlè ncivwa dijinga nè cingoma to, kàdi yèyè wàkangeela dibòkò dyèndè ku nshìngù, wàmba nè ùdi ùtàmba kwenda kukùlakaja be kwà kulembayè nè: “Ndi muswè kukupèesha cingoma cyànyì.” Mémè kutùma meeji ku cintu aci pàncivwà mwànà mutekète, mùshindù, ní mvwakù mufwànyine kwela meeji nè mémè ewu ngadyàkapetakù cingoma cyà mùshindù awu, kaa, ekèlekèlè, civwàci cifwànyine kwikala's. Nènku mpindyewu, ngèlè ànu meeji nè, ku cimanu kwànyì nkukùdika, bingoma bilenga, nyaba yà kuya kalemba.

266 Ndi mvùluka pàmvwà mpàtuka, nè bàna bàà balùme bàvwa mwà kusùmba lutòndù lwà crème. Nè míngà misangu umwe wa ku bóbò ùvwa mwà kwikala nè dyeyà dyà pa mutù dishààle nè ùvwa mwà kunsùmbila pàànyì lutòndù lùmwè. Èkèlekèlè, ncivwa mwà kubasùmbila pàànyì kubàlujila to. Mémè kudyàmbidila nè: “Bu mémè. . .”

267 Nènku bàvwa misangu mikwàbò nè ciibidilu cyà kusùmba byà kale ebi, bitùtù tubiikila nè “màmpa meela minyìinyi à bàna bàà mu njila.” Ncyèna mumanyè ní nudi nwènu bònsò bavùlùke anyì to, kàdi bàmwè bàà ku nwènu beena kale. . . Uvwa ucisùmba cimwè ku dyeyà dimwè, nè mätungulù àbúngì makàngilamù. Kaa, ndi munangè bintu abi. Pàncivwà mwànà mukesè katùvwa nè. . . Ànu dyàmpa dyà matalà nè misàbù (nudi bamanyè mutùbì's) bwà kudyà.

268 Mpindyewu, muntu kampàndà's ùvwa mwà kunsùmbila dimwè dyà ku màmpa meela munyìinyi awu, kàdi balùmyàna,

mvwa mwà kudilàka ku minu kúmvwà mudikwàcile aku. Dìvwa—dìvwa...dya mwenya wà dikèma be. Ke mème kudyàmbidila nè: “Balùmyànà wa yààyà, muntu wawa, ngikalapù nànsha mwà kumusùmbila dyàmpà dyela munyìinyi's wè.” Kàdi mpindyewu, ndi mwà kusùmbila èkèleeziyà didyà dyàbò dya dilòòlò.

269 Ndi mvùluka bintu byònsò abi, kàdi mbifùmìne penyi? Ngàsà wa Nzambi, kakùvwa cintu nànsha cìmwè cìmvwà mème mwenzè nànsha.

270 Ndi mvùluka pàmvwà ngènda mpweka nè mùsèèsù kaaba aka ke mème kwakula nè muntu kampàndà. Taatù wanyì, nwènú bònsò nudi bacimanyè, yèyè ùvwa ùnwà; ùvwa wenza whisky. Nè ciinè aci...muntu nànsha umwe kàvwa naanyi bwalu to. Mvwa ngènda mpweka nè mùsèèsù nè nteeta bwà kuyikila nè bantu; ncidi ànu ntwilangana nè bantu abu leelù ewu. Kuteeta kuyiikilakù nè muntu kampàndà, kwòkò kakùyi mukwàbò muntu nànsha umwe wa kuyiikila nendè to, mmufwànyine kwimana nè: “Èyo, uh-huh.” Nwamònu anyi? Mème mvwa Branham.

271 Pa nànkù, mvwa mwà kudyùmvwa bibi be, nè mème kukùdimuka, nè kuumuka kuya. Mème kudyàmbidila nè: “Ncyèna mupiiile bwà aci to. Ncivwa mwenzè cìvwà papa wanyì mwenzè to. Kacya bàndela ncitukù mwànji kunwà maalà to. Mbwà cinyi búndi nè cyà kucitwàla?” Nènkù mvwa ndondela mukàjàànyì mwab'ewu ànu àbidi àdi panshi aa nè: “Bìvwa byàmba kukèngela mème kushààla pambèlù pàà cimenga.” Nzambi ùkaadi mumanè kwikala mwìmpè kùndi.

272 Mème kwela meeji lwà mwaba awu wàkambilàye Naatàna musòmbè mwaba awu musangu kampàndà. Naatàna... Davidi wàkamba nè: “Mbìmpè bwà mème kwikala musòmbèle mu nzùbu wa cèdres kàdi mushèètè wà cipungidi wà Nzambi wanyì mu ntentà pambèlù apu mubwikila anyi?” Yèyè... .

Naatàna, mupròfetà awu, wàkamba nè: “Davidi, enza cyònsò cidi mu mwoyi wèbè, bwalu Nzambi ùdi neebè.” Mupròfetà awu kwenzayè cilèma, kaciyi ku budiswìlè to.

Bufùkù abu Mukalenge kulwaYè kùdi mupròfetà, kwamba nè: “Ndà kambilà musadidi wanyì Davidi nè: ‘Ngàkamwangata ku luseke lwà mìkòòkò, udiisha mìkòòkò mikesè kuntu kwàka; nè Nankamupèèsha dìnà bu dya bantu banène bàdi pa buloba. (Kààkambakù nè Yèyè wàkamupèèsha dìnà ditàmbe bunène ku ònsò to, Wàkamupèèsha ànu dìnà bu dya bantu banène bàvwà pa buloba.) Ndi mukwenzèle bintu byònsò ebi, Davidi. Ndi muumùshe beena lukunà bèèbè kwònsò kùdi muyè. Mvwa ku luseke lwèbè. Ncitu mwànji kupanga kwikala nèèbè to, nè ncyàdyàkupangila kwikala nèèbè nànsha; Kàdi cyènà mwà kukulekela wibaka cimenga nànsha.’”

273 Mémè kwela meeji ku cyôci aci, mu mwaba kampàndà mpindyewu mùdi Nzambi munkwàcìshe nè mundekèle mmanya bantu banène, mundekèle nya pa buloba bujimà. Nè bantu bàà pa buloba bujimà bàmbiikila bwà kubàsambidila, nè babèedi, nè bàjinga tusunsa tukesè neebè, piinè apu kùkaadi ndambù wa bidimu kabàvwa nànsha mwà kukùdimuka . . . kabàvwa nànsha mwà kukùdimuna mutù wàbò bwà kuntàngila mu mùsèèsù to. Nènku mpindyewu, beena kantu-ku-byanza bàdi bàtanta kùdi bantu bàndi mbweja mu cimenga nè bàdibo naabò mwaba ewu, ku byàkudya byàbò nè tubèji twàbò twà bilààla-beenyi atu, nè bintu byà mùshindù awu, biikàle nè . . . bàya ku bilààla-beenyi nè mu nyungulwilu wa cimenga amu nè bintu bikwàbò byà mùshindù awu.

274 Bantu bàvwà . . . Bantu kabàvwa bannangè to nànsha kakesè; muntu nànsha umwe kàvwa naanyi bwalu to. Nènku mpindyewu, ku dikwàcisha dya Nzambi, ndi ngiitabuuja nè ndi ndudika Mukàji-musèla wa Yesù Kilistò. Kaa. “Ngàsà udi ukèmesha, dìyi dipòle kaayi’s wè.”

275 Ciinè aci cyàkafùmina penyi? Kàànyi kàlaasà kalonga? Ncyèna naakù to. Cyàkafùmina penyi? Buumùntù bwànyi? Ncyèna naabù nànsha. Ncìfùmine ku dimanya dyànyi dya tèlòlji anyi? Ncyèna mumanyè kantu nànsha kàmwe to. Ncìfikè ku cinyi? Ngàsà wa Nzambi wàkansungila awu.

Ngàsà ngutu mulongèshe mwoyi wànyi bwà  
kuciina,

Ngàsà ngudi umusha bwôwà bwànyi;

Mùshindù mwinè wàkamwènèka ngàsà awu nè  
disànka,

Dìbà dingàakiitabuuja dyàmbedi!

Mu njiwù yàbùngi, midimu mikolè nè matèyi,

Nkàadi mumanè kulwa;

Ngàsà ngudi mumfikìshe too nè mu  
dikùbiibwa mùshindù ewu,

Ngàsà ke wàkamfikisha Kumbèlu.

Nènku patùvwàku mu Cimenga aci kùkaadi  
bidimu binunu dikùmi,

Cidi cikenka kutàmba dìbà;

Katwàkwikala nè dìbà dishààdile bwà kwimba  
butùmbi Bwèndè to

Kutàmba mutwàkabangà dyàmbedi.

Kaa, mùshindù mwinè wùndi munangè Yesù’s wè, Dìna dilenga dyàkansungilà pàmvwà ngè—ngènzàmpèkààtù adi, dyàkangondopa pàmvwà nsaama adi, udi umpèèsha mulayi wà nzùbu mu Cimenga aci. Ndi nè nzùbu mu Lubwebwe alu. Kakwèna cintu cikwàbò nànsha cimwè cidi nè bwalu mpindyewu to ànu bwà kusanga bàna bàà Nzambi bônso pàmwe nè kwamba nè: “Tùyaayi.” Dìbà, mundankùlù didi dikùmbana;

dìbà dikaadi diyè bikolè kutamba mutùdi twètù twela meeji. Tùsambilàayi.

<sup>276</sup> Mukalenge Yesù, dyoya dyà ditùkù dipwàngàne... Bu mutùdi bafwànyine kwimana pa lusongo lwà mukùnà nè tutàngila dìbà, pàdi mishoonyi mikùnze yibànda yicyàmakana ku mikùnà minène yà ku wesètè kwàka, pàdi dísù dinène dibwita nkààyaadi, nyuunyi yibanga kudipandila njila mitàngila ku maswa àayi, bufùkù bùdi bwènda buseemena. Tudi bamòne dikwàbò ditùkù dinène dyà Nyumà pàdi Nyumà Mwimpè mutwàmbùlwishe bwà kwandamuna ku nkonko eyi. Mpindyewu, tuyàaya ku diswa dyètù, Mukalenge. Tùkubèku; kùlekedikù cintu nànsha cimwè cìtùlenga to, Mukalenge. Tùlamàku ku nyòka yà bufùkù nè bubì. Nzambi ikalèku pabwìpi neetù misangu yònsò, àtùkùbè nè àtùkwàcishèku.

<sup>277</sup> Ndi ndòmba, Taatù wa mu Dyulu, bwà Ùbeneshèku muntu nè muntu yònsò uvwakù mu masangisha awu, aba bàdi kabàyi bafwànyine kwikala, bònsò bàdi bàtèeleja mikàbà yà mèyi abu. Swàkù bwà nkonko kayìikadi mipitèpìte bukolè to. Nè piikalàbi nè ndi mutùpàkàne, Mukalenge, Wèwè udi mumanyè mwoyi wànyi; ncivwa nè meeji à kwenza nàngu to. Ndi ndòmba, Nzambi, kòkò cintu kampàndà cyà cibi, Wèwè kashidi, kashidi kwàdyàkulekelakù cìtùngunuka; mukàbà wà mèyi ewu wimane. Kùndekèdiku nseeswisha muntu nànsha umwe to, Mukalenge. Anyishàku ngiikalè musadidi Webè mulelèlè, bwalu ke dijinga dyà mwoyi wànyi wònsò nkòong. Nànsha mèmè nè mwoyi anyi mufwè, nànsha mèmè munènge anyi mèmè mutùngùnùke, nànsha mèmè mulàale tulù anyi mèmè mutàbàle pàälwàYe, kabýèna bintacisha mèmè to, Taatù, diswa Dyèbè dyènzèkè. “Bwalu ndi mumanyè nè Mupikudi wanyì ùdi nè mwoyi, nè ku matùkù à ndekeelu Yèyè neimanè pa buloba apa. Nè nànsha paanyimà pàà misàndà yà mu dikòbà mimanè kubùtula mubidi ewu, nànsha nàngu mu mubidi wànyi nèmmonè Nzambi.” Awu ùvwa mmupròfètà Yobò pàakamònàye dilwa dyà Mukalenge.

<sup>278</sup> Nènkù, Mukalenge, leelù ewu twètù bu basadidi Bèèbè, tudi tutàngila kumpàlà nè tumòna dilwa Dyèbè. Pa nàngu kabyèna bitwènzela bwalu nànsha, Mukalenge, cikondo, mùshindù, mwaba. Tudi baswè ànu bwà kuKulengeleela. Tudi mu byanza Byèbè. Tùlamàaku, Mukalenge, too nè pàdi dìbà dipàtuka. Enzàku nàngu, nè pashìishe netwèndè bònsò batàngile ku Siònà kùdi Cimenga aci cìdi Mwànà wa mùkòòkò mwikàle Bukènkè.

<sup>279</sup> Bànà bàanyi bananga bakesè aba, Mukalenge, bándi mukulelèlè Wèwè ku myonji yà Bible, bòbò aba bàdi mamuma à Dìyi edi. Mbannangè, nè mèmè ndi mubànangè. Nè ndi mumanyè nè Wèwè udi mutùrangè twètù bònsò. Tudi tulòmba, Nzambi, bwà Wèwè kutùtùkija mu Dìyi Dyèbè bwà twaMumònakù ànu Yèyè nkàayèndè. Enzàku nàngu, Mukalenge. Swàkù bwà twikalèku bùle tentè nè Dìyi Dyèndè mu mùshindù wà nè Nyumà wàmòna mwà kukwàta neetù mudimu mwaba kanà wònsò bwà

kumwènesha Dìyi kanà dyònsò didiYe mulayè. Twénzèlàku nàнку twètù bònsò. Apa pa batèèleji aba. . .

<sup>280</sup> Mwanèètù Jackson ùdi wàlukila mpindyewu ewu, lwà mu Àfrikè wa ku Sud mwàmwa. Ndàaku nendè nè mukàjèndè; ikàlà naabò, Mukalenge. Ùbàludìke mu lwendu lwàbò.

<sup>281</sup> Mwanèètù Lee Vayle nyèyè ewu munkaci mwà kufùnda, wènda ùfùnda díyi dyònsò ndìndì ngàmba adi, ùteeta bwà kwenza mukàndà. Kaa, Nzambi, kwàcishakù Mwanèètù wa balùme Vayle nè Mwanèètù wa bakàji Vayle.

<sup>282</sup> Bàná bèètù bàà balùme bàà ku—ku Arkansas mbòbò aba, nè—nè bàná bèètù baa Martin, nè—nè bàná bèètù bakwàbò bònsò aba. Ndi ndòmba bwà Wèwè kwikala nè muntu nè muntu wa kùdìbo.

<sup>283</sup> Ikàlàku nè Mwanèètù Neville, Mwanèètù Capps, Mwanèètù Ruddell, Mwanèètù Jackson, bònsò. Kaa, Nzambi, kùdi bààbùngì be. Mbafùmine ku Géorgie, ku Alabama, nè munda mwà ditunga nè pa buloba bujimà. Tudi tuvùluka musambu ewu wà nè:

Kaa, mbafùmine ku Esètè nè ku Wesètè,  
Mbafùmine ku malaba à kuleekùle,  
Bwà kwenza difestò nè Mfùmù, bwà kudyà bu  
mwenyi Wendè;

Mmubàbìikile bwà kuMwabanyanganabò.

Mùshindù mwinè ùdi beena lwendu aba  
babènéshìibwe's wè!  
Bàbandila mpàlà Wendè mujidila  
Bàkenka nè ònanga dyà Nzambi;  
Baabanyanganyi babènéshìibwe bàà ngàsà  
Wendè,  
Bu mabwe à mushinga mukolè mu cifulu  
Cyèndè cyà butùmbi bwà kukenkesha.

<sup>284</sup> Kaa, Nzambi, swàkù bwà tùkenkeshè bikolè bu mabwe à mushinga mukolè ku cifulu Cyèndè cyà butùmbi, bwà bakwàbò bààmònakù nè bààjinga kuMukwàcila mudimu. Enzàku nàнку, Mukalenge. Bàkùbèku mu njila. Bènéshàku muntu nè muntu.

<sup>285</sup> Nènku Taatù, pa díbà Dyèbè diimanyika. . .Mèmè ndi musadidi webè. PaWikalà muswè bwà mèmè kutùngunuka nè nkonku eyi lumingu lùdi lùlondà elu anyi bwà kwangata miyiiki yà bàbidì ayi, nsokòlwèlàku, Mukalenge, nènku enzàku mmanyè pankaci pàà mpindyewu nè mu diisàtù bwà twamònakù mwà kuumvwa. Enzàku nàнку, Taatù, bwà bantu bàmonè mwà kulwa. Nènku ndi ndòmba dibènesha edi bwà Wèwè kutùkwàcisha nè—nè kutwilanganakù neètù cyàkàbidì kaaba aka pa díbà dyètù dyà disangisha dilwalwà edi.

<sup>286</sup> Ikàlàku nè Mwanèètù Neville nè bantu bàdì bàtwàla Dìyi bafùmine mu Texas mwàmwa aba, nè lwà mu Arkansas

mwàmwa, nè mu myaba mishiileshiiàngàne; ikàlà ànu naabò, Taatù. Mwanèètù Pearry Green nè kasumbu kònsò kàdi kuntwaku aku, nè Wèwè ikàlàku ànu naabò bònsò, Mukalenge; bôbò mbànà Bèèbè batekète. Myaba yònsò pa buloba bujimà mmbindile dilwa Dyèbè. Tùkwàcishèku, Taatù tudi tulòmba, patùdi tudilàmbula twètù biinè Kùdi apa. Mu Dìnà dyà Yesù kwàtakù neetù mudimu. Amen.

<sup>287</sup> Mémè ntu munangè musambu awu wà nè: *Mbafùmine Ku Esète nè ku Wesète*. Mbanganyi bàdi bawùmanyè? Ncyèna mumanyè nè ndi muwùmanyè to, kàdi ndi ngèèla meeji nè ndi mumanyè citùminyì cimwè. Udi mufwànyine kuwùbakùla's, Mwanèètù wa bakàji. Ncyèna mumanyè ní bàdi mwà kuwùmanya.

Kaa, mbafùmine ku Esète nè ku Wesète,  
Mbafùmine ku buloba bwà kuleekùle abu,  
Bwà kwenza difestò nè Mfùmù wetù, bwà  
kudyà bu beenyi Bèndè;  
Mùshindù mwinè ùdi beena lwendu aba  
babènèshiiibwe's wè!

Kaa, bà mòna mpàla Wendè mujidiibwe  
Wèla nsèsà yà dinanga dyà Nzambi;  
Baabanyanganyi bàbènèshiiibwè bàà ngàsà  
Wendè,  
Bu mabwe à mushinga mukolè mu cifulu  
Cyèndè cyà butùmbi bwà kukenkesha.

Kaa, Yesù ùlwalwa kàtààtaakà,  
Dìbà adi mateeta ètù nèàjike.  
Kaa, ambàbi tũng bu Mukalenge wetù mwà  
kulwa pa dìbà edi  
Bwà aba bàdi basùlùdiiibwe ku mpèkaatù?  
Kaa, dìbà adi ncifwànyine kunùtwàdila  
disànka,  
Anyi tunyinyanganya nè diteketa dikolè dyà mu  
mabòko anyi?  
Pààlwà Mukalenge mu Butùmbi,  
Netùtuutakeenà Nendè muulu mu mpeepèlè.

Nudi bawùrangè anyi? Tùwùteetààyiibi cyàkàbidi.

Kaa, bôbò nebàfumine ku Esète nè ku Wesète,  
Kaa, mbafùmine ku buloba bwà kuleekùle abu,  
Bwà kwenza difestò nè Mfùmù wetù, bwà  
kudyà bu beenyi Bèndè,  
Mùshindù mwinè wùdi beena lwendu aba  
babènèshiiibwe's wè!  
Bàbandila mpàlà Wendè mujidila  
Ùkenka nè dinanga dyà Nzambi;  
Kaa, baabanyanganyi bàbènèshiiibwe bàà  
ngàsà Wendè,

Bu mabwe à mushinga mukolè mu cifulu  
Cyèndè cyà butùmbi bwà kukenkesha.

Kaa, Yesù ùlwalwa kàtààtaakà,  
Dìbà adi mateeta ètù neàjikè.

Kaa, ambàbi túng bu Mukalenge wetù mwà  
kulwa pa díbà edi

Bwalu aba bàdi basùùlùdìibwe ku mpèkaatù?  
Kaa, díbà adi ncifwànyine kunùtwàdila  
disànka,

Anyi tunyinganyinga nè diteketa dikolè dyà mu  
mabòko anyi?

Pààlwà Mukalenge wetù mu Butùmbi,  
Netùtuutakeene Nèndè muulu mu mpeepèlè.

Mbanganyi bàdiku baswè katwilangana Nèndè muulu  
mwàmwa? Kaa, ekèlekèlè!

Kaa, Yesù ùlwalwa kàtààtaakà,

Bwitàayi ànu kwísu kwènù cyànàànà nè elàayi meeji nè nudi  
nuumvwa mpungi ùdila.

Dìbà adi ntàtù yètù neyìjikè.

Kaa, ambàbi túng bu Mukalenge wetù mwà  
kulwa pa díbà edi

Bwà aba bàdi basùùlùdìibwe ku mpèkaatù?

Kaa, díbà adi ncifwànyine kunùtwàdila  
disànka,

Anyi tunyinganyinga nè diteketa dikolè dyà mu  
mabòko anyi?

Pààlwà Mukalenge wetù mu Butùmbi,  
Netùtuutakeenà Nèndè muulu mu mpeepèlè.

<sup>288</sup> Nudi baswè aci anyi? Pat, kolèshà mwoyi! Bufùkù nebùcye  
bwèbè wèwè dimwè dyà ku àdi panshì aa. Ncivwa ànu mumòne  
nè mpenyi pàvwàci ciyè to, kàdi civwa cimwèka cìmpè. Amen!  
Wèwè's udi nè cikondo cile, cile be, mwanèètù, necìpinganè.  
“Nènku ànu mùdì dyàmpà dyela pa màyi amu nedyàlukilè  
cyàkàbidi kùdì dīngà ditùkù.” Ncyà bushùwà. Mbìmpè.

Kaa, nudi baMunangè anyi?

Diitabuuja dyànyi nditàngile Kùdì,  
Wèwè Mwànà wa mùkòòkò wa ku Kàlvariyò,  
Éyi Musùngidi wa kùdì Nzambi;  
Mpindyewu ntèèlèjèku pàndi nsambila apa,  
Umùshaku mpèkaatù yànyi yònsò,  
Kundekediku mpàmbuka  
Nya kule nè luseke Lwèbè nànsha.

Pàndi ngèndela mu nyòngòlò wa mīdimà yà  
mwoyi apa,

Nè pàdi lutàtù lùpàasalala lùnyùngùlùkila,  
Wèwè ikàlà Mulombodi wanyi;

Tùminà mídimà díyì bwà yàndamukè munyà,  
 Kupula bwôwà bwà tunyinganyinga,  
 Éyì anyìshàku bwà kuumukila ku leelù ewu  
 Mémè yònsò ngiikalè ànu Webè!

Kanwènaayikù banangè aci anyì?

Diitabuuja dyànyì nditàngile Kùdì,  
 Wèwè Mwànà wa mùkòòkò wa ku Kàlvariyò,  
 Éyì Musungidi wa kùdì Nzambi;  
 Mpindyewu ntèèlèjèku pàndì nsambila apa,  
 Umùshaaku mpèkaatù wanyì ònsò,  
 Anyì kundekediku mpàmbuka  
 Nya kule nè luseke Lwèbè nànsha.

Mwonji wùdì wùswikakajà wikale  
 mubènèshiiibwe (Kaa, ekèlekèle!)

Mwoyi yètù mu dinanga dyà bwena Kilistò;  
 Bwobùmwè bwà meeji à buuwetù  
 Mbufwànàngàne nè bwà ku Dyulu.

Kumpalà kwà Nkwasa wa butùmbi wa Taatù  
 wetù

Tudi twicikija disambila dyètù dyà kapyà  
 kakolè;

Diciina dyètù, ditèkemena dyètù, twipàcilà  
 twètù tùdì tùmwè,

Busàmbi bwètù nè ntàtù yètù.

Kàdi patùdì tutàpuluka,

Bìdì bitùsaama ku mwoyi;

Kàdi netwìkalè ànu baswikakaja mu mwoyi,

Nè batèkèmène bwà twatwilanganakù  
 cyàkàbìdì.

<sup>289</sup> Mwanèètù wa bakàjì Wilson, udi muvùlùke nè kùkaadi  
 bidimu bitwè ku makùmi àsàtù nè bìsàtù anyì makùmi àsàtù  
 nè bitaanu mu disangisha dyà mu kazùbu kakesè mutùvwà  
 mwà kushààla bakwàtàngàne ku byanza muntu nè mukwèndè  
 amu anyì? Mwua mumanyè nè udi muvùlùke bwalu abu.  
 Kaa, twòlòlààyikù ànu cyanza mpindyewu nè tükwate muntu  
 kampàndà ku cyanza.

Mwonji wùdì wùswikakajà wùbènèshiiibwè  
 Mwoyi wètù mu dinanga dyà bwena Kilistò;  
 Bwobùmwè bwà meeji à buuwetù  
 Mbufwànàngàne nè bwà ku Dyulu.

Kumpalà kwà Nkwasa wa butùmbi wa Taatù  
 wetù

Tudi twicikija disambila dyètù dyà kapyà  
 kakolè;

Diciina dyètù, ditèkemena dyètù, twipàcilà  
 twètù tùdì tùmwè,

Busàmbi bwètù nè ntàtù yètù.

Patùdi tutàpuluka,  
 Bìdi bitùsaama ku mwoyi;  
 Kàdi netwìkalè ànu baswìkakaja mu mwoyi,  
 Nè batèkèmène bwà kutwilanganakù  
 cyàkàbìdì.

Nudi banangàngàne muntu nè mukwèndè anyi? “Bànà bakesè, nangàngànaayi muntu nè mukwèndè.”

Too nè patwàsangilà! too nè patwàsangilà!  
 Too nè patwàsangilà ku makàsà à Yesù;  
 Too nè patwàsangilà! too nè patwàsangilà!  
 Nzambi ìkalè neenù too nè patwàsangilà  
 cyàkàbìdì!

<sup>290</sup> Nudi baMunangè anyi? Yèyè kî mmulenga wa dikèma anyi? Nudi banangàngàne muntu nè mukwèndè anyi? Olola cyanza, nwàmbilanganè muntu nè mukwèndè cintu kampàndà. Ambà nè: “Nzambi àkubènèshè, mwanèètù wa balùme. Àkubènèshè, mwanèètù wa bakàji.”

<sup>291</sup> Bàdi munkacì mwà kutùtèeleja dilòòlò edi dyàmwàmwà dyà musùlù mwàmwa, Mwanèètù wa bakàji Wilson. Ndi mwà kumòna Mwanèètù mukùlumpe Seward awu wènda wèndela panshì, ùtuuta bikàshi. Ndi mumòne mwanèètù paanyimà pààpa nè mwedi kwìsù mwelè byanza byèndè muulu, munkacì mwà kutùmbisha Nzambi; Mwawa ngèèla meeji kùdi Mwanèètù Ryan, mùvwàye nè ciibidilu cyà kusòmba mwaba awu mene mu tabernacle wa kale mwàmwa nè mwedi wèndè mule mùshindù ewu. Ùdi munkacì mwà kutèelejila dilòòlò edi dyàmwàmwà dyà biibi byà Butumbi, munsantu munanga wa kale awu. Yèyè kî ngwa ùkèmesha anyi?

Angàtà Dìna dyà Yesù wèndè naadi,  
 Mwànà wa kanyinganyinga nè dikènga;  
 Nedìkupè disànka nè busàmbi,  
 Kaa, nda naaDì kwònsò kùyaayà.

Dìna dyà mushinga, Éyì dyà bupòle be!  
 Ditèkemena dyà buloba nè disànka dyà Dyulu,  
 Dìna dyà mushinga, Éyì dyà bupòle be!  
 Ditèkemena dyà buloba nè disànka dyà Dyulu.

Mpindyewu, angàtà Dìna dyà Yesù wèndè  
 naadi. (Bwà cinyi?)

Bu Ngabu ku butèyi bwònsò; (Cidi cyènzekà  
 ncinyi?)

Pààkujìngilà mateciibwa ku nseke nè ku  
 nseke,

Nungànà Dìna dyà Cijila adi mu disambila.


Dìna dyà mushinga, Éyì dyà bupòle be!  
 Ditèkemena dyà buloba nè . . .

Kaa, Yesù, bàkwàcìshèku mûndì ndòmba...?...  
Bõndòpèku, Mukalenge, mu Yesù...?...eci ncyèbè wèwè  
anyì...?... .

Ditèkemena dyà buloba nè disànkà dyà Dyulu.

Awu mmwanèèbè wa bakàjì mutekète anyì? Mmulengèle  
mpàlà.

<sup>292</sup> Bwà miyiiki yà bàbìdì ayi: Billy mmwambè bwà kumumona  
pankaci pàà mpindyewu nè mu diisâtù bwà miyiiki yà bàbìdì  
anyì kuumukila ku diisâtù too nè ku diisambòmbò bwà  
miyiiki yà bàbìdì yilwalwà eyi, nànsha . . . Twètù katùyì twenza  
masangisha paanyimà pàà diisâtù to, mònanganaayi nendè,  
nwênù bàdì nè miyiiki yà bàbìdì abu. Bàmwè bàà kunùdì,  
kì mmùmanyè mwà kutwilàngana neenù to. Pa nàнку yêyè  
neikalè . . . Bõnsò bàdì baswè miyiiki yà bàbìdì mpindyewu abu,  
mònanganaayi nè Billy.

<sup>293</sup> Nudi baMunangè anyì? Èyo. Mpindyewu, too nè  
patwàsangilà, Nzambì ànùbènèshè. Tudi baswè kwinyika mitù  
yètù; nènku nèndombè mulunda wanyì mwîmpè, wa lulamatu  
awu, wíkala mwà kuya dyàmwàmwà dyà mbù mpindyewu  
ewu, mutàngile ku Àfrikè kwàka, kúmvwà musangu kampàndà  
mwenzè mudimu wà bumpandanjila mu Dìná dyà Mukalenge,  
Mwanèètù Sidney Jackson, yêyè nè mukàjèndè . . . Tudi nè  
disànkà dyàbùngì dyà kwikalakù naabù bwà ndambù wa  
masangisha à ndekeelu aa. Mùshindù mwinè wùdì Nzambì  
mumubènèshe's wè. Nènku nèndombèku Mwanèètù Sidney  
Jackson bu yêyè mwà kutangalaja batèèleji aba mu disambila.  
Mwanèètù Jackson, bu wèwè mwà kuswà. 

64-0823E Nkonko Nè Mandamuna #2  
Branham Tabernacle  
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)